

**NATIONAL ASSEMBLY OF
SEYCHELLES**

Tuesday 27th June, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour Madanm Clerk e nou bann zofisyé Lasanble. Bonzour manm piblik, viziter ki dan nou Galeri, ki bann zabitan Port Glaud byenveni pour nou sesyon Lasanble.

E bonzour e byenveni osi Mrs Maryse Payet, ki manman Chad Payet ki ganny mansyonnen dan en kestyon devan Lasanble ozordi, e mon pran lokazyon pour mwan prezant mon senser kondoleans pour Mrs Payet e lafanmir, pour lanmor trazik son garson, a en byen az, byen dan komansman son karyer ki en lanmor ki'n met bokou latristes dan nou leker.

Byenveni osi nou piblik ki pe swiv nou, lo radyo oubyen lo televizyon parey labitid e mersi

pour zwenn nou pour sa travay Lasanble.

Madanm Clerk nou a pran Prezantasyon Papye.

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble nou bann envite dan Galeri, e nou piblik ki pe ekoute *ce matin*. Bann Papye ki pe ganny prezante i :-

S.I. 45 of 2023 Elections (Delimitation of Electoral Boundaries Committee) Regulations, 2023

S.I. 46 of 2023 Elections Advisory Board (Amendment) Regulations, 2023

S.I. 47 of 2023 National Awards (Date of First Investiture Ceremony) Order, 2023. Mersi Mr Speaker.

MR SPEAKER

Mersi Madanm Clerk nou ava prosede pour *Private Notice Question* e madanm raporter i ava apel delegasyon Vis-Prezidan.

Bon bonzour e byenveni Vis-Prezidan Ahmed Afif. E pe akonpanyi li *Brigadier* Michael Rosette Sef *Defence Forces* e *Lieutenant Colonel* Allain Pierre. Mersi pour zot prezans e zot partisipasyon pour *Private Notice Question*. Mon ava

prezan apel *Leader* Lopozisyon pour met son kestyon silvouple.

HON SEBASTIEN PILLAY

Mersi Mr Speaker. Bonzour Mr Speaker e bonzour tou bann zabitan ki dan Galeri e bonzour Mrs Payet. Ankor enn fwa permet mwan pour pas mon avek ou mon senser kondoleans e tou mon senpati pour pert ou, ou garson.

Mr Speaker mon le osi swet bonzour Vis-Prezidan avek son *panel* ki devan nou. E bonzour tou koleg Onorab e byensir bonzour tou Lepep Seselwa ki pe ekout nou e pe swiv Lasanble ozordi bomaten.

Mr Speaker mon kestyon i lir koumsa: -

Akoz *SDF Seychelles Defence Forces* pe refize pour donn lafanmir sa rapor an koneksyon avek lanmor trazik zenn *recruit* Chad Payet ki ti arive le 27 Mars sa lannen? Mersi Mr Speaker.

MR SPEAKER

Mersi Onorab. Vis-Prezidan mon a demann ou pour fer ou repons.

THE VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour *Leader* Lopozisyon. Bonzour

Leader Biznes Gouvernman, tou bann Manm Lasanble, tou bann manm piblik ki dan Galeri e Mrs Maryse Payet osi ki mon konpran i dan Galeri.

Mr Speaker, premyerman, les mwan eksprim lo lapar Lafors Defans e Gouvernman ankor enn fwa nou senser kondoleans avek manman e papa Chad Payet e osi tou son bann *bien aimer*, enkli son fer ek son ser, tou lafanmir e son bann zanmi e koleg.

Mr Speaker Chad ti en zenn *homme* ki ti eksprim son dezir profon pour li zwenn lafors militer i ti en legzanp pour son bann koleg *recruit* dan Larme. E li i ti fer tou son bann preparasyon, avan ki i ti zwenn lafors aköz i ti anvi fer byen.

I ti menm dir ki li i anvi form parti sekirite prezidansyel. Sa sete son rev, sa zenn *homme*. Enn bann eleman ki fer sa lanmor vin pli fermal, sete ki sa zofisye militer, sa zenn *recruit*, sa zofisye militer ki ti premye vin akote Chad apre ki i ti tonbe dan *training* sete son prop kouzen, ki en *trainer* sa zour dan militer. Ti vreman fermal.

Mr Speaker i rasker pour vwar rev sa zenn *homme* ki'n partaze ek son fanmir, pour ganny brize dizour a landmen dan en fason sitan trazik, e sagrinan. I protokol militer pour

fer en rapor dan bann tel lenvestigasyon, me sa bann rapor i reste koman bann dokiman entern, e konfidansyel. Annefe lafanmir Chad, zot ti ganny sans pour zot vwar sa rapor, enkli lezot dokiman medikal dan prezans zofisye *SDF*.

Me zot pa'n ganny en kopi sa rapor aköz parey mon'n dir, sa se bann dokiman entern. Me selman la Mr Speaker, e mon konnen ki Mrs Maryse Payet ki pe soufer en kantite, e i dan Galeri Nasyonal Lasanble Nasyonal bomaten - mon anvi dir avek li e lafanmir ki *CDF*.

E osi Komandan an Sef ki en zanmi lafanmir e ki ti pas bokou letan avek zot apre lanmor Chad, i pare pour zwenn ek lafanmir nenport ki ler ki zot pare pour diskrit nenport ki laspe lanmor Chad; avek bi ed zot rod sa ki nou apel *closure*; pour zot vir sa paz, ki sitan neseseur pour zot kontiny zot lavi apre sa traze douloure.

Donk apre Lasanble, mwan annefe bomaten mon ti zwenn avek manman Chad, me mon anvi koz avek lafanmir direktman, pour ed zot ganny sa soulazman e sipor ki sitan neseseur swivan zot maler ki mon konnen i lour pour zot anmennen. Mersi Mr Speaker.

MR SPEAKER

Mersi. Eskiz mwan mon'n pran letan pour note tou bann non, nou pour pran kestyon siplemanter lezot Manm parey labitid. Malerezman mon'n vwar en kantite Manm ki'n lev lanmen parey labitid nou pour bezwen termin sa kestyon 10er, pour nou kapab travay lo lezot kestyon.

Premye kestyon Onorab Regina Esparon.

HON REGINA ESPARON

Mersi Mr Speaker. Bonzour tou Manm Lasanble. Bonzour bann zabitan Port Glaud ki dan Galeri. Bonzour Mrs Payet ki la pour ekout deba bomaten. Mr Speaker mon ti a anvi demann avek Vis-Prezidan.

Eski i en Polisi *SDF* pour letan ki en keksoz i arive, letan zot fer sa *internal report* pour zot pa *disclose* sa avek piblik? Oubyen sa i zis pour bann *recruit*, me selman letan en solda in sermante si ariv en keksoz zot *disclose*.

Eksi sa i en Polisi zeneral pour tou bann *case* ki arive, tou bann lanket ki *SDF* i fer, oubyen i zis dan bann lanmor trazik? Mon pa konnen sey eksplik mwan. Mersi.

MR SPEAKER

Mersi Onorab. Vis-Prezidan ou repons silvouple.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab ler i ariv nenport ki lensidan pour lakel i bezwen annan sa ki apel en *Board of Enquiry*, en lenvestigasyon ki ganny fer dan militer. Sa bann lenvestigasyon i ganny fer par bann zofisyè apwente par militer e sa bann dokiman normalman i reste entern, e i reste konfidansyel parske se dokiman konsernan militer.

I kapab konsern en solda, i kapab konsern en lensidan. Me i reste bann dokiman entern. Me dan sa ka, *SDF* ti fer li son devwar - parske sirkonstans sa lensidan trazik, sa Chad pa ti ankor vin en zofisyè militer, i pa ti ankor sermante.

I ti ankor en *recruit* e anefe i ti dan son katriyenm zour koman en *recruit*. Me i ti en garson ki ti fit, i ti'n pas tou son bann medikal. E ti en garson tre determinen. E dan sirkonstans kot ti ete e *SDF* napa nanryen pour kasyet.

Alor fanmir ti ganny kriye, e zot in ganny montre tou rapor medikal e tou rapor ki sa *Board of Enquiry* ti trouve, zot ti

kapab, ti met devan pour zot kapab vwar. E alor nou'n fer le neserer, me parey mon dir i reste en Polisi ki okenn dokiman, ki ganny prodwir par en *Board of Enquiry SDF* i reste entern e konfidansyel.

Me selman nou pare parey mon'n dir pour nou zwenn avek fanmir, pour ed zot. Konn tou lenformasyon, otour sa. Parske napa nanryen ki pour afekte okenn sekre militer dan okenn fason stratezik. Alor nou, nou pare pour zwenn avek zot, e pour ed zot vremen kapab troun sa paz. Mersi Mr Speaker.

MR SPEAKER

Mersi Vis-Prezidan. Onorab Sylvanne Lemiel. Kestyon?

HON SYLVANNE LEMIEL

Mersi Mr Speaker. Bonzour tou bann envite ki dan *Gallery*, sorti Port Glaud. Bonzour Mrs Payet e tou bann dimoun ki a lekout ensi mon bann koleg Manm Onorab. Vis-Prezidan avan ki ou'n vin lo sa *issue closure* dan ou larepons, sa ti enn mon kestyon ki mon ti pe mazin.

Eski nou realize konmsi ki lafanmir Payet, lafanmir Chad, son manman e zot tou, eski nou realize ki zot pa pour zanmen gannyen en *closure*? Konmsi tan ki sa sityasyon i reste parey. *It's a very good*

initiative si ou'n dir ou pour zwenn li.

Me sa ki mwan mon pour *press* lo la, i se ki eski zot pare pour zot rekonsider zot desizyon an sa ki konsern donn sa fanmir sa rapor? Mersi.

MR SPEAKER

Mersi Onorab. Vis-Prezidan?

THE VICE-PRESIDENT AHMED AFIF

Mersi bokou Mr Speaker. Mr Speaker wi nou realiz sansibilite ki i annan dan en tel lensidan. Wi nou realiz lenportans pour lafanmir pour zot konn tou sa ki'n arive otour sa lensidan.

E wi nou realize poudir *closure*, petet zanmen pour annan. Me selman nou bezwen ed zot kapab aksepte avek tou son difikilte ki i vini, sirtou pour en manman ki ti tre pre ek son garson Chad, i pour difisil pour li. Me selman nou bezwen ed li pour li kontiny son lavi. Nou bezwen ed li pour li kontinyen plere, me selman konn tou sa ki annan otour sa e ed li pour kapab sirmont pour al devan.

Eski nou pare pour nou rekonsider lafason nou pe fer konsernan sa? Se pour sa rezon ki mon'n dir, nou, nou pare pour zwenn avek zot, Sef Lafors Defans, Komandan an Sef,

Prezidan Ramkalawan, i pare pour zwenn avek zot e nou ava diskite, zisteman pour trouv en fason pour nou al devan. Mersi bokou Mr Speaker.

MR SPEAKER

Wi. Mersi. Mon a note pour bann Manm, nou pa kapab pran tro letan pour klarifikasyon. Ler Vis-Prezidan in reponn en kestyon, nou bezwen aksepte repons koman en repons sa kestyon. Onorab Lemiel si ou annan en pwen klarifikasyon zis direkteman lo la silvouple.

HON SYLVANNE LEMIEL

Mr Speaker wi mon santi ki Vis Prezidan i pa'n reponn mon kestyon. Eski zot pare pour rekonsider zot pozisyon pour donn sa rapor?

MR SPEAKER

Mersi.

HON SYLVANNE LEMIEL

Ou pa'n reponn mwan.

MR SPEAKER

Mersi. Vis-Prezidan wi mon remarke ou pa'n reponn, si ou deside pour pa reponn nou ava aksepte sa, me silvouple adres klarifikasyon Onorab Lemiel.

**THE VICE-PRESIDENT
AHMED AFIF**

Mersi bokou Mr Speaker. Mr Speaker mon'n reponn ki Prezidan e Lafors e Sef Lafors Defans i pare pour zwenn avek zot, zot a diskite, zot a konsidere e zot a tonm lo en konklizyon.

MR SPEAKER

Mersi.

**THE VICE-PRESIDENT
AHMED AFIF**

Mwan mon pa le fer sa desizyon la. Mersi bokou.

MR SPEAKER

Mersi Vis-Prezidan. Kestyon Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Vis-Prezidan, bonzour tou dimoun. Bonzour tou dimoun, zabitan Port Glaud ki dan Galeri e bonzour madanm anler. Mr Speaker VP in antre sa - in anmenn sa eleman tes medikal. Nou konnen ki i annan bann tes medikal ki bezwen ganny fer avek en, okenn *recruit* ki antre dan Lafors Defans.

So eski VP i kapab dir nou Lasanble, manm piblik ozordi ki pe ekout nou, si tou bann tes medikal ti ganny fer avek sa

zenn *recruit* avan ki i ti antre? E la mon pe antre spesifik lo en tes *echocardiography*, sa ki nou apel *ECG* e osi en *stress test* - bann tes neserer anvi ki bann legzersis ki zot bezwen fer fizik dan Larme, eski sa bann tes ti ganny fer? E si wi, akoz Mr Speaker ki ozordi nou pa kapab delivre sa rapor avek lafanmir? Ki annan pour nou kasyet Mr Speaker. Mersi.

MR SPEAKER

Mersi. Mon a rapel bann Manm ki nou pa kapab antre dan konteni bann rapor. Vis-Prezidan, mon a envit ou adres kestyon Onorab Cosgrow.

**THE VICE-PRESIDENT
AHMED AFIF**

Mersi bokou Mr Speaker. Mr Speaker parey mon ti eksplike dan bann tel lensidan, i annan en *Board of Enquiry* ki ganny etabli, zisteman pour egzamin tou bann sironstans otour sa lensidan e enn zot manda normalman se pour analiz tou sa ki'n arive zis avan sa lensidan, ki enkli bann aktivite imedyatman avan sa lensidan; bann ki en pe pli avan, par egzanz bann tes medikal, e answit osi fer rekomandasyon lo kwa petet ki kapab en mankman zeneral, oubyen en mankman spesifik, oubyen si ti

annan okenn keksoz ki pa ti annord avek prosedir e answit fer bann rekomandasyon lo kwa ki militer i devret fer pour zisteman evit bann risk ki ti annan.

Mon pa pour antre dan bann rapor li menm, mon pa krwar sa i landrwa pour nou fer sa parske kestyon ti pe demande, “eski nou'n refize donn rapor?” I pa lo rapor li menm.

Alor mwan sa ki mon pe dir se ki tousala, tou sa bann size, i kapab en size ki ava ganny diskite ansanm avek lafanmir pour zisteman, pour - anfen pour ed zot, pour osi li, li menm *SDF*, i a, i ava etabli si i annan keksoz ki zot kapab fer de plis pour anpese ki bann risk pour en tel repetisyon arive a lavenir.

So mon pa kapab al dan detay militer lo ki fason tes i ganny fer? Si *ECG* i ganny fer? Ki detay? Mon pa eksper ladan. Me selman mon kapab asir Onorab ki sa rapor i fer serten rekomandasyon, lo ki mannyer nou kapab a lavenir fer ki nou redwir bann risk, bann tel lensidan arive. Mersi bokou Mr Speaker.

MR SPEAKER

Bann Manm zot a realize poudir mon annan en kantite Manm

ki'n lev lanmen pour kestyon. E mon le donn otan Manm ki posib. So kestyon ki'n ganny reponn i bezwen ganny aksepte koman repons.

Mon - kestyon ki'n ganny reponn i bezwen ganny aksepte koman repons, mon pour pran klarifikasyon Onorab Cosgrow. Selman mon pe averti bann Manm ki -(Onorab ou les mwan koze silvouple letan mon pe koze)

Mon pour pran pwen klarifikasyon Onorab Cosgrow, selman mon averti bann Manm nou bezwen *careful* lo klarifikasyon pour nou pa pran tro bokou letan. Onorab Cosgrow met ou pwen silvouple.

HON WALLACE COSGROW

Wi Mr Speaker klarifikasyon Mr Speaker. *VP* in fer bokou letour avek mwan. Mon kestyon i senp. Eski sa bann tes ti ganny fer? *VP* wi ouswa non? *ECG*, *stress test* se tou i senp. Zis dir mwan si sa de tes ti ganny fer? Mersi.

MR SPEAKER

Mersi. *VP* si ou dan en pozisyon pour reponn. Silvouple.

THE VICE-PRESIDENT AHMED AFIF

Mersi bokou Mr Speaker. Mr Speaker otan ki mon konnen en

medical test ti'n ganny fer. Kwa ki fer dan *medical test*, mon pa kapab, mon napa sa lenformasyon la ozordi.

MR SPEAKER

Mersi. Onorab. Onorab annou gard lord silvouple. Onorab Herminie ou kestyon.

HON WILBERT HERMINIE

Mersi Mr Speaker. Bonzour Mr Speaker, *VP* ek ou delegasyon bann koleg Onorab, e tou dimoun ki dan Galeri.

Mr Speaker vi ki sa bann tes dan *training* militer la i en sitan entans e osi fizik. Eski ti annan en lanbilans *on site* ler sa bann *training* pe ganny fer? Mersi.

MR SPEAKER

Mon enn pti pe - mon enn pti pe an dout lo la porte sa kestyon, selman mon pour les *VP*. *VP*?

THE VICE-PRESIDENT AHMED AFIF

Mersi bokou Mr Speaker. Mr Speaker mon pe lir kestyon orizinal. Eski nou'n refize donn en rapor? I pa lo detay en rapor e parey mon'n dir nou, e *SDF* i pare pour zwenn ek lafanmir. I pare a pli o nivo, Komandan an Sef pour koz avek lafanmir, pour partaz tou lenformasyon ki nou annan.

Sa ki mon konnen se ki *SDF* in fer tou sa ki li i kapab, menm avan, in swiv tou son bann prosedir normal. Chad ti ganny deklare *medically fit*; Chad in ganny en maler dan son premye *training* Lendi le 27 Mars, toudswit i ti ganny anmennen lopital otan ki mon konnen.

Me mon pa la pour mwan koz lo tou bann detay sa rapor me - sa parey mon'n dir nou pare pour zwenn avek lafanmir, nou pare pour donn zot tou lenformasyon e lasistans neserer. Mersi bokou Mr Speaker.

MR SPEAKER

Mersi, mon pa krwar bann pwen klarifikasyon pe avans nou. Mon pour prosede avek kestyon lezot Manm. Onorab Aglae ou kestyon.

HON EGBERT AGLAE

Mersi Mr Speaker. Bonzour zabitan Port Glaud ki dan Galeri e tou dimoun a lekout. Minis, *VP* nou ti pas Lalwa *Access to Information* sizyenm Lasanble e ou ti form par sa. E baze lo sa anvi ki en endividi i kapab ekrir Lotorite konsernen, pour li ganny akse avek lenformasyon, ki dan Lalwa i dir pour kapab avek permisyon.

So baze lo sa san ki ou donn mwan detay okenn bout sekirite dan sa rapor, eski sa fanmir, sa bout medikal, parey Minister Lasante si ou anvi en rapor medikal lo ou personnelman i fer ou pey 350 sepa R450 pour ou ganny sa rapor, eski sa fanmir i kapab ganny sa bout rapor medikal pour li kapab, si i annan okenn rekour ki i bezwen al rode?

Dezyenmman, eski bann *recruit is subject* pour zot ler zot pe komanse pour ganny en *medical insurance*? Mersi.

MR SPEAKER

VP ou repons.

**THE VICE-PRESIDENT
AHMED AFIF**

Mersi bokou Mr Speaker. Mr Speaker Onorab i korek dan son *assessment* ki nou annan en *Access to Information Act* e okenn lenformasyon ki okenn antite i annan, lo endividi ki rezonnab pour li demande, ki pa kont okenn provizyon dan sa Lalwa, i devret ganny devwale.

E an ka i pa ganny devwale i annan serten lezot rekour dan Lalwa. E alor mon krwar lafanmir i annan tou drwa, anba sa Lalwa, *Access to Information* pour fer okenn demann, pour okenn lenformasyon enkli

lenformasyon medikal. Parski finalman lenformasyon medikal konsernan zot zanfan, e zot fanmir, zot annan tou sa drwa.

Eski i annan okenn lasirans, ki annan pour bann manm, bann manm lafors e mon repete poudir Chad ti ankor en *recruit* i pa ti ankor sermante. Mon napa sa lenformasyon la, me selman mon kapab demann avek ou permisyon Mr Speaker si *CDF* i annan sa lenformasyon i a partaz avek Lasanble. Mersi bokou Mr Speaker.

MR SPEAKER

Mersi. Wi nou a pas kestyon pour *Brigadier*.

**BRIGADIER MICHAEL
ROSETTE**

Bonzour Mr Speaker. Bonzour *Leader* Lopoziyon, *Leader Government Business* tou bann Manm Onorab, bann zabitan Port Glaud e osi Mrs Maryse Payet. Bonzour a zot tou.

Mr Speaker mon krwar premye bout kestyon VP in fini reponn. An sa ki konsern pour lasirans, la pour lemoman *SDF* non nou napa en lasirans pour bann *recruit*, pour lemoman anvi natir travay, bann lasirans pa pe kouver nou pour lemoman lo la. Mersi.

MR SPEAKER

Mersi. Onorab Uranie ou kestyon.

HON ROCKY URANIE

Mersi-mersi Mr Speaker. Bonzour VP avek ou delegasyon. Bonzour tou bann zabitan Port Glaud ki dan Galeri e bonzour spesyal pour paran Chad. VP nou pa pe dir ou fer sa rapor vin piblik, me ki nou anvi se ki ou donn sa fanmir sa rapor, san ki *LOTO* ti bezwen anmenn en *PNQ*.

Mwan mon apre mon lot sa se ki vi ki ou'n dir ki Chad zenn Chad ti'n fer tou son tes, i ti'n pas tou son tes, eski ou pe met - eski sa rapor pe met dout lo lafason ki tes in ganny fer e bann lekipman ki'n ganny servi pour fer sa tes? Mersi.

MR SPEAKER

Mersi. Mon pa krwar poudir sa i en kestyon ki VP i kapab reponn. Me selman mon pour permet li adrese.

THE VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker parey mon'n dir, lafanmir zot annan akse ek Lalwa, zot annan drwa anba tou Lalwa sirtou *Access to Information*. Mon kapab konfirm avek ou ki ofisyelman

nou napa en let, en demann ofisyel pour ganny okenn lenformasyon spesifik. Me si lafanmir i met en demann ofisyel i pour ganny trete selon Lalwa.

E mwan parey mon'n dir, nou pare pour zwenn ek lafanmir, nou pare o pli o nivo *SDF* pour zwenn avek zot e formaliz okenn demann ki zot annan. Napa nanryen pour kasyet, nou napa nanryen pour nou sey fer ditor personn.

Annefe nou sagrinen en kantite par sa lensidan. Nou sagrinen parske i ti en zanfani ki *fit*, tou dimoun ti vwar li fit. E ler i ti vin fer son medikal zot ti vwar li fit, for, kapab, determinen pour li travay.

I ti anvi e byensir - aksidan maler pa averti parfwa. I arive dan plizyer lenstans kot personn pa swete, kot enn ler ou vwar en zenn foutboler pe zwe, i tonbe lo laplenn, en tel lensidan ti'n kapab arive dan nenport ki lezot sirkonstans dan *training*, prive pour li ti'n kapab arive, nou pa zanmen konnen. Bann eksper medikal i ava al plis an detay pour zot konnen egzaktman kwa ki ti arive.

Me selman avan sa i ti en zanfani ki ti fit, i ti en zanfani disiplin, e ler i ti vin kot militer zot ti get son gabari zot

ti vwar li vreman kapab, i zwenn tou kriter pour zwenn militer. E sa pour sa rezon, mon dir ti vreman, vreman tousan e rasker ler sa lensidan ti arive.

MR SPEAKER

Mersi VP. Onorab Loze ou kestyon.

HON JOHAN LOZE

Mersi Mr Speaker. Mr Speaker mon'n note ki letan ou'n komanse ou'n dir malerezman bokou Manm in lev lanmen pour demann kestyon.

Mr Speaker anba Konstitisyon Sesel tou Seselwa i annan menm drwa, menm rekour, devan Lalwa. kestyon ki leve la se ki mannyer eski lafanmir Chad, i egzers zot drwa i ganny akse avek rekour devan Lalwa san sa dokiman ofisyel dan zot lanmen?

Akoz mon koman en Manm Lopoziyon dan Lasanble mon vwar en *pattern* pe devlope. Nou demann Kontra *Travizory* i donn nou an kasyet dan Biro Speaker. Lafanmir i demann akse avek rapor ki'n ganny fer lo en lensidan trazik avek zot zanfan, zot ganny envite pour fer en diskisyon deryer rido ankor.

So kan eski nou pour bouz dan kler avek bann keksoz ki

tous, bann fanmir Seselwa direkteman? Mersi Mr Speaker.

MR SPEAKER

Mersi VP?

THE VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, napa nanryen otour sa lensidan ki nou anvi fer an kasyet. Mon krwar akoz nou annan respe, akoz nou annan en savwar fer, nou krwar ki en lensidan konsernan en zanfan, mon apel li zanfan akoz demen i son laniverser i ti pour ganny 19an.

E mon pa krwar dan bann tel sirkonstans, en fanmir i anvi diskrit bann detay oplenner. Nou, nou anvi respe lafanmir. Nou anvi montre zot poudir nou anvi ed zot vir sa paz. Nou anvi zot konn tou laverite. Nou anvi zot konn tou sa ki annan pour konnen avek zot sa lensidan ki ti arive.

E se pour sa rezon ki nou anvi fer li avek zot. Swivan Lalwa e tou provizyon proteksyon ki annan pour li, nanryen mwens, nanryen plis ki sa. Nou en pei ki *rule of law* e nou pour respe tou sa rekomandasyon ki annan. Mersi.

MR SPEAKER

Mersi. Mersi Vis-Prezidan. In dir *point of order* Onorab Loze? Mon pa anvi enteronp sa kestyon pour *point of order*. Alor mon pour demand ou zis *state* ou *point*, ou *order* ou *point of order* briyevman, vitman e pa fer en *speech* silvouple.

HON JOHAN LOZE

Tre bref Mr Speaker. Anba *Order* 8 lafason ki ou gouvèrn *decorum* Lasanble Nasyonan mon le koriz en mizapreansyon ki Vis-Prezidan in kree letan in dir koumsa, zot pa oule diskrit oplenner. Dan mon kestyon in napa okenn sizesyon diskrit oplenner...

Se senpleman lev rapor, donn direktman avek lafanmir, dan plas al anmyel zot deryer rido. Donn zot rapor, ki en keksoz kler ki zot kapab servi, pour bouz devan avek sa ki zot, zot bezwen fer. Mersi Mr Speaker.

MR SPEAKER

Mersi. Vis-Prezidan in ekout ou demann, nou a pas lo lot kestyon. Onorab Gabriel.

HON CONRAD GABRIEL

Mersi Mr Speaker. *Welcome* tou dimoun Port Glaud dan Galeri. Mon *welcome* manman Chad. Mersi. *VP* nou tou nou pour dakor ki ekspektasyon se ki

solda i la pour defann nou. Eski *VP* i kapab dir nou Lasanble, lekel ki defann lentere sa bann solda e osi byen zot fanmir?

E dezyenman, vitman *VP* ki mannyer sa bann paran pour ganny rekour legal si zot pa oule partaz sa lenformasyon? Mon krwar anba Konstitisyon i zot drwa pour ganny akse ek lenformasyon. Mersi.

MR SPEAKER

Mersi. Kestyon pe vin repetitif Onorab. *VP* mon konnen ou'n adres sa pwen deza. Premye, premye pwen i pa en kestyon, dezyenm pwen si ou zis kapab donn - met env lanfaz, mon pa - mon ti a kontan bouze pour al lo lezot kestyon.

THE VICE-PRESIDENT AHMED AFIF

Mersi bokou Mr Speaker. Mersi Onorab. Lo dezyenm kestyon ki proteksyon i annan pour lafanmir? Se Lalwa, Akse ek Lenformasyon, i annan en demann ki ganny fer e parey mon'n dir i annan en proses ki'n komanse sa mwan, kot lafanmir in fer en demann zot in vwar sa rapor, zot in vwar tou son detay.

Prezan si i annan en kestyon kot zot anvi en kopi sa rapor, ki normalman parey mon

dir dan zot Polisi, en dokiman entern, me i annan Lalwa osi Akse ek Lenformasyon. E si nou ganny en demann ofisyel, sa i a ganny konsidere.

E parey mon'n dir, pour – dan kad pour fer sa prosis vin pli fasil *SDF* i pare, pour met son zofisye pli o ki Sef Lafors Defans e Komandan an Sef pour zwenn lafanmir, pour zot zisteman koz avek zot pa neserman zis lo la, me tou lezot keksoz otour sa, pour donn zot sa rekonfor, pour donn zot sa sipor e pour asir zot, ki nou pour akonpanyi zot dan sa semen difisil ki malerezman zot in trouv zot ladan. Mersi bokou Mr Speaker.

MR SPEAKER

Mersi. Onorab Woodcock ou kestyon.

HON WAVEL WOODCOCK

Mersi Mr Speaker. Mon pour komanse par senpatiz avek lafanmir. Mon senser kondoleans. *VP* i annan bokou solda, ki'n perdi zot lavi anba ladministrasyon Gouvernman lepase, menm dan bann sirkonstans drol. I annan ki, ki nou pa'n zanmen vwar lekor parey Assumption e paran pa ti ganny lenformasyon lo lanmor sa bann solda.

Mon kestyon se, eski *VP* ou pe donn en garanti sa Lasanble ki Polisi Larme anba nou ladministrasyon *going forward*, okenn solda ki perdi zot lavi dan bann sirkonstans trazik parey, paran pour ganny akse avek lenformasyon aköz dan lepase ti annan bokou *coverup* e bokou keksoz ti kasyet? Mersi.

MR SPEAKER

Mersi. *VP* ou repons?

THE VICE-PRESIDENT AHMED AFIF

Mersi bokou Mr Speaker. Mersi Onorab. Wi, Onorab mon pour konfirm avek ou ki sa ki nou pe swiv, i egzaktaman sa ki ti ganny pratike par Gouvernman ansyen. Mersi bokou.

MR SPEAKER

Mersi. Onorab Vidot ou kestyon?

HON AUDREY VIDOT

Mersi Mr Speaker. Vis-Prezidan ou dernyen larepons i vremen enteresan. Ou Gouvernman in ganny elekte pour fer pli byen, ki Gouvernman avan, ou pa sipoze kontiny lo pratik ki swadizan pa ti bon.

Alors mon kestyon, Vis-Prezidan si ozordi en *PNQ* in vin dan Lasanble Nasyonal, atraver

sa keſtyon se ki nou anvi ed fanmir ganny en *closure*. Fanmir ti pour ganny *closure* Mr Speaker si ler i ti vin kot *SDF* pour li kapab ganny otan lenformasyon e kopi lenformasyon ki pour ed li ganny sa *closure*, i ti pou'n arive alors Vis-Prezidan.

Si ou pe dir avek nou poudir zot in konsilte avek fanmir, akoz ki zot pa ti dir ek fanmir pour zot ganny en kopi rapor, zot bezwen met li an ekri, oubyen ki formalite zot bezwen fer? E sa i merit aplike pa zis pour sa fanmir ki'n vin devan ou *VP*, i merit osi pour lezot okenn lensidan ki kapab arive parey nou dir, maler pa averti, okenn lensidan ki kapab arive omwen fanmir i a konnen, ki prosedir, ki i kapab fer pour li ganny *closure* pour bann tel sirkonstans.

E la mon pe mazin sa zenn garson Justin Malcouzane Beau Vallon, mon asire son fanmir osi atraver prosedir si i ti ganny byen enformen i ti ava konnen. Mersi Mr Speaker.

MR SPEAKER

Silvouple nou a reste lo keſtyon. *VP* ou annan en repons?

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab, sa ki nou pe swiv se en prosedir entern *SDF*. I annan Lalwa ki depi sa letan, ki'n ganny entrodwir, i annan lankadreman legal ki'n evolue. E ozordi avek *access to information*, i permet fanmir pour zot ganny akse ek serten lenformasyon.

I annan keksoz ki nouvo ki arive e parey ou dir, nou, nou la pour fer sa ki meyer. Me si i annan en pratik, ki ki'n egziste pa neserman move, nou adopte li, kot nou kapab amelyor li, nou fer li. Dan sa sirkonstans nou vwar ki i nou devwar, pour nou zwenn sa fanmir, pour nou zwenn zot demann.

Me i annan en lankadreman ki sa i ganny fer e si en demann ofisyel i ganny fer byensir e nou anvi fer li pa zis dan laform en demann en let, nou anvi zwenn avek zot pour nou ofer sa an plis ki sa ki zot pe demande, pour donn zot okenn rekonfor ki nou bezwen.

Mon krwar sa i nou devwar, i nou responsabilite e sa bonnfwa avek ki nou anvi apros sa size. Kot i konsern lezot fanmir be Lalwa i kler, Lalwa i kler ozordi nou pa'n zanmen anpes person, nou pa'n zanmen kasyet zot drwa, tou dimoun i konn son drwa,

tou dimoun i annan drwa annan akse ek lenformasyon anba serten sikonstans ki Lalwa i prevwar. E byensir, *SDF* pour swiv Lalwa.

Mersi bokou Mr Speaker.

MR SPEAKER

Mersi. Onorab Georges ou kestyon? Onorab Georges. Onorab Georges ou kestyon.

HON BERNARD GEORGES

Mersi. Mersi Mr..

HON AUDREY VIDOT

(Off-Mic)

MR SPEAKER

Onorab! Onorab Vidot. Mon pa'n donn ou laparol. Mon pa'n donn ou laparol. Silvouple. Onorab Georges ou kestyon.

HON BERNARD GEORGES

Mersi Mr Speaker. Mr Speaker mon le *welcome* dan Lasanble Nasyonal *VP* avek son delegasyon, bann zabitan Port Glaud ki avek nou la ozordi e osi Mrs Payet ki son garson i size sa kestyon bomaten.

Mr Speaker, avan ki mon demann mon kestyon mon ti a kontan prezant kondoleans lo lapar nou *Caucus*, avek Mrs Payet, me osi avek tou bann lezot manman ek papa, frer ek ser zanfan ki'n perdi zot pros

dan - ki ti dan *SPDF* depi 5 Zen 1977. E la mon fer en parantez pour demande dan sa bann lezot ka, eski rapor ti ganny donnen avek lafanmir?

Mon kestyon Mr Speaker, i en kestyon tre senp e mon krwar se sa kestyon ki devan nou ozordi. *VP* eski Gouvernman ek *SDF* pe kasyet okenn keksoz dan sa lensidan trazik ki lanmor Chad? Mersi.

MR SPEAKER

Mersi Onorab. *VP* ou repons.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab mon konfirm avek ou, ki *SDF* pa pe kasyet okenn lenformasyon aköz tou sa ki dan sa rapor ofisyel fanmir in ganny akse, enkli bann rikord medikal. Mersi bokou.

MR SPEAKER

Mersi. Onorab Pillay ou kestyon siplemanter silvouple.

HON SEBASTIEN PILLAY

Mersi Mr Speaker e mersi pour tou bann Manm ki'n demann kestyon pour sey klersi sa size, pa zis pour Chad me osi pour lezot, i annan lezot *recruit* ki zot paran in sey rod lenformasyon, in pas atraver menm kalite sityasyon Mr Speaker e mon'n

fer mon resers avan mon'n vin demann sa kestyon.

I annan en *young* - en zenn *recruit* ki Onorab Vidot in demande e i ti menm zafer. Ale vini pour ganny rapor fanmir vini. So kestyon i koumsa Mr Speaker. *VP* in mansyonn proteksyon anba Lalwa, ki sa fanmir i annan pour zot rod sa lenformasyon. Sa fanmir in ale kot *SPDF*, in ale kot *SPDF*.

Si sa fanmir ti'n al kot *SPDF* e zot ti satisfè ek larepons ki zot in gannyen, pa ti pour la. Me prezan sa ki enteresan lavey ki mon pe anvoy en *PNQ* tou dimoun pe telefonn sa fanmir. Lavey ki mon pe anvoy en *PNQ* tou dimoun pe telefonn sa fanmir. E ozordi bomaten nou ganny dir la zot tou zot pare pour zot zwenn ek sa fanmir.

Be akoz zot pa ti pare pour fer menm prosedir ler sa fanmir ti zwenn zot? Kwa, mon premye kestyon ki ti pe anpes zot pour fer menm prosedir ler zot ti zwenn sa fanmir pour premye fwa?

Mon dezyenm kestyon. Ou pe koz lo *medical test*. Ou ki'n entrodwir *medical test*. Me si ou'n entrodwir *medical test* e ou vin donn nou larepons devan Lasanble, ou bezwen konnen kwa ki annan dan sa *medical test*.

E kestyon ki'n ganny demann ou se eski parmi bann *medical test* ki zot in fer ek sa bann solda si ti annan en *ECG*? Ou pa kapab dir nou, me si i dan rapor, personn pa pour konnen e lefe ki lafanmir i pa kapab ganny en kopi sa rapor, personn pa pour konnen.

So eski ti annan en *ECG* ki ti ganny fer avek sa zenn solda? Prezan kestyon pli pertinan Mr Speaker ki nou bezwen klarifye. E nou pa pe fer sa zis pour Chad, nou pe fer sa pour tou lezot *recruit*, pour ki zot paran demen si i ariv en aksidan zot i ava annan en rekour.

Akoz i pa bezwen ki kestyon i vin devan Lasanble ki apre tou dimoun depi *CDF* depi Prezidan, depi Vis-Prezidan pour *call* sa fanmir, pour al sey koz ek sa fanmir kan zot tou zot ti'n kapab fer sa, avan sa kestyon i vin devan Lasanble. Sa ki ti'n devret ganny fer.

E pour nou vin entrodwir 5 Zen 1977 dan kestyon ki konsern en size ki'n arive la ozordi i ensanse Mr Speaker! So kestyon pour nou klarifye *ok*. Sa manman in vin an personn kot zot, sa fanmir in vin an personn kot zot, in demann zot lo rekomandasyon ki sorti dan sa rapor. Zot pa'n *share* sa avek sa fanmir, zot pa'n donn sa fanmir.

E VP i konfirman ki i pa konnen ki diskisyon ki'n ganny fer ek sa fanmir, selman i dir nou poudir tou keksoz in ganny diskite ek sa fanmir. Be pa i pe *mislead* Lasanble ler i fer sa?

So kestyon i senp, si napa nanryen pour kasyet dan sa rapor akoz ou pa kapab donn sa fanmir en kopi sa rapor e *avoid* ki sa fanmir i pas dan menm sityasyon ki dan ka Justine, ki menm parey ankor fanmir in demann lenformasyon zot in promet pour donn lenformasyon e zot pa'n donnen.

Kwa ki annan dan sa rapor ki ou pa kapab donn sa fanmir? Mersi Mr Speaker. Si VP i kapab reponn sa pour mwan?

MR SPEAKER

Nou a permet VP reponn. Mon krwar i annan trwa kestyon la VP?

THE VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker mon bezwen koriz serten keksoz ki'n ganny dir. Enn sete nou ki ti entrodwir *medical test*. I pa korek Onorab. Sa *medical test*...

(Interruption)

MR SPEAKER

Onorab! Silvouple, ou'n poz ou kestyon, ou'n poz ou kestyon! Permet VP reponn. VP silvouple.

THE VICE-PRESIDENT AHMED AFIF

Mr Speaker mon pa'n zanmen vin dir poudir premye fwa se nou ki'n entrodwir *medical test* dan SDF. Sa i en keksoz ki'n egziste...

(Interruption)

MR SPEAKER

Order!

THE VICE-PRESIDENT AHMED AFIF

Mon pa krwar personn in ganny sa lenpresyon, me i petet Onorab in pran en labitid pour pran serten parol *twist* li e fer li vin en lot keksoz. Mon pa'n zanmen dir sa mwan. Ler Onorab....

(Interruption)

MR SPEAKER

Onorab! VP. VP donn mwan enn pti moman silvouple. Onorab nou le, nou lo en size sansib, i annan en kantite santiman ki enplike ladan, silvouple annou gard lord! Annou rod laverite,

annou rod repons nou kestyon si i *permissible*, me selman evite enteronp kestyon e repons. *VP* silvouple si ou kapab kontinyen.

THE VICE-PRESIDENT AHMED AFIF

Mersi bokou Mr Speaker. En lot keksoz ki pour mwan i pa korek ler ou dir mwan mon'n dir bomaten tou keksoz ti ganny diskite ek lafanmir. Sa ki mon ti dir, se tou lenformasyon ki dan rapor ti ganny donnen avek lafanmir. Se sa ki mon'n dir.

Si i annan keksoz an plis ki lafanmir i bezwen, par egzant sa ki kler zot anvi en kopi sa rapor sa demann a ganny fer e i a ganny fer selon Lalwa. E nou, nou pour donn zot, nou pour akord zot pli o nivo akse pour zot diskite, fer sa demann, e nou pour swiv Lalwa Onorab.

Nou napa nanryen pour kasyet. *SDF* napa nanryen pour kasyet o kontrer nou anvi ed sa fanmir. Eski dan tes medikal, normalman zot fer *ECG* eski i ganny fer ladan? Sa ki mwan mon'n konpran mon'n demann *CDF* e petet i kapab konfirman - se ki i annan de lenstans, baze lo sironstans kot zot fer avek bann *recruit*.

Mon pa konnen ki dan sa ka spesifik in ganny fer, me

selman i annan de lenstans kot zot fer. Bann eksper medikal i ava dir egzaktman kwa an plis ki en *ECG* ki petet i devret ganny fer.

Parske par toultan ki sa ki mwan mon'n konpran ki en *ECG* i kapab demontre okenn defayans dan en *organ* en dimoun; pa toultan ki pour montre menm ki ou fer.

E alor se pour kwa en *enquiry* i ganny etabli pour zot fer bann rekomandasyon. Me nou sa ki nou pe dir, nou pare pour zwenn ek lafanmir. Nou pare pour nou zwenn okenn demann ki rezonnab, selon Lalwa, ki nou kapab fer pour nou ed zot dan sa moman difisil.

Alor nou napa nanryen pour kasyet. Mon krwar semen i devan nou, i kler me semen pour sa fanmir pour reste difisil. E mwan mon partaz sa douler ki zot annan ozordi. Mersi Mr Speaker.

MR SPEAKER

Mersi. Onorab Pillay mon a permet ou akoz ou loter kestyon, pour poz klarifikasyon. Me nou lo klarifikasyon silvouple, nou - pour nou terminen.

HON SEBASTIEN PILLAY

Mersi Mr Speaker. Mersi pour donn mwan loportinite pour sa klarifikasyon. Mr Speaker si Vis-Prezidan ti'n ekout son larepons ki pe donner kot mon pe asize la, i ti pour realize ankore enn fwa, ki la son larepons sanze.

Dan mon kestyon mon'n dir li dan son larepons in entrodwir sa size *medical test*. E kestyon spesifik sete si i annan en *ECG* ki ganny fer avek sa bann zenn *recruit*?

En *ECG* pour sov lavi ankore *recruit* sa, si i ganny fer. Se sa, enn bann keksoz ki pe arive ozordi. La i vire i dir nou, i pa konnen si in ganny fer dan sa ka spesifik. Be si ou pa konnen si in ganny fer dan sa ka spesifik ki mannyer ou konnen tou lenformasyon ki dan rapor in ganny diskite ek sa fanmir?

Ou pa kapab konn - pa konn la, me konnen kwa ki'n pase dan en *meeting* ki ou pa la!

Mon pa pe *twist* keksoz mwan, so mon kestyon pour Vis-Prezidan Mr Speaker pa mwan ki pe *twist* keksoz, mwan ki mon oule mon le Gouvernman i vin kler, e i vin drwat e i dir ki pe arive. Si nou pe koz dan lepase, koz dan lepase me la ozordi nou la anndan.

So sa ki nou bezwen fer se nou bezwen rod en *closure*, en finalite. Mr Speaker eski, eski Vis-Prezidan e Gouvernman atraver Lafors Defans, pour pare pour donn sa fanmir en kopi sa rapor ki a permet zot ganny tou sa bann lenformasyon ki'n ganny idantifye dan sa rapor?

E akoz Mr Speaker, akoz ki ozordi nou annan de zofisye *senior* Lafors Defans ki'n *involve* avek sa sityasyon? Mwan mon ti lopital, *Lieutenant Colonel* ti lopital sa zour, mon konn sa garson personelman tre byen, *ok*? Mon ti la sa zour e mon ti dir li mwan. So, (be ki ou pe ankoler ou? Ki ou problem ou?) Be ou Speaker ou?

(Interruption)

MR SPEAKER

Ale Onorab. Onorab!

HON SEBASTIEN PILLAY

Ki ou problem ou. Ou pa la pour donn mwan lord ou! Ou pa la pour donn mwan lord ou! *Ok*? Ou, ou *Leader* Zafer Gouvernman, reste zis dan zafer Gouvernman. La Speaker la anler!

(Interruption)

MR SPEAKER

Onorab! Onorab! Onorab!
Onorab! Zot konportman i
deplorab.

HON SEBASTIEN PILLAY

Be li ki deplorab!

MR SPEAKER

Onorab! Onorab! Kestyon ki ou
pe demande in ganny reponn
plizyer fwa par Vis-Prezidan.
Mon pour termin ou la.

HON SEBASTIEN PILLAY

Mr Speaker in refize reponn. In
refize reponn.

MR SPEAKER

Onorab! Silvouple ekout mwan.

HON SEBASTIEN PILLAY

Mon pe ekout ou mwan.

MR SPEAKER

VP. *VP* in reponn kestyon dapre
reponn ki i pour donner. *VP*
mon pour donn ou la dernyen
parol pour ou kapab konfirman
ki ou'n reponn kestyon e nou
pour termin la silvouple. Mersi.
Vis-Prezidan.

**THE VICE-PRESIDENT
AHMED AFIF**

Mersi bokou. Mersi bokou Mr
Speaker. Mr Speaker mon pa
konnen ki langaz mon devret
koze si an Angle. Nou pare pour
zwenn avek lafanmir. Nou pour

swiv Lalwa e sa ki relevan
ozordi lala, Lalwa se *Access to
Information*. Nou napa en
demann ofisyel pour ganny en
rapor.

E nou pour fer tou sa ki -
sa ki neser ler nou zwenn zot,
ler nou konn zot demann
egzakt, nou pour swiv tou
prosedir pour nou ed zot konn
tou lenformasyon e swiv Lalwa
Access to Information.

Mon le repete ki sa
lafanmir ti ganny san vwar sa
rapor konplet. Zot ti pas
2erdtan kot *SDF* le 16 Zen.
Anba Akse ek Lenformasyon si i
annan non lezot dimoun ki
enplike dan en tel rapor, ou
bezwen ganny permisyon osi sa
bann dimoun pour devwal
okenn keksoz dan en rapor.

Tousala i bezwen ganny
swiv. E nou, nou pare pour nou
swiv sa prosedir. Alor wi nou
pare pour zwenn zot, wi nou
pare pour zwenn zot demann,
ler en demann ofisyel i ganny
fer e nou pare pour osi marye sa
avek demann *SPDF*.

Nou napa nanryen pour
kasyet Onorab. Alor mon envit
lafanmir, ankor enn fwa mon
pas zot mon senser kondoleans
lo sa ki'n arive, nou anvi ed zot,
sirmont sa difikilte, nou pour
fer tou dan nou dispozisyon
pour fer sir zot ganny tou
lenformasyon e zwenn tou zot

demann, ki zot met avek Gouvernman. Mersi bokou Mr Speaker.

MR SPEAKER

Mersi nou a termin la pour sa kestyon. VP avek ou delegasyon mon remersye zot pour zot partisipasyon e mon swet zot bonn kontinyasyon. Mersi.

(THE VICE PRESIDENT AND HIS DELEGATION WERE EXCUSED FROM THE HOUSE)

MR SPEAKER

Bon mersi mon vreman regrete bann lokazyon kot Lasanble kot Lasanble in ganny deranze par bann komanter oubyen bann kriye. Vreman mon krwar poudir i annan en mank respe pour standar sa Lasanble. Onorab Pillay ki pwen ou bezwen fer?

HON SEBASTIEN PILLAY

Mr Speaker mon pe *raise* en *matter of privilege*.

MR SPEAKER

Wi?

HON SEBASTIEN PILLAY

Dan Lasanble i annan zis en Speaker.

MR SPEAKER

Wi.

HON SEBASTIEN PILLAY

I annan zis ou. *Ok*. Ler ou, ou dir mwan arete mon arete, ler ou anvi mon arete, ou tenny mon *micro* mon respekte. Napa en Speaker ki asiz la mon gos. Sa ki'n arive kot ou pe koz, kot ou'n fer komanter ki nou konportman i deplorab, mon krwar ou devret swiv byen sa ki'n arive. Akoz mon krwar i pa akseptab.

Mwan mon'n anmenn en kestyon dan Lasanble e devan piblik nou'n vwar ki Vis-Prezidan in dir apre mon kestyon ki'n vini, zot in deside kontakte sa fanmir.

Si mon'n akonplir en keksoz i byen...

MR SPEAKER

Bon.

HON SEBASTIEN PILLAY

Me selman...

MR SPEAKER

Nou'n fini.

HON SEBASTIEN PILLAY

Me selman...

MR SPEAKER

Nou'n fini ek kestyon.

HON SEBASTIEN PILLAY

Lalwa Lasanble. Lalwa
Lasanble in dir...

MR SPEAKER

Nou'n fini ek kestasyon. Mersi.

HON SEBASTIEN PILLAY

...ki se ou ki ansarz Lasanble
Mr Speaker. Annou ganny li
kler, mwan mon respekte ou
lotorite...

MR SPEAKER

Mersi.

HON SEBASTIEN PILLAY

...pa lotorite en lot dimoun.

MR SPEAKER

Non. *Ok* mon pa vwar ki annan
okenn *matter of privilege* ki'n
ganny afekte. I en pe
konportman ki arive ase souvan
e tro souvan dan Lasanble e
mon'n fer mon komanter lo la.
Mersi. Madanm raporter nou
ava apel lot Minis pour kestasyon.

Bon bonzour e byenveni
Minis Peggy Vidot Minis pour
Lasante e bann zofisye ki
akonpanyi ou. Dr Bernard
Valentin Sekreter Prensipal
pour Lasante e Dr Danny
Louange *CEO Health Care
Agency*. Zot isi pour pran
kestyon bann Manm lo travay
Minister Lasante. Mon komans
avek kestasyon 80. Onorab
Francois Adelaide.

HON FRANCOIS ADELAIDE

Mersi Mr Speaker. Bonzour
Minis avek ou delegasyon.
Bonzour tou Manm Lasanble
Nasyonal enkli bann personnaz
dan Galeri e tou dimoun a
lekout. Minis mon kestasyon pour
ou i al koumsa pour
lenformasyon piblik sa;

Eski Minis pour Lasante i
kapab donn detay Lasanble lo
konstriksyon nouvo sant
lasante Baie Lazare? Mersi.

MR SPEAKER

Mersi. Minis ou repons.

MINISTER PEGGY VIDOT

Mr Speaker, *Leader* Zafer
Gouvernman, *Leader*
Lopozisyon, Manm Lasanble
Nasyonal, telespektater,
bonzour.

Mr Speaker mon remersye
Onorab pour son kestasyon.
Parey nou tou nou okouran
sant lasante Baie Lazare in
deservi bann zabitan Baie
Lazare pour plizyer lannen.
Avek standar lasante ki evolue,
sanzman dan nou stratezi dan
lasante, e lenfrastruktir sant
lasante Baie Lazare, in vin en pe
vye, e pe kout nou en kantite
pour nou kapab mentenir li lo
en serten nivo.

Alor desizyon in ganny
pran pour nou batir en nouvo

sant, ki pour deservi tou zabitan Baie Lazare. R8.5 milyon in ganny bidzete pour sa lannen. Minister Lasante an kolaborasyon avek Lazans Lenfrastriktir in travay lo konsep sa proze e son *design*.

In annan plizyer diskisyon lo *design* ki pli apropiye pour sa kalite sant dan Baie Lazare.

An konsiltasyon avek ou menm ou Onorab, e bann dimoun dan Lazans Lenfrastriktir, Minister Lasante in deside pour konstrir en batiman en letaz, ki fer ki i pour posib a annan akse pour tou dimoun. Sa sant lasante pour ofer bann servis swivan:-

Konsiltasyon Dokter, konsiltasyon spesyalis, farmasi, landrwa pour annan en pe *emergency* pour fer lobzervasyon serten ka, i annan servis danter, an menm tan e *X-ray* pour dantis; i pour annan dimoun ki travay dan Lasante Piblik e i pour annan tou bann program ki nou ofer anba parasol program pour lafanmir ek zanf.

Mr Speaker, sa proze in fini ganny soumet pour laprouvasyon *Planning Authority*, avek gidans Lazans Lenfrastriktir. Apre ki tou preparasyon teknik i a konplet, nou ekspekte ki sa proze i ava ganny *tender* ver milye Out sa

lannen, afen ki kontrakter i a kapab bouz lo sit ver lafen Septanm 2023.

Mr Speaker, mon bezwen azoute ki sa - pour sa nouvo sant lasante i pour ganny konstrir lo menm sit ki servis sant lasante Baie Lazare i ete konmela. Pour permet sa arive, lazans pour bezwen deplas servis ki nou pe donner kot sa sant.

Alor plis detay nou a donner pli tar, ler nou pe al komans batir. Sa i pour permet demolisyon sa batiman aktyel e fer plas pour konstrisyon sa nouvo sant. Mersi Mr Speaker.

MR SPEAKER

Mersi Minis. Onorab Adelaide. Ou siplemanter?

HON FRANCOIS ADELAIDE

Mersi Minis pour ou larepons. Annefe mon vreman apresye poudir zabitan Baie Lazare in ganny preski tou detay, lo planifikasyon e komansman proze. Esperon ki nou ava *on time* e nou ava kapab delivre sa pour zabitan Baie Lazare.

Minis petet zis enn pti, enn pti komanter, enn pti leksplikasyon. Parey ou pe dir poudir klinik pour kraze, e tre prosennman nou ava konnen kote sa - nou pour rann sa servis. Me i annan en keksoz ki

bann zabitan i dir mwan met a ou latansyon. Nou annan sa servis danter, ki enn ki bokou dimoun i apresye.

So nou pa ti a kontan nou perdi sa, e petet si ou kapab donn lasirans bann zabitan Baie Lazare e sirtou bann dimoun osi ki servi sa fasilite. So konmsi donn zot sa lasirans ki petet i annan bann provizyon ki pe fer pour ki i ava annan sa servis danter, pour ki zot pa bezwen vwar zot pe deplase. Lo kote klinik mon konnen sa nou ava diskite me selman zis sa pti bout. Mersi Mr Speaker.

MR SPEAKER

Mersi. Mersi Onorab, Minis?

MINISTER PEGGY VIDOT

Mersi Onorab. An se moman la i pa pour fasil pour mwan fer sa lasirans ki servis danter pour kontinyen, letan ki nou pe *build* sa nouvo sant.

Me nou ava regarde si i annan posibilite, wi nou ava kapab fer li.

MR SPEAKER

Mersi Minis. Bon mon napa lot siplemanter, nou a prosed lo prosen kestyon. Kestyon 81, i lo menm size ki kestyon 87 alor nou pe propoze ki nou pran tou lede kestyon ansanm e Minis i a fer son larepons e apre mon a

permet siplemanter bann Manm endividuel. Onorab Labrosse kestyon 81.

HON RICHARD LABROSSE

Mersi Mr Speaker dabor avan mon konmanse mon a dir bonzour tou dimoun isi dan Lasanble Nasyonal, tou bann koleg Manm e osi bann zabitan Port Glaud e osi bann dimoun ki a lekout espesyalman bann zabitan sorti Plaisance. Mr Speaker kestyon 81 i al *comme* swivan: -

Eski Minis pour Lasante i kapab enform Lasanble ki plan fitir pour bann pasyan ki lo *methadone*? Mersi.

MR SPEAKER

Mersi. Kestyon 87 dan non Onorab Andy Labonte.

HON ANDY LABONTE

Mersi Mr Speaker. Bonzour Minis avek ou *panel*. Bonzour tou koleg Onorab, bonzour bann zabitan Port Glaud ki anler dan Galeri.

Mr Speaker vi ki kestyon i baze lo *DSAPTR*, so mon ti a kontan e nou osi pe selebre, nou pe komemor sa Lazournen San Drog ki ti yer, so mon ti a kontan dir sa bann dimoun ki pe travay kot *DSAPTR*, kontinyen sa bon travay ki zot

pe fer akòz nou konnen i pa travay sitan fasil.

So kestyon 87 i lir koumsa:-

An relasyon avek konstriksyon sant reabilitasyon pou bann adikt, eski Minis i kapab enform Lasanble si i annan okenn teren ki'n ganny idantifye, e si wi, kote sa sant pou ganny sitye? Mersi Minis.

MR SPEAKER

Mersi. Minis ou a prosede avek ou - avek ou repons silvouple.

MINISTER PEGGY VIDOT

Mersi Mr Speaker. Mersi Onorab. Mr Speaker, mon ti a kontan profit sa lokazyon, anvi ki yer le 26 Zen, ti Lazournen Enternasyonal Kont Labi Drog ek Trafik Ilegal e Onorab Labonte i fek fer en komanter ankor pour remersi sa bann travayer divizyon kot nou travay avek sibstans.

Mon ti a kontan remersi li pour sa e pour osi dir ki mon tre kontan e apresye ki en kantite lorganizasyon Sesel in fer zot, anmenn zot *l'appui* pour sa problem ki nou pei pe rankontre, sa problem labi drog, dan pei.

Nou ti a kontan dir poudir nou vremen ankouraze par bann kantite keksoz ki pe ganny fer, pour prevansyon labi

sibstans. I ede pour ranforsi nou bann louvraz ki nou, nou pe fer e ki pandan sa semenn pour annan en kantite aktivite lo la.

E an menm tan mon kontan ki, koman en pei nou pe osi anmenn nou sipor pour bann dimoun ki ganny afekte par sa problem; ki kwa bann viktim ou si non-bann fanmir kot i annan viktim ki pe soufer avek problem adiksyon. E ki pe osi soufer akòz i annan dimoun ki pe fer, ki i annan labi drog.

Alor mon ti a kontan remersye tou dimoun e pour sa bann lefor, pour ed nou konbat sa fleo.

Pour reponn kestyon Mr Speaker, atraver program *methadone*, Minister Lasante pe esey adres sa maladi kronik, difisil ki apel adiksyon ek eroin, ki malerezman ozordi pe afekte plizyer Seselwa, ki dan zot laz prodiktiv osi byen ki reprodiktiv e menm bann ki pli zenn osi byen ki bann ki pli aze.

Program *methadone* i form parti en seri lentervansyon pour adres sa maladi kronik ki devlope apre labi drog eroin. *Methadone* i redwir risk e domaz asosye ek eroin. Mon met lanfaz lo sa mo "redwir" akòz *methadone* pa kapab e i pa elimin tou risk ek domaz. Mon

osi oule met lanfaz lo sa mo eroin akoz *methadone* pa ede si i en dimoun i annan lezot adiksyon ki pa eroin, par egzanp adiksyon avek *cocaine*.

Atraver sa program *methadone*, Minister Lasante pe swete ki si pa tou, me lamazorite ki lo sa program i arete servi eroin par lavenn, e alor redwir zot risk pour zot ganny en lenfeksyon atraver en zegwir oubyen en sereng ki kontaminen.

Zot bann sentonm sevraz e zot lanvi pour eroin i ava diminyen e alor zot a kapab fonksyonnen dan lasosyete parey tou lezot dimoun. Zot pa pour bezwen al vole e fer lezot aktivite ilegal pour zot ganny larzan pour al aste *methadone*. Zot a kapab al rod en louvraz pour zot fer e nouri zot lekor ek zot fanmir.

Plan fitir se ki Minister Lasante pour kontinyen ofer e amelyor sa servis pour tou bann kliyan ki lo tretman *methadone*. Osi lontan ki eroin i en problem lasante piblik dan Sesel, e ki lemonn pa ankor vwar en meyer tretman pour annan en plas pour *methadone* dan bann swa ki nou ofer bann pasyan adiksyon avek eroin.

Nou pour osi donn bokou formasyon nou bann profesyonnel pour zot kapab

ofer lezot entervansyon. Nou pour kontinyen travay avek dimoun ki servi eroin, an servan bann metod psikolojik pour kapab, pour zot kapab ariv lo en staz pour zot aksepte zot sityasyon e pour zot fer sanzman dan zot lavi.

Nou pour kontinyen entansifye nou bann program *outreach* ki vize ver al kot zot ete pour nou ed, eseye redwir risk e domaz asosye ek nou program *methadone*. Nou pour bezwen fer plis lesanz a sereng pour bann ki bezwen pour nou anpese ki zot devlop sa bann maladi serye, parey maladi lekor *endocarditis*, ki nou'n vwar letan zot servi sereng sa kontaminen, sa i ogmante.

Nou pour osi kontinyen ed sa dimoun ki li i pare pour fer sanzman, pour sorti konpletman lo sa sibstans atraver nou program *high threshold*. Mon krwar sa i enportan pour nou soulinyen.

Nou pour kontinyen travay ek tou lezot lorganizasyon prive, pour nou kapab rekrit bann kliyan, fer bann kliyan antre dan louvraz.

Nou pour travay an kolaborasyon avek Minister Lanplwa ek bann lenstitisyon letid pos-segonder pour kapab ede reentegre serten kliyan dan lanplwa.

Avek Minister Lanplwa nou osi angaze dan en program *reskilling* e *upskilling*. Bann kliyan ki satisfere kriter zot kapab swiv kour dan diferan lenstitisyon ki nou annan, i tou depan lo zot lentere e zot kapabilite.

An gro Mr Speaker, nou annan plan, nou lentansyon i bon, me sa ki mank nou an se moman se plis resours imen kalifye, ki pour kapab travay avek sa bann dimoun dan en fason pour nou arive asiste zot ed zot, pour zot kapab fer fas a zot problem e sorti dan sa problem adiksyon.

E pour sa nou bezwen led sosyete an antye. Mersi Mr Speaker.

MR SPEAKER

Mersi Minis. Nou a pran bann siplemanter.

MINISTER PEGGY VIDOT

Si mon.

MR SPEAKER

Sorry. Wi?

MINISTER PEGGY VIDOT

Sorry Mr Speaker. Si ou ti a permet mwan reponn kestyon.

MR SPEAKER

87. Wi mon remarke ki ou pa'n ariv lo la.

MINISTER PEGGY VIDOT

Wi, an relasyon avek sa sant konstriksyon pour reabilitasyon; Mr Speaker, i annan en teren ki'n idantifye pour fer sa sant reabilitasyon *ambulatoire* pour bann maladi psikyatri e adiksyon. Sa teren i vizavi Klinik La Rivière Anglaise. Servis ki pour ofer dan sa sant i plizoumwen menm kalite servis ki nou pe donner dan sa ki nou apel *Mat Clinic* aktyelman, e i pour lo sa nivo – nouvo sant kot sa nouvo sant i ete.

Sel diferans se ki tou bann psikyatrik, tou bann servis *psychologie* pour dan sa menm landrwa, dan sa menm batiman e i pour pli - nou pour pli kapab travay an *close* kolaborasyon avek tou bann eksper ki travay dan sa domenn.

Plan arsitek pour sa nouvo sant in fini fer, par Lazans Lenfrastriktir an kolaborasyon avek Minister Lasante. In fini partaze avek nou *sponsor*. Alor nou pe zis atann *feedback* avan nou pran lot *step*. Mersi Mr Speaker.

MR SPEAKER

Mersi Minis. Onorab Labrosse ou annan siplemanter?

HON RICHARD LABROSSE

Byensir Mr Speaker. Dabor ankor mon osi avan mon demann mon Kestyon Siplemanter Mr Speaker, mon pour osi zwenn ansanm parey mon koleg pour felisit bann travayer *DSAPTR* pour zot travay ki zot pe fer, pour ansanm anmenn en pe rekour dan lavi bann viktim.

Mr Speaker, mon annan de siplemanter. Premye mon siplemanter i sorti kot bann dimoun en pe dan kominote. Plizyer dimoun in met sa lanfaz lo sa kantite larzan dan sa program, me selman dan lot kote zot annan sa konplent ki bann adikt ler zot fini servi sa latizann, parey nou dir - swa zot retourn ankor lo geto - swa zot re-pratik li ankor. Minis kekfwa si ou ti annan en keksoz pour nou dir lo la.

Dezyenm kestyon, ou'n koz en pe lo *reskilling* ki bann adikt zot gannyen atraver bann travay ki Minister Lasante i fer avek Minister Lanplwa. Me mon osi rekonnèt osi parey dan mon distrik kot i annan detrwa bann pasyan, ki konplent ki zot ganny difikilte pour ganny entegre dan lanplwa.

Eski lo sa kote Departman *DSAPTR* zot annan okenn rekour, ouswa okenn fason, pour asiste bann pasyan ki

vreman anvi al travay dan bann sityasyon parey? Mersi Mr Speaker.

MR SPEAKER

Mersi Minis. Ou repons.

MINISTER PEGGY VIDOT

Mersi Mr Speaker. Onorab ankor mersi pour lankourazman ki ou pe donn nou bann travayer dan *DSAPTR*. Wi kestyon se ki nou depans larzan lo *methadone* e nou vwar ki bann dimoun ki vin sers *methadone* bomaten, e kekfwa dan apre midi, ou sinon pli tar dan lazournen, nou ganny dir poudir zot dan *ghetto*.

Mon krwar i enportan pour fer resorti ankor a sa pwen ki i ede pour adres sentonm sevraz e lanvi pour ganny, pour pran sibstans. Me i pa pour travay pour lanvi pran sibstans lezot sibstans ki eroin. Sa ki nou'n remarke dan *DSAPTR*, se ki nou annan dimoun ki pe servi sibstans e zot panse ki zot pe servi zis eroin.

Me ler nou fer tes, nou realize poudir zot pa servi zis eroin, zot pe servi lezot sibstans. E *methadone* pa travay pour anpes sa bann lanvi lezot sibstans. I posib i pour sa rezon, ki ou vwar zot dan *ghetto*, kan zot pe rod si oule lezot

sibstans pour ki zot lekor pe demann zot.

Me Mr Speaker si ou permet mwan mon ti ava demann Dr Valentin si i anvi entansifye lo sa pwen, epi reponn sa dezyenm kestryon lo *reintegration e reskilling of* bann adikt. Silvouple.

MR SPEAKER

Mersi Minis. Dr Valentin?

PS BERNARD VALENTIN

Mersi Mr Speaker. Mersi Minis. Donk mon ti a kontan dir ki *DSAPTR* lo li tousel i pa kapab met dimoun dan lanplwa akoz in napa sa manda, me sa ki i kapab fer se ki i travay avek lezot partener pour kapab idantifye bann landrwa travay pour bann dimoun.

Par egzanp nou'n dir ki enn nou partener kle, se Minister Lanplwa, kot li deza Minister Lanplwa i annan sa program *upskilling e reskilling*, kot letan nou, nou annan bann kliyan ki nou vwar i kapab anbark lo sa program, nou fer kontak avek Minister Lanplwa e nou bann kliyan i ganny sans anbark lo sa program ki Minister Lanplwa i annan.

E nou travay ansanm pour kapab entegre sa bann dimoun dan lanplwa. Nou fer sa osi avek bann lezot

lorganizasyon ki annan. Nou annan en kantite dimoun osi ki nou'n kapab ede pour antre dan lanplwa, atraver bann lakonpanyen parey ki lo Por eksetera, eksetera.

Nou annan osi posibilite travay ek bann lekol possegonder pour organiz bann program aprantisaz pour nou bann kliyan kapab swiv epi antre dan lanplwa.

Kot bann anlwayer pa oule pran bann dimoun ki annan problem adiksyon, napa gran keksoz ki *DSAPTR* i kapab fer, sof kontinyen esey konvenk zot poudir i annan parmi sa bann dimoun ki kapab, ki nou kapab fye lo la, e ki nou kapab donn zot en dezyenm sans pour refer zot lavi. Mersi Mr Speaker.

MR SPEAKER

Mersi. Onorab Labonte si ou annan siplemanter prezan?

HON ANDY LABONTE

Mersi Mr Speaker. Minis mersi pour ou larepons. Vi ki dan ou larepons ou'n mansyonnen ki ou pe koz lo en bout teren akote *Health Center English River*, ki i mon sipoze i sa bout *V19221* e sa i en gran teren e nou konnen poudir sa teren osi en landrwa kot i rezidansyel.

I annan dimoun ki pe abite, e menm nou deza pe rankontre bokou problemm avek sa bann pasyan ki pe servi *methadone* kot *Mat Clinic* - bon bann kliyan, e nou pour kontinyen siport zot, nou konpran ki nou bezwen rod en landrwa pour zot.

Eski ou kapab konfirman oubyen petet donn nou lenformasyon si ler zot pe bouz sa *Mat Clinic* lot kote, zot pour pe rann sa batiman lot kote? E an plis sa nouvo batiman kot zot pe mazin fer, eski i pour en landrwa rezidansyel oubyen i pour selman donn servis ki pe ganny donner kot *MAT Clinic*, me non i pa pour rezidansyel?

Apre in *regard to methadone* li menm li. Nou vwar poudir i pa vremen annan en *follow up* - i plizoumwèn sa bann kliyan zot reste lo en doz partikilyerman i napa *counselling* ki pe ganny kontinyen.

Eski i annan travay ki zot pe mazin pour fer, pour sey vwar sa bann kliyan en pe pli regilyerman, pour kominik avek zot, aköz ou konnen mon vremen konsernen avek bokou sa bann kliyan e mon koz avek zot, i annan zot ki vremen anvi sorti me selman i annan serten keksoz ki manke.

So ki zot pe mazin fer lo sa laliny? Mersi Minis.

MR SPEAKER

Mersi. Minis ou adres kestyon.

MINISTER PEGGY VIDOT

Mersi Onorab. Mr Speaker sa sant ki nou pe batir i pa pour en sant kot nou pe anvizaze annan en servis rezidansyel, i pour plito *ambulatoire*, kot nou pe anmenn tou servis ki bann dimoun i avek sa problemm i bezwen, anba en sel trwa, kot nou ava pli group tou nou bann travayer dan sa sekter, konmsa i ava kapab travay an kolaborasyon pli pros, pli raprose.

Wi, ler nou'n fini aköz sa landrwa, kot nou pe fer *Mat Clinic* an se moman, i pa pour Minister Lasante, nou pour rann li avek Minis Lafanmir avek Lazenés, aköz i ti zot, zot sant pour komanse.

Mon konpran ou konsern lo bann dimoun ki pe ganny *methadone* e ki ou santi zis zot vin pran *methadone*, e zot ale i napa sa swivi pour avek bann parey ou'n dir *counselling* e vwar. Me pour bann ki eksprim lentere, nou annan en problemm sa ki nou apel *high threshold*, kot nou swiv zot pli pre, kot zot vini, pour zot annan bann sesyon zisteman la kot

Mat Clinic e ki sesyon avek bann diferan dimoun pour ed zot pour sirmont sa problemn.

Me selman anvi ki sa keston, ankor i annan en serten sans teknik mon ava demann Dr Valentin Mr Speaker pour eksplik enn pti pe plis sa ki pe arive avek bann pasyan, bann dimoun ki lo sa *low threshold*. Mersi.

MR SPEAKER

Mersi Minis. Dokter Valentin adrese?

PS BERNARD VALENTIN

Mersi Mr Speaker. Mersi Minis. Mon krwar Onorab in mansyonn sa size doz; bann Dokter ki fer tretman, ki donn sa swen, i tre atantif letan zot deside pour swa pour sanz doz sirtou pour ogmant doz, akoz i annan en kantite keksoz ki zot pran an konsiderasyon. Eski sa dimoun pe pran lot sibstans? Ki lot sibstans i pe pran?

Akoz si ou pa fer vreman atansyon avek sa bann doz ou riske *end up* fer en pasyan plis ditor, ki dibyen. So avan ou sanz en doz, ou bezwen vreman konnen ki pe arive dan lavi sa pasyan. Eski par egzantp i pe abiz lalkol? E dan sa tretman *methadone* nou dir souvan *methadone* avek lalkol, pa sipoze melanze.

So tousala bann Dokter i pran kont avan zot determinen si pour sanz, si pour sanz en doz, oubyen pa our sanze.

Now adiksyon i en size difisil, difisil menm. E souvandfwa parey Minis in deza dir li menm en dimoun ki vini kot *DSAPTR*, i napa zis en adiksyon. Souvan i annan plizyer adiksyon. E pour kapab donn li en sipor, ou bezwen konpran tousala e travay avek li dan en fason *holistique*. Pa zis get sa problemn adiksyon avek eroin, me tou sa bann lezot keksoz ki egziste dan son lavi sosyal, pour ou kapab vreman fer en determinasyon ki program ki pli bon pour li.

Donk bann ki lo program *low threshold*, lanfaz i lo redwir risk ek domaz. *Low threshold* nou sev fer *harm reduction*. Bann ki lo *high threshold*, sa nou sey travay ek zot akoz zot in deza pare, nou sey travay ek zot pour zot gradyelman arete servi eroin konpletman.

I pran letan, i pran en kantite travay, souvandfwa dimoun i fer progre epi retonbe, nou bezwen rekomanse. Donk parey Franse i dir, “i en travay *de longue haleine*” e nou bezwen tenir konmsi pour kapab vreman arive akonpany zot ziska lafen. Mersi Mr Speaker.

MR SPEAKER

Mersi. Fer li klarifikasyon silvouple.

HON ANDY LABONTE

Mersi Dokter. Mersi Minis. Minis ou konnen zis en dernyen pti klarifikasyon konsernan sa sant menm ki zot pe konstrir lo sa morso later, vi ki ou dir i dan en staz avanse, plan pe ganny pe ganny travay lo la.

Eski nou kapab ganny langazman Minister Lasante - pa pour demann permisyon, me plizoumwèn pour annan en konsiltasyon, en langazman zabitan La Rivière Anglaise, sirtou sa bann zabitan ki reste lo bor petet nou kapab kominik avek zot, donn zot en pe plis lenformasyon kwa vreman ki pour pe ganny arive dan sa landrwa? Mersi Mr Speaker.

MR SPEAKER

Mersi Minis. Ou kapab reponn sa dan en fraz si i posib?

MINISTER PEGGY VIDOT

Wi Onorab. Ler dek ki nou'n ariv sa staz, kot nou santi nou annan en konsepsyon ek en *design* ki nou kapab partaze nou ava fer sa. Mersi.

MR SPEAKER

Mersi. Kestyon Onorab Georges.

HON BERNARD GEORGES

Mersi Mr Speaker. Minis e ou delegasyon, bonzour. Minis, mon pa konnen ki mannyer mon pou fraz mon kestyon?

Permet mwan avan ki mon fer sa, pour *acknowledge Deputy Headteacher* Lekol Plaisance Segonder - mademoiselle Brigitte Philoe ki yer menm ti pe demande, anmenn en Mosyon devan Lasanble pou *tackle* sa - egzaktman tou sa ki zot in dir la; *low threshold, reskilling*, eksetera. Pou ki *at least* nou ava ganny en popilasyon kot lannen ale, lannen vini nou pa pe koz lo menm zafer.

Rezon ki mon'n dir i difisil pou mon formil en kestyon se ki; mon pa anvi ki nou reste lo *same old same old*. E mon ganny en lenpresyon ki se sa ki nou pe fer koman en sosyete. E mon ti a kontan ki nou esey - Nou tou...

E mon konpran ki i annan en kantite defi. E enn bann defi mazer se kapasite pou *high threshold a program*. Eski nou kapab ganny ozordi en parol, ki *while* nou pe fer *harm reduction* - anfen, *while* zot, zot pe fer *harm reduction*. E ki lezot brans Gouvernman pe fer *supply*

reduction. E kekfwa en pe *demand reduction*, ki mannyer eski nou kapab koman en pei, koman en sosyete - olye *just go through the Motions* ki mon santi ki nou pe fer, kot zot, zot pe anmenn zot sipor kot nou pe rod sipor avek lezot dimoun. ki nou kapab trouv en *silver bullet*.

E mon konnen i pa posib kekfwa. Me i bezwen annan en keksoz ki nou kapab fer pli byen. Nou bezwen kapab – E mon ti a kontan ganny zot lankourazman lo la.

Ki mannyer nou kapab fer sir ki i annan sifizaman program pou abzorbe tou sa bann dimoun, pou anpes zot ler zot in pran zot *methadone* bomaten, retourn lo *ghetto* parey nou vwar dan nou bann distrik?

Donn zot en keksoz pou zot fer. En *gainful employment*. Menm si i – mon pa konnen mwan. Detri bann lalyann anvaisan partou. Dan en lankadremman nasyonal, eski nou kapab regard sa olye - Ler mon komans en fraz avek eski, i pou fini avek en *question mark*. Mon krwar nou tou nou konn sa.

Eski-eski Minis, eski nou kapab – eski zot, zot kapab propoz en solisyon a sa fleo? Eski zot kapab propoz en

solisyon, olye ki nou retourn an ron toultan? Mersi Mr Speaker.

MR SPEAKER

Mersi. Mersi Minis. Mon krwar Onorab in remarke ki son kestyon i en pe difisil. E i pou demann en kantite refleksyon.

So, Minis silvouple si ou kapab adrese. Me petet ou a kapab rezerv plis detay pou en lot ler.

MINISTER PEGGY VIDOT

Wi. Mersi bokou Onorab pou ou kestyon. Mersi Mr Speaker. Wi, sa kestyon eski i en kestyon ki nou demann nou lekor tou le tan sak fwa ki nou pe regard sa problemn.

Parey nou'n dir; problemn adiksyon Sesel, problemn labi sibstans Sesel i gran, i konpleks. E pou nou kapab vremen vin avek keksoz ki; 1) Premyerman i afordab, i pou marse, i soutenab. Nou bezwen fer en gran kantite lanaliz, letid. Nou bezwen bokou done.

Nou pe travay avek diferan group enternasyonal; parey *WHO*, parey *World Bank*. Anmezir ki nou pe re- akos sa plan ki nou annan an se moman pe fini sa lannen. Nou pe met nou en lot plan ki nou santi sa plan pou ed nou parey ou dir, ki nou pa santi poudir nou pe fer *same old same old*.

Akoz *same old same old* i pa'n donn nou rezilta ki nou ti a kontan. Me pou nou kapab fer en plan ki apropiye, ki relevan, ki adres problem ki targete, nou bezwen en kantite done, en kantite *data*. E sa pe ganny fer an se moman.

Nou pe travay avek *World Bank*, nou pe travay avek *WHO* pou nou kapab arive an menm tan ek *UNODC*. E ki an menm tan avek *partner* – akouz nou santi poudir i bon annan lenfliyans e konesans lezot lorganizasyon.

Me problem i pou nou Seselwa. E nou pe osi travay avek nou bann partener lokal, pou nou kapab met en plan an mars ki pou, nou panse, pou fer zis sa. Pou nou adres problem kot sa problem i komanse. E an menm tan, ed bann ki'n fini ganny deza afekte.

Me ankor, mon realize poudir sa ki mon'n dir i minim. Me mon a demann Dokter Valentin ki pe travay ladan pli profundir pou azoute. Mersi.

MR SPEAKER

Wi Dokter, ou kapab azoute?

PS BERNARD VALENTIN

Mersi Mr Speaker. Mersi Minis. Ou konnen depi ler *APDAR* in komanse, epi *DSAPTR* in kontinyen, tou sa bann diferan

tim ki travay dan sa problem adiksyon in fer en kantite vizit aletranze.

Nou'n al *Portugal* dan letan *APDAR*, nou'n al *Indonésie*, nou'n al mon krwar menm *Thailand*, *Londres*. Apre dan letan *DSAPTR* nou'n al *La Suisse*. Mon avek Minis nou'n al *La Suisse*. Nou pe gete ki zot fer. Nou'n al *Hungary*. Tou dernyerman mwan pase nou'n al *La Reunion*.

Ki nou pe sey fer, nou pe gete ki lezot pei pe fer pou adres problem adiksyon se zot. E keksoz ki zot pe fer i keksoz ki nou, nou pe fer, i keksoz ki nou'n aprann avek zot. E sa ki nou, nou pe fer i pa tro diferan avek sa ki zot, zot pe fer.

Sel diferans se ki zot, zot annan en pli gran - si oule - kantite resours imen kalifye pou travay avek sa problem. Me selman, mon letan mon get problem drog Sesel, nou annan 2 fason azir. Swa nou azir *downstream*. Swa nou azir *upstream*.

E nou tou dan lasante nou konnen, si ou anvi vreman adres en problem, ou bezwen atak li kot son rasin. So, nou bezwen fer plis program prevansyon dan nou pei, pou fer ki i annan mwens e mwens zenn dimoun ki antre lo drog.

Savedir nou bezwen entansifye nou zefor prevansyon partou dan pei. Konsolid nou bann fanmir. Edik nou bann zenn; pa edike, me selman konsyantiz nou bann zenn pou pa konsider drog koman en opsyon.

Mon krwar se la ki nou bezwen fer travay. E bokou pei ki'n fer sikse lo sa size drog, oubyen en pe sikse lo sa size drog, zot in met lanfaz lo prevansyon e zot in travay lo prevansyon pou fer ki i annan mwens e mwens zenn dimoun ki konmans antre lo drog.

Nou bezwen osi travay avek bann ki deza dan adiksyon. Nou bezwen fer sa travay. Me letan ou dan adiksyon, i annan 2 kalite travay pou ou fer. Ou fer en travay pou fer en dimoun deside fer sa sanzman. Epi letan li in deside fer sa sanzman, ou travay avek li pou mentenir sa sanzman.

Me sa ki nou pe vwar nou Sesel, se ki en kantite dimoun ki servi drog, i ankor dan sa staz ki nou apel staz pre kontanplasyon kot i pa ankor pare. I pa ankor deside pou fer sa sanzman.

E nou bezwen travay ek li pou nou avans li, pou li lo sa staz pou li fer sa sanzman, epi pou nou kapab kontinyen ed li

mentenir sa swa ki li in fer. Mersi Mr Speaker.

MR SPEAKER

Mersi Dokter. Mersi. Onorab Pillay, ou kestyon?

HON SEBASTIEN PILLAY

Mersi Mr Speaker. Mr Speaker, mon'n ekout byen larepons. Mr Speaker, antretan ki nou pe esper li pran pre kontanplasyon, nou pe depans R46.1milyon pou dil ek sa sityasyon. E la mon fek tann Minis dir zot pou bezwen resours adisyonnèl. Savedir antispasyon se ki nou pe war Bidze pou prevansyon avek reabilitasyon; *Aftercare, community services*, sa pou monte. Nou pe prezimen sa pou al monte la.

Prezan lefe ki nou pe depans R46.1milyon, nou'n ferm APDAR, nou'n reentegre sa servis dan Minister Lasante, e problem in vin pli grav, eski zot pa krwar poudir pou adres sa sityasyon;

1) Zot bezwen sanz stratezi e retir sa program avek Minister Lasante, prenan kont deza tou sa bann lezot keksoz ki Minister Lasante i bezwen pe dil avek?

Mankman latizann, problem servis, *staff* moral. Konmsi ou konpran mon pe dir

ou? Ou deza annan en kantite problemm, e ou azout ankor lo la. E zot menm ki pe gete. E ou pe *spread* sa resours ki ou annan pli *thin* ankor pou *lead* – pou *lead* sa programm. I met en presyon lo zot.

So, ou pa krwar poudir ti meyer pou ki nou annan en lot lapros pou dil ek sa problemm?

Prezan mon dezyenm kestyon tre senp Mr Speaker, ler mon vwar nou pe al pran en bout teren English River pou nou al fer en lot *clinic*, en lot *MAT Clinic*. Be si nou pou fer en lot *Mat Clinic*, ou remet li dan en landrwa rezidansyel ankor, mon pa pe vwar ki rezilta in anmenn nou ziskan la!

So, ki'n arive ek sa plan konpreansiv ki Prezidan Larepublik li menm ti resevwar en kopi ler i ti *Leader* Lopozisyon dan Lasanble, ki i ti koz lo reabilitasyon bann dimoun sa 10mil ekek dimoun, ki deza lo sa problemm? E ki ti pe ganny *sponsor* par Gouvernman *UAE*, e ki ti sipoze ganny fer lo en later *Bon Espoir*?

So ki'n arive avek sa plan, e ti'n fini ganny sinyen? Akoz ki prezan nou'n re - dan plas retir bann adikt dan landrwa kot zot pou ganny afekte avek adiksyon, nou al remet zot dan en landrwa ki pou ankor enn fwa met zot dan kominote, pou

zot re soz sa problemm? So, ki'n arive ek sa plan? Mersi Mr Speaker.

MR SPEAKER

Mersi. Minis, ou repons?

MINISTER PEGGY VIDOT

Mersi Mr Speaker. Mr Speaker. Letan ki ou pe – ou demann mon 2 kestyon; ki'n arive ek sa plan? Si mon pa krwar poudir fodre nou retir sa programm anba Lasante, nou met li, li tousel? E ki nou pe servi larzan. Nou pe servi nou resours en gran kantite.

Bon. Nou panse poudir ladiksyon i en problemm kronik lasante. E alor i ganny trete par Lasante. Si konmela nou ti pou tir sa programm anba lasante, nou ti pe anvoy li anba en lot Lazans, ou si non koman i ti ete, la mazorite travayer ti pou pe sorti dan Lasante pou *migrate* laba. *Ok*?

So, i zis ou ti a tir li la, ou pe met li laba. I pou menm resours. Wi, i en problemm ki kompleks. I en problemm ki nou bezwen en kantite resours. Resours, sirtou resours imen kalifye.

I tre probab parey mon'n dir boner, ki bann dimoun ki nou annan la i ganny *training*, pou zot kapab vin ganny *skills* ki zot bezwen pou zot travay

avek sa kalite dimoun. Me nou bezwen en dimoun ki kalifye avek konpetans pou travay avek adikt.

Eski nou pe met tou dimoun – bann dimoun ki pran sibstans, zot deza dan kominote. Zot pa en lot landrwa. Alor nou pa remet zot dan kominote. Sa kot zot viv.

Me nou realize poudir part reabilitasyon i osi bezwen annan en program rezidansyel. E alor, nou annan – nou pe annan en program rezidansyel ki nou pou kontinyen kot *Wellness*. Me nou pe atann nou ganny plis resours imen pou nou kapab kontini sa program.

In fer serten evalyasyon lo program ki nou'n annan rezidansyel dan lepase. Nou'n remarke poudir en kantite dimoun ki ti al *Wellness*, ler zot in sorti zot pa'n ganny sa swivi, zot pa'n ganny sa sipor. E nou konnen i en problem adiksyon. Zot in retonbe.

Me nou pa anvi kontiny li lo sa laliny kot nou met zot 6 semenn. Zot ariv en nivo, nou larg zot. Zot retourn dan menm sirkonstans ki zot ti ete, e zot war ki zot retourn ankor lo sibstans.

Pou sa rezon nou ti a kontan ler zot sorti, zot annan en program byen planifye avek

dimoun ki annan *skills* pou ede pou siport zot. Koumsa ki zot pa retonbe.

Ki'n arive avek sa plan? Wi, ti annan en plan ki pou fer en Sant Reabilitasyon dan en serten landrwa parey ou'n mansyonnen, *Bon Espoir*. Me apre diskisyon avek nou diferan dimoun, in santi – an menm tan avek nou *sponsor*. In santi poudir sa landrwa i pa neserman tro apropiye baze lo kalite lezot devlopman ki pou pe annan dan sa landrwa.

Alor, pou le moman nou pou pe fer en servis ki nou bezwen pou travay avek dimoun *on a daily basis*, an menm tan ki nou annan en servis rezidansyel. Or en servis lopital kot dimoun i ale pou ganny tretman pou en serten letan, en servis ki nou a siport zot letan zot sorti.

Me, nou pa pou kapab arive adres tou dimoun dan en servis rezidansyel. E pa zot tou ki'n pare pou ariv dan sa letap. Mersi.

MR SPEAKER

Mersi Minis. Bon mon regrete mon bezwen termin sa sesyon kestyon la pou rezon letan. Nou pou pran poz la, e nou a repran kestyon 11er 10. Mersi.

(BREAK)

MR SPEAKER

Bon, nou a kontinyen avek kestyon limero 82. Onorab Richard Labrosse.

HON RICHARD LABROSSE

Mersi Mr Speaker. Bonzour ankor enn fwa tou dimoun.

Eski Minis pour Lasante i kapab enform Lasanble ki bann mezir ki an plas pour fer sir ki napa labi dan servis tretman aletranze? Mersi Mr Speaker.

MR SPEAKER

Mersi. Minis, repons please?

MINISTER PEGGY VIDOT

Mersi Mr Speaker. Mon a esey reponn sa kestyon lo 4 nivo. Mon a komans avek lo nivo *Board*. Tou pasyan ki ganny refer kot *Board* pou tretman aletranze, se selman zot bann spesyalis ki pe tret zot ki kapab fer li.

Sa bann spesyalis i bezwen satisfere manm *Board* ki sa bann tretman oubyen investigasyon ki pe propoze ganny fer, i apropiye, i afordab. E osi i pou benefis sa pasyan. *Board* nepli aksepte okenn ka ki sorti kot nenport ki lezot landrwa; ki kot Minis, ki kot *MNA*. Ki lezot endividyel ou osi lorganizasyon.

Lo nivo lopital tretan - savedir kot nou anvoy pasyan pou trete. Dan lefase in annan en kantite ka kot nou'n anvoy pasyan pou en problemm spesifik, e sa lopital i fer tou sort kalite tes, e tou sort kalite tretman ki pa lye neserman avek kondisyon sa pasyan ki ti ganny anvoye avek, e apre zot ti sarz Minister.

Konmela, nou anvoy rapor medikal davans e demann en kotasyon avek plis ki en lopital aletranze. E avan ki en desizyon final i ganny pran kote sa pasyan pou ale. Ler nou anvoy pasyan, si zot dekouver ki i annan en tretman oubyen en tes adisyonnèl ki pou neser ganny fer, zot bezwen avan zot kontinyen fer sa, pran kontak avek nou. Donn nou rezon. Donn nou bann lenformasyon neser. Koumsa *Board* i kapab pran en desizyon e donn en laprouvasyon avan ki zot prosede. E sa i anpese ki tes ki pa neser, ou si non tretman ki dimoun pa'n ganny anvoye pou ganny fer.

Lo nivo pasyan ou si non sa dimoun ki akonpanyi li ler i al lo tiket Minister Lasante. Avan pasyan i al ek zot – swa *attender* i kit pei, Zot ganny en *briefing* avek *secretariat* tretman aletranze ki isi. Zot

ganny byen eksplike ki tretman zot pe al fer.

E si zot decide fer lezot tes oubyen tretman san nou aprouvasyon, se zot ki pou responsab pou pey sa bann tretman. E normalman nou demann zot pou zot fer sinyen, pou fer sir ki zot in byen konpran sa.

Lo nivo pasyan li menm, en kantite pasyan oubyen endividi i decide al rod en dezyenm lopinyon, apre zot decide fer zot tretman aletranze, apre ekri nou isi Lotorite Sesel, pou dir ki zot larzan in fini e zot bezwen led ek Minister pou pey zot tretman.

Dan bann ka koumsa, nou ensiste ki nou ganny en rapor. En rapor byen detaye kot sa Dokter ki pe tret li. E si nou satisfè ki sa tretman i apropiye e ki pa ti pe kapab ganny fer isi, nou pou konsider ede oubyen pran sarz depans sa bout ki reste.

Malerezman pou lezot ka, nou pa pou kapab peye. Nou panse ki nou annan sifizaman mezir an plas, pou anpese ki nou annan okenn labi dan sa Program Tretman Aletranze. Mersi Mr Speaker.

MR SPEAKER

Mersi. Onorab Labrosse, ou siplemanter?

HON RICHARD LABROSSE

Mersi Mr Speaker. Mersi Minis pou sa larepons byen detaye. Minis selman mon pou met mon premye keston devan ou. Par egzanp sa enn i sorti kot en zabitan ki'n met devan mwan.

Par egzanp; nou konnen ki i annan pasyan ki al dan bann servis deor aletranze. Me, i annan letan ki bann Dokter i *discharge* zot laba. Konmsi in ler pou zot desann. Me zot ganny – i annan i dir ou koumsa ki zot kapab desann, me selman zot ganny dir zot bezwen reste ankor detrwa zour. E zot, zot santi kekfwa – ankor mon repete - sa bann pasyan i santi kekfwa i annan kek keksoz ki abnormal dan sa.

La mon ti a kontan demann ou; Eski en o zofisye dan Minister Lasante ki pran bann desizyon lo sa bann kote, oubyen i fer bann *follow-up* lo sa, pou fer sir ki sak pasyan ler i ale, ler in ariv lo zot ler *release* lopital pou zot sorti a ler? Konmsi eski i annan en dimoun isi – mon pe dir en *senior official* dan Minister?

Apre mon dezyenm keston Minis. Vi ki ou'n dir zot ganny bann rapor apre ki bann pasyan deor si zot bezwen kek led zot anvoy kot Minister Lasante. E, mon ti a kontan

konnen, ki kantite – si zot annan en statistik ki kantite sa bann ka parey ki zot gannyen? Mersi.

MR SPEAKER

Mersi. Minis? *Panel?* Nou a fer bann repons bref e direk silvouple.

MINISTER PEGGY VIDOT

Wi. Mersi Mr Speaker. Bon, pou anpese ki pasyan i reste tro lontan parey ou pe dir, Onorab, i en keksoz ki'n vini, ki serten pasyan in dir ou pou dir zot in fini. Me selman zot pa'n fer desann ziske detrwa zour.

Wi. Nou'n met an plas an dernyen-r-er la, en prosedir kot lopital kot nou'n anvoy pasyan, zot bezwen donn nou en *discharge* plan. En plan pou desarze. Kan ki pasyan pe desarze.

Koumsa ki nou, nou toudswit konmans fer nou bann tranzaksyon. Sanz dat tiket. Fer sir ki nou ganny en *seat* lo sa avyon. E ganny lotorizasyon *airline* pou pasyan voyaze.

Souvan nou vwar bann airline osi letan nou demande pou anmenn en pasyan, akoz pasyan in mont lo en tiket pasyan. Prezan nou bezwen zot lotorizasyon pou zot osi les nou desann.

So, pou nou fer sir ki; ler pasyan i dir nou – dizon pasyan pe desarze dan 2 zour, nou fer sir ki bann diferan tranzaksyon in ganny fer pou li desarze dan 2 zour.

Akoz, oparavan, wi, zot dir nou pe desarze ozordi. E prezan letan nou, nou pe sey fer tou sa bann tranzaksyon *it could have taken* detrwa zour avan ler nou kapab fer zot desann.

E osi i annan pasyan ki – menm sa semenn nou'n war - en pasyan ki pe demande pou reste detrwa zour an plis ki nou pe otomatikman dir non. E alor nou'n met en mezir an plas pou anpes sa kalite labi.

Sorry, mon pa'n tro konpran ou dezyenm kestyon?

MR SPEAKER

Silvouple, ou a reponn?

HON RICHARD LABROSSE

Wi Minis, mon ti pe gete. Par egzanz; ou'n dir i annan bann pasyan deor ki parfwa zot santi zot bezwen serten lasistans ek Minister, ler zot deor laba. Parey ou'n dir; zot larzan in fini, eksetera. Eski nou annan en pti statistik apepre konbyen sa bann ka parey pe arive?

MINISTER PEGGY VIDOT

Wi. Nou annan serten. Me Onorab, mon pou napa sa

statistik bann ki'n demann nou pou ed zot, akoz zot aletranze zot in al fer sa kalite tretman. Me, nou kapab les zot ganny sa. Mersi.

MR SPEAKER

Mersi Minis. Onorab Sandy Arissol, siplemanter?

HON SANDY ARISSOL

Mersi Mr Speaker. Bonzour Minis avek ou lekip. Bonzour tou dimoun ki a lekout.

Mr Speaker letan nou lo – Minister Lasante i la. Mon ti a kontan konve mon felisitasyon e apresyasyon pour Dokter Barbe avek son lekip Seksyon lize. Sa i sorti kot enn mon zabitan, Wills Labrosse. I dir mon mansyonn son non akoz in byen apresye servis ki i ti gannyen. Alor mon konve son swe.

Mon annan 2 pti kestyon Mr Speaker. Premye kestyon mon ti a kontan demann Minis;

Eski i annan en swivi par Seksyon Servis *Overseas* Sesel, an relasyon avek lakantite zour ki nou bann pasyan i reste aletranze? Kalite e kantite latizann ki zot in servi? E zisteman parey ou'n dir Minis; kantite zour ki zot in pran pou zot retourn Sesel? Zis pou asire ki napa en *middleman in between* sa bann tranzaksyon.

Mon dezyenm kestyon ki mon ti a kontan demande;

Eski i annan en laspe konfidansyalite an term bann pasyan ki pe al *overseas treatment* an relasyon avek zot kondisyon e kalite tretman ki zot pe servi? Mon ti a kontan demande. Mersi bokou Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Onorab ou pe demande si nou annan en sirveyans lo kantite zour ki dimoun pe reste? Sa ki mon'n fek eksplike. Lo kalite – en swivi lo kalite tretman ki zot in gannyen? Kalite latizann ki zot in aste?

Wi, nou pe regarde. Letan en ka i ganny anvoye. Ler zot retournen, i annan sa Dokter ki'n anvoy sa pasyan. I toultan pran sa pasyan ansarz letan i retournen. Ou si non, si in ganny refer ek en lot servis, sa i ganny servi.

Me nou osi realize dan Minister, ki nou bezwen pe fer en evalyasyon lo bann pasyan ki nou anvoye. Ki kantite? Ki kalite tretman? Ki kalite – koman ou dir sa? *Quality of life* ki zot annan. E ki *success rate* bann diferan tretman. E sa i

keksoz ki nou pe planifye pour regarde ki mannyer nou fer li.

E an menm tan. Wi nou fer sir ki tretman ki dimoun pe desann avek, i swa nou ki *order*. Ou si non, si dimoun in al lo zot menm, e zot anmennen. Nou fer sir ki sa tretman ki zot desann avek, i tretman ki nou isi nou ti pou kapab donn zot. Lo lot kestyon.

MR SPEAKER

Lo konfidansyalite.

MINISTER PEGGY VIDOT

Laspe konfidansyalite. Tou travayer lasante i ganny demande pou zot obzerv konfidansyalite a tou moman, nenport kote. E nou ekspekte ki sa – e ler nou konnen poudir sa pa'n ganny fer, aksyon disipliner i ganny pran. Mersi.

MR SPEAKER

Mersi Minis. Kestyon Onorab Vidot?

HON AUDREY VIDOT

Mersi Mr Speaker. Bonzour Minis avek ou delegasyon. Tou Manm Lasanble e bann dimoun ki a lekout. Minis mon kestyon;

Eski i annan lenstans kot loperasyon oubyen lezot servis ki'n ganny mal pratike anver en pasyan ki petet Minister atraver

en *Board* in anvoy tretman aletranze. E apre ki Sistenm Lasante Sesel in war li pe bezwen refer serten; swa loperasyon oubyen servis an plis pou adres bann mal pratik?

E ki si i annan de ka parey dan bann lenstans. Eski i annan en prose, en fason ki Gouvernman Sesel i ganny rekonpanse pou depans ki'n fer anver sa loperasyon ki'n mal ganny fer, e osi sa fanmir osi i ganny serten rekour anba konpansasyon? Mersi.

MR SPEAKER

Mersi Onorab. Minis?

MINISTER PEGGY VIDOT

Onorab, si mon pe konpran ou. Si en loperasyon aletranze ki'n ganny mal fer? *Huh-huh*.

HON AUDREY VIDOT

Si ou permet mwan Mr Speaker?

MR SPEAKER

Wi.

HON AUDREY VIDOT

Minis, si par egzanp; Gouvernman Sesel in anvoy mwan Audrey Vidot aletranze pou en tretman. Laba sa lopital in mal fer loperasyon anver mwan. Mon'n retourn Sesel, e

Gouvernman Sesel ki'n bezwen re adres sa defayans.

E ki konpansasyon Gouvernman Leta Sesel i gannyen, si sa in en mal pratik. E osi sa fanmir ki'n ganny afekte?

MR SPEAKER

Mersi Onorab. Minis, wi?

MINISTER PEGGY VIDOT

Mersi Mr Speaker. Mersi Onorab. Onorab mon pe diskite la pou regarde si nou'n deza annan en ka koumsa. Nou konnen poudir nenport ki entervansyon sirirzikal i annan serten risk. E ki konplikasyon i kapab arive.

E souvandfwa, tou lopital i met tou mwayen posib an plas pou anpes sa arive. Me kantmenm, i kapab arive. Me si konmela i ariv en ka koumsa. Wi, nou ava pran Lalwa ki egziste konmela, pou nou fer sir ki sa probleman i a ganny rektifye dan en fason apropiye.

Me, pou le moman la, mon pe demann avek mon 2 dimoun ki o bor mwan la, si nou'n annan en ka koumsa. E mon pe ganny dir pou dir nou pa'n gannyen ziska prezan. Mersi.

MR SPEAKER

Mersi Minis. Kestyon Onorab Aglae?

HON EGBERT AGLAE

Mersi Mr Speaker. Minis ankor enn fwa, bonzour ek ou *panel*. Minis, kestyon pe met lanfaz lo labi servis. Mwan mon ti a kontan petet eklersi nou. Vi ki Gouvernman pe depans en kantite larzan dan Servis tretman *Overseas Treatment*. So, nou osi nou bezwen ganny valer pou larzan.

So, ki petet bann mekanizm ki zot annan an plas pou fer ki; i annan serten verifikasyon? Sirtou ler bann *invoice* i vini sorti laba deor pou nou peye. Pou fer sir ki nou pe pey sa servis ki nou, nou gannyen. E ki nou koman en pei nou pa pe ganny abize osi par sa servis ki pe ganny donner deor. Mersi.

MR SPEAKER

Mersi. Minis?

MINISTER PEGGY VIDOT

Mersi Onorab pou ou kestyon. Wi, nou bezwen fer sir poudir sa ki nou pe ganny sarze, i keksoz ki nou bezwen ki sa lopital pe sarz nou dan en fason konvenab.

E wi, tou *invoice* ki vini i pas dan premyerman; kot sa *Secretariat Overseas Treatment* i mont kot CEO. E tou sa bann *invoice* i ganny tyeke.

Parey ou konnen dan sa bann lopital souvandfwa - tou pti keksoz; 5 bout koton, *whatever*, i ganny sarze. E *whilst* kekfwa ou pa kapab dir pou dir 5 bout koton. Me selman nou osi nou annan en lopital ki nou pe sey *run*. Nou annan sa bann prosedir ki nou pe fer. Nou annan en lide kan ki - konbyen ki ou pe kapab ganny servi.

Me selman *CEO* i *sign off* lo tou sa bann *invoice*. Si i annan keksoz ki nou santi i pa parey i merit ete. In an plis. Nou souvandfwa demann kestyon lo la. So, wi, nou annan en mekanizm an plas.

MR SPEAKER

Mersi Minis. Kestyon Onorab Samynadin?

HON KELLY SAMYNADIN

Mersi Mr Speaker. Bonzour Minis ek ou delegasyon. E tou dimoun a lekout. Minis, souvandfwa bann pasyan ki plizoumwenn letan zot pa satisfè avek servis ki lasante Leta i ofer, zot al rod en dezyenm opsyon. E parfwa zot ganny *referral* pour *overseas treatment* from bann klinik prive.

Mon ti a kontan konnen ki kalite partenarya i annan ant Minister Lasante avek bann klinik prive dan lafason ki sa

bann *referral* i ganny pran kont?

E osi mon ti ava kontan konnen. Eski i annan en *liaison person* avek ki bann pasyan ki deor i kapab kontakte an ka okenn evantyalite letan ki zot lo *overseas treatment*? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Wi, nou travay pros avek bann landrwa - bann klinik prive. E wi nou vwar poudir i annan diferan fwa dimoun i ale i demand en - pou en kondisyon zot demann en klinik prive. Si sa i kapab ganny fer kot zot, e zot vini avek en *invoice*.

Souvandfwa, si sa keksoz i en keksoz – si nou panse poudir sa keksoz - zot Dokter i krwar i merit met zot lo *Board* pou decide. Zot ganny mete lo *Board*.

Me nou osi konnen poudir sa bann klinik i bann biznes ki pe rod diferan biznes. E pou keksoz ki zot ale zot demande, laba i kapab dir zot; wi sa i bezwen ganny fer. En kantite sa bann keksoz ki keksoz i dir zot i kapab ganny fer, i keksoz ki isi nou bann spesyalis in osi konsidere.

E kekfwa in vwar; swa i nesese pou fer a se moman, ou si non i kapab ganny espere. Me i pa nesese man tou sa bann keksoz ki vini ki nou otomatikman pran e anvoy zot pou tretman. Me selman si fodre pas lo *Board* pou *Board* pran en desizyon, nou ganny fer.

MR SPEAKER

Wi, mon krwar Onorab Pillay pe sinyal mwan ki i annan en prosen kekyon ki tous en pe lo la. Mon bezwen termin la avek sa kekyon e nou a ava avans lo kekyon 83. Onorab Samynadin?

HON KELLY SAMYNADIN

Mersi Mr Speaker. Kestyon 83 i lir *comme suivant*;

An vi ki kanser i enn bann pli gran lakoz morbidite e mortalite dan pei, eski Minis i kapab dir Lasanble; premyerman dan ki fason ki Minister Lasante pe mazin entansifye zefor an sa ki konsern idantifikasyon bann dimoun ki a o risk?

E dezyenman, eski Minister pe konsider desantraliz a *screening* pour zesyon e deteksyon prekos sa maladi? Mersi.

MR SPEAKER

Mersi Onorab. Minis, repons *please?*

MINISTER PEGGY VIDOT

Mersi Mr Speaker. Wi, Minister Lasante pe met en kantite zefor pou nou kapab fer sir ki *screening* pou diferan kanser e ki – kan i posibil. E deteksyon kanser boner i dan – in ganny met an plas.

Pou kad kanser – kalite kanser ki pli komen. I annan en program *screening* ki pe ganny ofer an se moman. Nou ofer *Pap smear* ki en *screening test* pour kanser kolmatris, dan tou bann klinik lo Mahe Praslin ek La Digue, pou tou bann madanm ki santi zot bezwen sa tes.

Pour kanser tete, nou annan en kanpany *mamogram* ki pe ganny fer dan diferan landrwa travay dan bann diferan servis piblik. Sa program ankor i pou bann madanm ki ant 45an an plis.

Tandis bann madanm ki kalifye koman o risk. Par egzans; akoz zot annan en kanser dan fanmir pros, zot pe ganny idantifye pandan serten kanpany e zot pe ganny demande pou vini pou vin fer zot *screening* pli boner.

Setadir, menm si zot anba sa laz ki nou'n dir, 45an, nou pran zot koman bann dimoun o risk e nou fer bann tes nesese

pou vwar si zot – pou ede pou detekte si zot annan kanser tete.

Pandan lannen 2022, nou'n entrodwi en lot tes *screening* pour kanser trip. E sa nou'n komanse. Nou ti lans li lo La Digue, apre nou'n al Praslin e la nou pe fer pour Mahe.

Sa program i en program ki nou dir i *methodical screening*. Savedir bann dimoun ki'n ganny *screened* sa lannen, pou osi ganny *screened* apre koman en swivi.

An 2022 par egzanp, nou ti fer aprosan 407 *mammogram*. E ladan dan sa bann ki nou'n fer koman zis *screening*, pa neserman bann ki a o risk. In annan 4 ka kanser.

Nou program pour kanser trip. Deteksyon kanser trip i dan laz 54an a 60an. E akoz nou vwar dan sa group dimoun, dan sa trans daz. La mazorite dimoun ki ganny kanser trip i dan sa *tranche d'âge*. Alor nou pe *screen* sa kantite dimoun.

Ankor nou'n fer bokou tes lo Praslin ek La Digue. Me nou osi realize poudir en kantite sa bann dimoun, menm si nou pe met - zot tonm dan sa *tranche d'âge*, nou pe met sa servis a zot dispozisyon. Zot pa toultan servi.

Par egzanp; nou'n vwar dimoun - menm si nou dir par egzanp; pour tes kanser trip ou ganny en rezilta an *premier lieu ki pozitiv*. I pa savedir poudir ou annan kanser trip. Me i sinyal nou ki nou bezwen fer lezot tes lo ou pou nou fer deteksyon. E alor nou envit zot pou vin fer sa lezot tes.

Me ankor nou detekte poudir i annan dimoun malgre sa, zot pa vini. Menm si nou pe donn zot sa loportinite pou fer lot tes, pou zot kapab ganny vwar si zot annan kanser en pe pli souvan, pli boner.

Pou nou fer diferan osi, *screening* pour labous. Pou kanser labous, lagorz. Sirtou kot dantis. E ankor, sa i pou bann dimoun ankor ki a o risk *as well*, ki ler zot vini sa bann tes i ganny fer lo zot.

Nou pe fer resers lo serten group dimoun ki annan maladi kanser – pou maladi kanser erediter. Nou vwar i annan serten keksoz, serten dimoun ki pli a o risk akoz serten *genes* ki zot annan ki fer zot – ki *predispose* zot pou zot ganny kanser.

E sa nou ti'n komans fer. Me apre nou'n bezwen fer en lare pandan letan *COVID*. Me la nou'n rekonmans fer anv i ki nou'n ganny ankor *budget* sa lannen. Pou nou fer sir ki nou

idantifye dimoun ankor ki a risk, pou nou donn zot bann tes ki nou annan pour kapab detekte kanser boner.

Mr Speaker, i osi enportan pou mansyonnen ki kantmenm nou pe fer tou sa, i annan lezot keksoz – nou teste pou nou idantifye boner. Me nou bezwen ankor met plis lanfaz lo prevansyon. Akoz i annan en kantite keksoz ki nou kapab fer ki pou ede pou anpes nou ganny kanser.

Parey nou *lifestyle*. Kalite manze ki nou manze. Keksoz ki nou servi. E menm pou nou lapeze. Tousala nou vwar i met ou – i *predispose* ou pou kanser. E nou pe met bokou, bokou lanfaz lo sa.

Nou fer souvan bann *outreach* kot nou fer serten tes pou diferan kanser. Mon pa'n mansyonnen okenn kanser ki nou detekte prensipalman pou zonn. Me i annan tes ki nou fer. *Whilst* i pa en tes ki detekte, me i en tes ankor ki dir nou poudir ou bezwen fer tes pli aprofondir.

E sa souvan letan nou fer bann *outreach* an kolaborasyon avek diferan organizasyon, ou si non lo nou menm nou vwar i ed nou pou detekte. So, an gro, sa se bann keksoz ki nou pe fer.

Si nou pe fer li zis dan en serten sant? Non. En kantite nou bann tes in deza, parey

deza bout kestyon in demande – in deza desantralize, e i *available* dan tou sa bann – en kantite nou bann sant lasante. E menm parey mon'n dir, letan nou pe fer *outreach*.

Alor, nou demann dimoun. Kan nou annan serten tes ki zot kapab fer, servi sa loportinite e seye fer sa bann tes. E koumsa si i annan okenn nesesite pou nou fer tes pli avanse, pou nou kapab ede detekte kanser pli boner. Akoz nou konnen poudir *early detection* i donn nou en pli bon rannman letan nou pe fer tretman. Mersi Mr Speaker.

MR SPEAKER

Mersi. Bon, mon annan plizyer dimoun ki'n lev lanmen. Mon pou donn 20 minit pou sa kestyon. Selman mon pou pran 2 Manm ki ti'n lev lanmen dernyen. Paret i pa'n ganny sans. Onorab Esparon?

Anr, eskiz mwan. Mon'n bliye. Mon pa ankor pran siplemanter Onorab Samynadin. Wi, Onorab ou siplemanter?

HON KELLY SAMYNADIN

Mersi Mr Speaker. Mr Speaker, avan ler mon demann mon siplemanter, mon ti a zis kontan remersye, felisit Minister Lasante. *Cancer*

Concern Association osi, pou sa travay konzwent ki zot fer dan lalit kont kanser. Sirtou kot prevansyon, ledikasyon e tretman i konsernen. So, nou dir zot en gro mersi.

E mon siplemanter i an term swivan; Letan nou pe koz deteksyon prekos, eskiz mwan; Eski i ann okenn resers ki pe ganny fer dan bann prodwi ki pe ganny enporte dan pei; par egzanp bann bwat konserv, bann kemikal ki ganny servi dan lagrikiltir, par egzanp?

Avek bi pou idantifye lekel parmi sa bann prodwi ki poz en o risk kanser pou nou popilasyon? E ki travay ki pe ganny fer dan sa direksyon, sirtou an term ledikasyon prevansyon? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Onorab, mersi pou ou bann parol ankourazan pou bann travayer lasante. E nou apresye ki keksoz koumsa i ganny rekonnet. Mersi.

Eski nou pe fer okenn resers pou vwar si i annan keksoz ki dan nou lanvironnman ki pe kapab donn – okazyonn kanser dan nou popilasyon?

Nou pa pe fer okenn *recherche* lo sa bann diferan prodwi. Me i annan en kantite keksoz ki'n ganny fer. Parey in ganny prouve poudir; *processed meat, processed food* i annan en gran risk donn kanser trip. Kanser kolonn.

E alor pour sa letan nou pe fer nou bann ledikasyon, nou sey fer sir ki nou edik dimoun lo sa bann keksoz. Lo tou keksoz ki nou konnen poudir i annan serten keksoz in donn kanser, *whilst* nou, nou napa sa fasilite e sa abilite pou fer sa bann tes. Me nou fer si ki nou swiv ki sa ki pe ganny fer e ki keksoz ki *WHO* i donn nou.

Nou konnen par egzanp poudir; labi sigaret, taba, drog, labwason tousala i donn serten kanser. E alor dan nou ledikasyon nou fer sir ki nou dir dimoun.

Nou konnen poudir mank legzersis fizik i osi en risk. Alor nou fer sir ki ankor nou edik dimoun. Nou ankouraz dimoun pou fer tousala.

Me lo prodwi agrikol. Sa ki nou kapab dir; nou bann prodwi agrikol ki ganny enporte dan pei i annan sa *Pesticides Control Board* ki regard sa lalis tou bann prodwi.

Fer sir poudir tou bann *recherche* ki'n ganny fer dan diferan pei. E *only allow those*

ki in ganny *clear* par diferan lorganizasyon byen *reconnue* ki antre dan pei. Alor, pou le moman se sa ki nou pe fer.

Me nou pa ankor arive teste ki bann lavyann parey dimoun i souvan dir nou; lavyann ki nou enporte. Ou si non, kantite *spraying* ki pe ganny fer parey pe dir, lo bann diferan legim. Me keksoz ki kapab ganny fer a lavenir avek plis *training*, avek plis lezot lekipman. Mersi.

MR SPEAKER

Mersi. Mon a pran kestyon Onorab Esparon.

HON REGINA ESPARON

Mersi Mr Speaker. Mr Speaker, mon ti a kontan demann Minis; Dan lespri *cut cost*. Nou konnen poudir i annan bann *screening camp* ki ganny organize par bann klinik prive, parey *Euromedical* apre Dokter Murthy.

Eski nou pe ankouraz plis sa bann kalite *screening camp*? E sa rezilta ki sorti kot sa bann Dokter prive la, eski Minister Lasante i konsider sa rezilta ki sorti kot sa bann dimoun ki partisip dan bann *screening camp*?

E dezyenmman, letan nou pe koz, *early detection*. Minis ou'n nonm bann ka ki erediter.

Nou konnen poudir parfwa i annan bann fanmir ki petet zot pli *prone* pou ganny kanser akoz sa i en *trend* dan fanmir.

Ki kalite program, *screening* ek *follow-up* ki nou pe fer – ki Minister Lasante i pe ofer sa bann dimoun? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Wi, nou konnen poudir i annan en kantite servis prive ki fer serten; sa ki zot dir *camp*. E zot fer serten tes lo bann dimoun.

An se moman, zot bann lenformasyon i reste avek zot. Me nou pe zwenn servis prive plis pou nou kapab demande. I annan de keksoz ki zot bezwen anvoy kot nou, dir nou bann lenformasyon ki zot kolekte.

E alor, pou bann ki zot vwar serten pozitiv tes, sa zot bezwen anvoye. Me nou pa *share* tou zot *data*. Selman sa ki zot, sa ki nou'n mete pou dir zot bezwen anvoye dan nou bann regilasyon, sa zot anvoy nou.

Ki nou pe fer pou sa bann dimoun? Parey mon'n dir; nou konnen poudir i annan dimoun ki annan de kanser ki nou kapab dir i erediter, i dan bann diferan *genes*. Sa bann dimoun

i bann ki nou donn zot plis priyorite pou sa bann tes.

Ki si i pou *mammogram*. Si i pou *ultrasound* tete. Si i pou fer *colonoscopy*. Tousala nou pe fer. Ou si non, *whatever endoscopy* ki nou santi – *examination* ki bezwen. Sa bann i ganny kriye i ganny fer.

Me i pou bann par egzanp ki fanmir i pros. Si en *sibling* i annan, e i annan en – e i en kanser erediter. E pou sanmenm sa rezon ki nou bezwen analiz tou sa bann kalite kanser pou regarde ki sa ki zot annan. Koman i ete pou nou kapab pran serten mezir pou nou detekte dan lezot fanmir. So, sa i en pe keksoz ki nou pe fer lo *screening* e deteksyon boner.

MR SPEAKER

Mersi Minis. Nou a pran kestyon Onorab Pillay.

HON SEBASTIEN PILLAY

Mersi Mr Speaker. Mr Speaker, dan son larepons, Minis in mansyonn plizyer *screening*. Plizyer tes. Nou ti'n – mon ti'n ganny serten lenformasyon ki ti annan retar dan rezilta bann tes ki *screening* ki serten dimoun in fer. Sirtou an relasyon avek bann madanm pou kanser kolmatris e kanser tete. *Pap smear*.

Eski sa retar in ganny rezourd, oubyen eski i ankor la? E ki zot pe fer pou asire ki bann madanm i – Akoz sa pe dekouraz serten madanm pou vin devan pou fer zot tes. E dan bokou ka, rezon akoz se akoz sa de; sirtou kanser tete.

Si zot - *early detection*, *then* i kapab annan lentervansyon ki ganny fer ki kapab sov lavi sa dimoun. So eski zot pe fer en keksoz pou zot dil ek sa sityasyon?

E, an relasyon avek *ear, nose and throat specialist*. Sirtou an relasyon avek bann size ki pou *involve* bann kanser lagorz. Eski Minister Lasante ozordi zot annan *ENT* ki pe komans vwar sa bann tes? E eski sa spesyalis pou osi *extend* servis pou al lo Praslin e lo La Digue? Mersi Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker. Onorab, mon ava komans avek ou dernyen kestyon. Wi, nou annan spesyalis pour *ear, nose and throat*. E nou kapab pe fer loperasyon pou sa bann keksoz koumsa ki lagorz.

Nou osi annan spesyalis ki nou apel; *head and neck*. E ki zot pe fer en pe -akoz en pe sa

bann loperasyon i pa fer par zis en spesyalis. I fer par enn de spesyalis.

Nou annan en spesyalis osi ki vin rann nou – i annan en kantite leksperyans, ki vin isi 2 fwa, 3 fwa depan lo kantite ki nou bezwen, pou vin fer bann gran loperasyon ki pli ekstansiv. E ki osi – *in fact* i fek vini resaman ankor. E, so nou annan en program an plas pou donn tretman tou sa bann dimoun ki bezwen.

Lo bout ki ou pe demann nou si nou annan retar avek serten tes. Nou ti annan en problem a en tan. Kan par egzanz; nou *mammogram* pa ti pe marse. E nou'n fer tou keksoz ki nou kapab pou fer li rearanze pli vit posibil. E an menm tan i annan lezot tes osi; parey *ultrasound* ki zot fer letan i annan bezwen.

Pou laspe *Pap smear* parey ou pe dir. Nou'n annan ankor serten *issues* avek *reagent*. Me lefe ki Dokter Louange i la e i plis dan sa *field*. Mon a demann li pou reponn Mr Speaker.

MR SPEAKER

Wi, Dokter Louange *please*.

CEO DANNY LOUANGE

Mersi Mr Speaker. Mersi Minis. Mersi Onorab. En bonzour tou dimoun. Wi, lo kote *Pap smear*

wi. In annan en pe *challenges* ki nou ti'n gannyen komansman lannen. Sirtou en pe lo *reagent* me selman plis lo *human resource* teknisyen pou fer sa.

Me sa in ganny rezourd. I annan en kantite *Pap smear* ki pe antre. E sa nou bezwen *continually* fer sir ki nou *clear* sa bann tes ki pe antre.

Lo kote *Pap smear*. I tre spesyalize e i en *process* ki i en pe dousman. Alor sanmenm sa ki - nou ti annan en *Cuban* spesyalis ki ti pe fer sa ki ti en *cytologist*. Letan in kit nou, zot pa'n ranplase. Alor, nou'n bezwen aprezan servi nou bann teknisyen ki ti osi ganny *trained* ladan, pou fer sir ki nou *clear* sa bann *cases*.

Aprè osi i annan teknisyen ki nou'n deza *train*, ki pe travay dan prive. Zot osi nou'n pe anploy zot lo *part-time basis*. Menm *after hours*, pou zot kapab *clear* sa bann *Pap smear test*. Mersi Onorab. Mersi Mr Speaker.

MR SPEAKER

Mersi. Permet mwan pas lo en lot kestyon. Mon a pran kestyon Onorab Vidot?

HON AUDREY VIDOT

Mersi Mr Speaker. Mon kestyon premye in reponn par – in ganny demande par Onorab

Pillay. Alors mon plito anvoy mon sizesyon konsernan bann *screening*. Eski i posib pou Minister Lasante dan zot kanpany, entansifye en partenarya avek bann lorganizasyon travay.

Pou ki i annan en kanpany nasyonal an referans avek *screening*, pou ankouraz bann travayer fer zot *screening* konsernan pou zot *Family Planning*?

Sa i ava entansifye petet lev en pti pe lo nivo bann msye osi. I pa zis madanm. Mersi.

MR SPEAKER

Mersi. Minis, ou ava adrese?

MINISTER PEGGY VIDOT

Mersi Onorab pou sa sizesyon. Wi, i en bon sizesyon, aköz nou pe deza pe esper en pe sa. Dan bann landrwa travay, nou annan sa ki nou apel an plas, en ‘*Workplace Wellbeing Programme*’.

E zisteman en pe sa ki zot pe fer. Parey ou dir, kekfwa nou’n konsantre en pti pe lo madanm pou sa bann kalite kanser. Me par egzanp; nou pe pran dan sak lorganizasyon kot i annan en dimoun ki pe travay dan *occupational health and safety* dan sa lorganizasyon.

Par egzanp; zot, zot pe kontinyelman anvoy nou bann

non pou bann dimoun al fer *mammogram*. Al fer bann keksoz koumsa. So, parey ou sizesyon. Nou ava elarzi sa. Fer sir ki nou annan pli gran kouver. Mersi.

MR SPEAKER

Mersi. Bon mon pou avans lo prosen kestyon. E sa i kestyon 84 ki en kestyon Onorab Churchill Gill ki pou ganny demande par Onorab Uranie.

I en kestyon spesifik lo Praslin. Baie Ste Anne *in fact*. Alor mon pou limit siplemanter en pe lo la. Onorab Herminie?

HON WILBERT HERMINIE

Mersi Mr Speaker. Kestyon 84, Onorab Churchill Gill Manm Elekte pour distrik Baie Ste Anne, Praslin i lir koumsa;

Eski Minis i kapab enform sa Lasanble kan ki travay i espekte konmanse lo *oxygen plant, clinical lab, laundry ek hyperbaric chamber* kot lopital Baie Ste Anne Praslin e kan i espekte fini? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Mr Speaker, sa proze pou Lopital Baie Ste Anne in ganny bidzete pou konmanse sa lannen an 2023,

avek en provizyon R4.5milyon. Minister Lasante an kolaborasyon avek Lazans Lenfrastriktir in travay lo konsep sa *projet*. In fer son *design*.

Aprè diferan konsiltasyon avek bann diferan travayer dan Baie Ste Anne Sant Lasante e diferan profesyonnel osi ki travay dan Minister. Nou'n arive aksepte en *design* ki in ganny aprouve. E Lazans Lenfrastriktir i pe fer tou prosedir pou soumet sa *projet* avek Lotorite *Planning* pou laprouvasyon.

Aprè ki tou sa bann preparasyon teknik i an konplete, nou ekspekte ki sa *projet* i ava ganny *tender* ver la *fin d'août*. E nou panse ki apre sa, travay i ava kapab ganny komanse an Oktob sa lannen.

Mon pou napa an se moman en dat fini, Onorab. Me mon panse ki dek ki kontrakter i avan ganny idantifye, nou ava pli fasil pou konnen konbyen letan i ava pe pran. Mersi.

MR SPEAKER

Mersi. Onorab Herminie, ou anna siplemanter?

HON WILBERT HERMINIE

Mersi Mr Speaker. Kestyon siplemanter Onorab Gill. Nou tou nou konnen ki sa kestyon lo

sa proze in kontinyen monte oparavan, detrwa fwa.

Onorab ti le konnen; kwa ki pe fer sa retar ki sa proze in tarde pou li komanse? E nou le ganny en garanti ki sa proze *by* lannen prosenn pou'n fini. Eski Minis i kapab donn nou sa? Mersi.

MR SPEAKER

Mersi. Minis, ou a adrese?

MINISTER PEGGY VIDOT

Mersi Onorab. Wi, nou'n ganny larzan sa lannen pou nou fer sa *projet*. E depi komansman lannen nou pe diskite. Oparavan plan ki ti annan sete pou fer zis *laundry* e annan en bout - e *hyperbaric chamber* ti pou pe fer en lot landrwa.

E anmezir ki bann dimoun – bann dimoun teknik in ale, zot in vwar landrwa. Zot in fer serten sizesyon avek nou. Sizesyon ki zot in fer, nou'n *go back* avek konsiltasyon avek diferan group travayer.

Ou konnen letan i annan en kantite konsiltasyon, sakenn group i vin avek diferan sizesyon. Alor zot in pran, zot in fer refer. Ti'n ariv en staz kot nou ti panse poudir tou dimoun in dakor. E nou ti pe kapab kontinyen avek sa *design*.

Me apre nou'n war poudir; bon, i annan lezot keksoz

teknik ki pou fer sa *design* pa marse. So, nou'n re *go back to the drawing board*. E la lafason ki *projet* i ete, i annakor avek tou dimoun ki pou pe servi sa landrwa. E i pou adres tou sa bann bout ki ou'n mansyonnen, Onorab. E nou konnen poudir lefe ki i deza pe al kot *Planning Authority*.

Si napa okenn problemm avek *Planning Authority*, sa proze i ava ganny demare sa lannen dek ki tender in ganny fer e ki kontrakter i ganny swazir. Mersi.

MR SPEAKER

Mersi Minis. Bon mon pou sey partaz bann siplemanter pou bann Manm ki pa'n ganny sans. Onorab Woodcock?

HON WAVEL WOODCOCK

Mersi Mr Speaker. Minis, mon ti avek ou dan en *meeting* ki ou ti fer avek bann *staff* lopital, Onorab Porice osi ti la. Kot ou ti donn en langazman, apre ki en *staff* ti demann ou; si bann promes ki'n ganny fer dan lepase ki pa'n ganny materyalize, ki si ou pou deliver lo sa bann proze ki pou plizyer lannen kestyon in vini dan Lasanble? Depi 6enm Lasanble anefe sa proze i lo Bidze.

Mon kestyon se ki; i annan *the local financing* pou sa

proze i 9milyon an totalite. Me pou sa lannen i annan en alokasyon selman R4.5milyon. Mon kestyon se ki; sa lannen ki bann louvraz ki pou demare sa lannen, e ki bann louvraz ki zot pou *postpone* pou lannen prosen? Ouswa si pou komans en bout sa lannen, apre pou konplet lannen prosen?

Ouswa si annan serten louvraz ki zot pou fer sa lannen e zot pou fer larestan lannen prosen? Zis en pe detay ki bann aktyel louvraz ki zot pou antreprann *in the near future*? Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker. Mersi Onorab. Wi, nou pe dir pou dir sa bann louvraz ki in site, ki nou'n diskite parey ou dir Onorab. Letan nou'n ale avek tou bann Onorab pou Praslin ki nou'n vizite, nou'n vwar.

Akoz konsiltasyon nou pa'n fer zis avek travayer lopital. Nou'n osi fer avek Onorab – bann Onorab Praslin. Bann *MNAs* Praslin, pou war ki sa ki annan pou fer. Ki mannyer pou fer. Kote pou fer. E ki nou tou nou'n tonm dakor pou dir; wi, i ava en fason pou nou

proceed. Sa nou kapab asir ou poudir i pou ganny fer.

Kan mannyer - ki bout ki pou ganny fer? Mon napa sa lenformasyon teknik. Me mon konnen Dokter Louange ki'n pli diskite avek Lazans Lenfrastriktir, i ava kapab kekfwa donn nou en pti apersi. Mr Speaker si ou permet?

MR SPEAKER

Mersi Onorab. Mersi Minis. Dokter Louange?

CEO DANNY LOUANGE

Mersi Mr Speaker. Mersi Onorab. Mersi Minis pou pas sa kestyon avek mwan. Sa kestyon i teknikal. E sanmenm sa nou pe travay avek SIA, Lazans Lenfrastriktir.

E pou kapab reponn ou kestyon, i pou dan *scope of works*. E sa *scope of work* pou kapab donn nou sa bann detay ki kantite travay ki nou kapab fer sa lannen. So nou'n bidzet 4.5milyon, pou nou kapab fer sir ki nou demar sa proze.

Pou kapab reponn larepons. Pou kapab donn ou en larepons pli kler i pou sa *scope of work*. Mersi Mr Speaker. Mersi Onorab.

MR SPEAKER

Mersi. Onorab Porice?

HON DOYACE PORICE

Mersi Mr Speaker. Bonzour tou mon bann koleg MNAs. E Minis ek son lekip. Minis, lo size sa *oxygen plant, clinical lab, laundry ek hyperbaric chamber*. Sa bann proze ti'n ganny bidzete depi pou lannen 2020. E i pa'n zanmen demare.

Minis Adam dan 6enm Lasanble ti donn en lasirans ki sa bann proze ti pou ganny antreprann 2020. Mon kestyon; eski pou aranz sa *hyperbaric chamber*, nou pou bezwen bann teknisyen Katari? Par lefe ki se zot ki ti fer donasyon. Me naryen pa'n ganny fer.

Eski larzan ki'n ganny bidzete sa lannen i ase pou konplet sa bann proze? Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker. Onorab, wi. Nou annan en kantite travay ki nou bezwen pe fer, parey nou ti eksplike letan nou ti fer vizit ansanm.

E, wi i annan en kantite travay osi teknik. Sirtou avek *oxygen plant* an menm tan avek *hyperbaric chamber*. E nou napa teknisyen. Nou napa teknisyen. Nou napa enzenyer pou travay tro pre lo sa *hyperbaric chamber*.

E ler sa ti ganny en donasyon, ti annan en lagreman ki sa pou ganny, si oule, mentenir par *Qatari* Gouvernman ki ti donn nou sa don.

Nou pou bezwen zot pou fer *the chamber* marse. E sa i keksoz ki nou deza an kominikasyon. E zot osi zot in war sa bout kote ki nou pe met sa *chamber*. Wi, e sa nou pe kapab dir ou.

Larzan ki nou bezwen i plis ki sa ki nou annan sa lannen. Me selman sa ki nou annan sa lannen i a ganny servi pou nou kapab komanse. Me lannen prosenn parey dan *budget* letan i aprouve, i aprouv pou 2023/2024. I pe – in propoz pou 2024.

Proposal pou 2024 se ki nou a ganny sa lanmwaye. Akoz parey Onorab taler i dir; i a vin pou 9milyon. Nou a ganny sa 4.5milyon pou ed nou fini sa *projet*. Mersi.

MR SPEAKER

Mersi. Mon a pran kestyon Onorab Vidot?

HON AUDREY VIDOT

Minis, antretan ki bann pasyan Zil Pros – Praslin/La Digue, zot pa kapab – zot pa ankor kapab servi sa bann fasilite. Zot bezwen depan lo lopital Sesel.

Espesyalman sa *hyperbaric chamber*. Nou konpran poudir sa enn Mahe i deza annan problemn avek.

Kan ki – eski problemn in fini rektifye? Kan ki pou rektifye? E ki travay ki zot e prepar zot ki letan zot pou met sa enn an plas Praslin, pou asire ki omwen zot annan enn ki marse ler enn i an servis? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Onorab, dan tou sa bann keksoz la. Par egzanz; *clinical lab* nou annan Praslin an se moman e sa pe fonksyonnen byen. Me selman landrwa i en pe pti, pti pou kantite masin e pou nou kapab agrandi servis.

Laundry i pe ganny fer e sa pe fonksyonnen. *Hyperbaric chamber*, so far nou pa'n zanmen ofer sa servis Praslin. I prezan ki nou pe al komans li.

Me problemn ki ou'n fer remonte avek *hyperbaric chamber* isi Mahe; wi, *chamber* i marse, selman in ariv son ler pou fer gran *servicing*. E pou sa rezon nou pa oule tro pous li pangar dan pous li nou ava ganny en problemn avek.

Me nou annan en lot *hyperbaric chamber* ki si sa enn i ariv en problemanm avek, nou annan en *hyperbaric chamber* dan Lopital Lafanmir ki Perseverance. E tou kou nou kapab asire poudir dimoun ki pou bezwen sa servis i pou annan enn ki marse lo pei. So, sa enn *Family Hospital* i an *full* operasyon. Mersi.

MR SPEAKER

Mersi. Onorab?

HON AUDREY VIDOT

Vreman vit Mr Speaker.

MR SPEAKER

Wi ale. Vitman, vitman.

HON AUDREY VIDOT

Minis, vi ki ou'n dir pou dir i annan sa enn Perseverance kot Lopital Lafanmir; aköz nou konnen i annan pasyan ki pe konplent petet pe dir randevou i tro lwen.

Eski zot pe entansifye pou servi sa enn laba? *Please*. Mersi.

MR SPEAKER

Minis, dan en fraz silvouple?

MINISTER PEGGY VIDOT

Onorab, nou pa pou kapab bouz sa enn ki Perseverance. Nou pou bezwen pe kit li laba.

So, si fodre pasyan i al laba, nou pou bezwen pasyan i ava vwar en fason anmenn zot lekor kote laba. Mersi.

MR SPEAKER

Mersi. Bon, Onorab Cosgrow in lev son lanmen 3 fwa. Mon a donn li en posibilite. Ou la? Onorab Cosgrow. Fer ou kestyon kourt.

HON WALLACE COSGROW

Mersi Mr Speaker. Mr Speaker, mersi pou donn mon laparol apre midi,. Mr Speaker, mon ti a zis kontan demann Minis; an vi ki dan son 2 kote i annan *PS* avek *CEO* ki'n la pou en pe letan.

Si i kapab donn nou leksplikasyon aköz petet - parey Onorab Porice in dir; Minis Adam ti donn en komitman. Si i kapab dir nou aköz petet pa'n kapab delivre pandan sa bann letan? Eski *COVID* ti annan en lenpak lo *delivery* sa proze pou li konplete? Mersi bokou.

(laughter)

MR SPEAKER

Mersi. Minis? Bref *please*.

MINISTER PEGGY VIDOT

Mersi Mr Speaker. Mr Speaker, wi nou annan dimoun ki'n la pandan sa letan. Wi nou

konnen poudir an 2021 ek 2022 ler nou ti an plen COVID, ki en kantite keksoz pa'n kapab ganny fer. Enkli 2020.

Be si sa proze pa'n ganny fer aköz sa rezon, i pa neserman en keksoz ki kekfwa mon 2 teknisyen i kapab toudswit fer resorti.

MR SPEAKER

Mersi. Mon a pas lo prosen kestyon. Onorab Churchill Gill i annan ankor 1 kestyon. E sa se limero 85. E se Onorab Uranie ki pou demann son kestyon.

HON ROCKY URANIE.

Mersi Mr Speaker. Mr Speaker kestyon pou demande i Onorab Churchill Gill, Manm Elekte pour Bai Ste Anne. Ankor enn fwa, Minis ek ou delegasyon, bonzour.

Pour siport pasyan sorti Praslin ek La Digue ki admet dan lopital Sesel, ki Minister i kapab fer pou zot pros, ki akonpany zot ki napa landrwa konvenab pou dormi aswar e zot bezwen dormi lo sez oubyen lo sofa dan lopital? Mersi.

MR SPEAKER

Mersi Onorab. Minis?

MINISTER PEGGY VIDOT

Mr Speaker. Byennet bann pasyan ki sorti Praslin ek La

Digue pou admet dan Lopital Sesel, e zot pros ki akonpany zot in touzour en konsern pou Minister Lasante.

Alor pou nou, nou ed bann paran ki pe akonpany zot zanfan ki anba 18an. E nou donn zot en tiket pou vini e pou retournen.

Pou bann pasyan osi ki pe vwayaz zot tousel e ki zot annan en serten bezwen, sirtou en dezabilite, nou osi ed zot avek pasaz ale retour. Pou bann ki annan dizon en problem lasante mantal osi nou ede dan sa fason.

Pasyan i toultan nou responsabilite. E nou pou fer sir kan en pasyan ki bezwen sorti Praslin/La Digue, ouswa nenport Zil Pros, ki bezwen tretman dan Lopital Sesel. Ki nou pou fer sir ki nou anmenn li dan dele letan pli vit, pli kourt, pli konvenab.

Me nou konnen osi ki zot pros ki akonpany zot, zot osi annan serten bezwen. An se moman, i pa posib pou Lopital Sesel fer provizyon pou landrwa dormi pou dimoun ki akonpany zot pasyan ki sorti Praslin ouswa La Digue.

Grander avek striktir nou lopital, e fonksyonman bann *ward* pa permete pou nou kree en tel fasilite dan batiman

lopital ki nou annan an se moman.

Sepandan, ler nou annan en pasyan – en kondisyon en pasyan i tel ki sa fanmir i santi i bezwen reste o bor sa lili, nou esey nou mye pou donn li en landrwa asiz ki pli konfortab, ki pli konvenab.

Nou pe regard osi posibilite pou nou annan *camp beds* pou bann manman, bann paran. Pa zis manman akoz i annan papa osi ki reste avek zanfan dan *Children's Ward*. So, nou pe esey nou mye.

Mon konpran ki sa sityasyon i pa ideal. E petet i neselit bokou plis revi lo en baz pli gran, pli diskisyon; ki nou ava vwar ki mannyer keksoz i kapab amelyore pou nou anmenn, si oule – adres sa bezwen.

Me nou espere ki dan fitir, kan bann prosen striktir batiman i ganny fer o bor *NHSS*, ki i pou annan sa konponan en *hostel* ladan. Kot bann dimoun ki anvi reste pre avek zot pros ki lopital, zot a kapab si oule, lwe enn sa bann landrwa, sa bann lasanm pou zot kapab pli pre e pli pros.

Me pou le moman, nou striktir lopital, pa permet nou annan landrwa pli konvenab pou bann pros dormi o bor zot malad. Mersi.

MR SPEAKER

Mersi Minis. Siplemanter Onorab Uranie?

HON ROCKY URANIE

Mersi. Minis, parey ou okouran, sa i pa fer premye – pa premye fwa sa kestyon i ganny demande. In toultan en konsern. Sa ki ou pe dir la; eski sa i en garanti ki i pou annan sa *hostel* pour sa bann dimoun ki akonpanyi zot pros lopital?

E apre mon lot kestyon, dan limedya, nou war bann madanm ansent, bann fiy ansent ki sorti La Digue. E ki ganny demande pou vin Mahe pli boner. E zot osi zot war zot bezwen – zot deza napa bokou mwayen.

Zot war zot bezwen al lwe *guest house* pres 2 semenn avan ler zot *due*, zot ganny admet lopital. Eski napa naryen zot kapab fer pou sa bann madanm e fiy ansent dan sa sityasyon dan limedya? Mersi.

MR SPEAKER

Mersi. Minis ou a adres sa 2 pwen silvouple?

MINISTER PEGGY VIDOT

Mersi Mr Speaker. Onorab, i dan nou plan. Me parey ou konnen, napa naryen ki ou kapab dir ou garanti pou ou fer.

Me selman i dan nou plan. Nou plan ase imedyà.

Me pou bann madanm ki vini pou ganny baba; bann ki bezwen ganny ospitalize, zot ganny pran dan *ward* dan lopital.

Me pou bann ki pe vini ki pe atann, an se moman, malerezman nou napa naryen ki nou pe kapab ed zot avek. Me si bann ki zot dir zot napa okenn landrwa ki zot in vini, ki zot kondisyon i demande met zot dan *ward*, zot ganny mete. Mersi.

MR SPEAKER

Mersi. Mon a pran kestyon Onorab Pillay. Ed nou pou al vit Onorab.

HON SEBASTIEN PILLAY

Mersi Mr Speaker. Mr Speaker, zis parey taler ler mon ti demann sa kestyon Minis regarding bann tes ki an retar pou *Pap smear* ki mon ti oule konnen si zot pe dil ek sa *backlog* la? Si zot pe vin dil ek sa *backlog*?

Dan sa konteks i menm parey. En pasyan ki vin lopital - e mon oule ki dimoun i konpran byen - ler en pasyan i antre lopital, fanmir sa pasyan i devret annan sa konfyans ki ler sa pasyan i dan lopital, i pe -

konmsi aköz i annan tout en sistenm servis *monitoring* ki la.

Me sa ki nou pe konstate Mr Speaker, mon oule met a devan Minis se ki; i annan sa, si oule, sa konsern lo lapar sa dimoun ki son paran, son pros i lopital. Zanfàn nou konpran paran i akonpanyi li. Me zot le la.

So, eski ou'n fer okenn travay pou sey etabli, si sa lanvi par bann dimoun ki akonpanyi zot pasyan pou reste lopital pou la avek zot, i pa pe petet en lendikasyon en lot problem, en lot konsern dan servis swen lasante ki petet i devret ganny adrese?

Mon pa konnen. Petet, kekfwa bann *staff* Servis Swen Lasante zot menm zot, zot fatige. Zot in donn en kantite pandan letan *COVID*. Zot pa ankor vreman ganny letan - en *breather* pou zot poze.

So, tousala i bann kestyon ki; eski zot in konsider sa koman en problem - Pa zis pou dil avek en problem fizikman fer en *hostel*. Me en problem plito pli larz lo ki mannyer zot kapab fer pou zot sey dil avek bann konsern ki dimoun pou annan?

And then mon dezyenm kestyon Mr Speaker. E sa i vreman enportan. Mon'n ekout byen larepons Minis *regarding*

bann dimoun ki pe vin lopital. Be si nou pran konsep en dimoun ki al trete aletranze ki al fer loperasyon. E pou en dimoun ki pe sorti La Digue pe vin fer en loperasyon Mahe, i apepre menm konsep, non?

Akoz Mahe sa dimoun i kapab *drive* al kot lopital, al vwar son fanmir. So, sa ki nou pe demande se; eski zot in komans sa konversasyon pou vwar – lefe ki servis ki nou pe ofer i sipoze vin pli o – pli o nivo.

Pou nou konnen ki mannyer nou akonpany bann lezot dimoun ki la pou donn en sipor moral. En sipor psikolozik sa pasyan ki kapab ed li pou li *recover* bokou pli vit ki dan en lot konteks. Mersi Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker.

MR SPEAKER

Onorab Cosgrow ek Onorab Loizeau, zot anvi koze? Zot pa anvi al deor al fer en konversasyon?

(laughter)

MR SPEAKER

Mersi. Minis?

MINISTER PEGGY VIDOT

Onorab, wi. Eski nou'n regarde si rezon akoz dimoun i anvi reste ek zot pros i en keksoz ki annan en rasin pli fon, diferan?

Mon konpran kekfwa ki ou pe dir ki dimoun i konsernen ki zot pos pa pe ganny latansyon ki i bezwen. Me mon mon'n travay dan servis lasante pou en kantite letan. E mon konnen poudir souvandfwa kan ou annan en dimoun ki malad, zot pros zot anvi reste o bor. I en keksoz osi nou kiltir.

E ki i enn kekfwa rezon predominan akoz dimoun i santi zot anvi reste avek bann dimoun. Eski dimoun zot krwar zot pa pou ganny sa swen e zot pa ou la ler zot kriye pou *staff* lasante vin kot zot? Nou pe regarde si sa i leka.

Nou pe fer sir ki nou annan pli bokou *supervisory visits*, e ki nou pe demann pasyan plis. Koumsa ki nou pe reasir dimoun poudir si ou la lo sa lili, ou kriye, i pou annan en keksoz ki pou pe ganny arive. Dimoun pou vini pou vin donn ou.

Nou pe travay pou nou amelyor nou kalite servis. So, tousala pou nou donn dimoun plis konfyans dan sa servis. Me sa problemn i en problemn ki lontan i la. Ti annan en letan kot nou pa ti les dimoun reste

dan lopital ditou. Ou vini ou vin get ou pasyan. 5er diswar ler i dir ou ler vizit i fini, tou dimoun ale.

Nou rekonnet ki vizit i osi par tretman e nou'n elarzi ler vizit. E alor ki dimoun i kapab reste pli lontan avek zot dimoun.

Nou osi remarke poudir i annan dimoun ki anvi pre ek zot dimoun dan en sans kan sa dimoun i malad. Sirtou i malad en pe kritik. E nou lese. Nou les reste.

Me, sa lenfrastriktir lontan i la. Nou pe regarde si nou pe fer en lot. Me pou le moman la fason ki i ete, i pa permet nou annan lot kalite laranzman pou nou ed sa bann dimoun ki pe reste avek zot pros.

MR SPEAKER

Mersi Minis. Nou a pas lo prosen kestyon. Onorab Andy Labonte, Kestyon 86.

HON ANDY LABONTE

Mersi Mr Speaker. Kestyon 86 i lir koumsa;

Eski Minis i kapab enform Lasanble:

A. Lo kriter ki ganny servi pou ranbours fanmir bann pasyan ki deside al fer tretman aletranze?

B. Lakantite letan ki i pran pou aprouv sa ranboursman e kantite letan i pran pou fer sa ranboursman apre ki sa desizyon in ganny aprouve? Mersi.

MR SPEAKER

Mersi Onorab. Minis, repons *please?*

MINISTER PEGGY VIDOT

Mersi Mr Speaker. Mr Speaker, kot i konsern ranboursman pou tretman ki pasyan i al fer aletranze lo zot menm. Nou ganny gide par *Overseas Treatment Act* 2018. An partikilye Seksyon 12 ki fer referans lo ranboursman.

Koman en lareg zeneral, pasyan ki deside al fer tretman aletranze san aprouvasyon *Board*, zot pa sipoze ganny ranbourse. Nou get li koman, si oule, en fason kot dimoun i envestir dan zot lasante.

Me i annan selman, bann kondisyon kot *Board* i konsider en ranboursman ler i ganny fer – sa *request* i sorti kot sa bann pasyan e sa i enkli;

Kot en dimoun i tonm malad aletranze e i bezwen en tretman irzan ki pa ti pou kapab ganny ofer isi. Dimoun i merit ganny ankouraze toultan pou pran zot lasirans ki ava kouver sa. Me dan sa ka, en

demann i ganny fer e i ganny konsidere par *Board*.

Kot en dimoun i al rod en dezyenm lopinyon aletranze, e i ganny dyagnostike avek en kondisyon ki konpletman diferan avek sa enn ki ti'n gannyen isi. E ki i bezwen en lot kalite tretman.

Kot en dimoun i al fer son *check-up* rutin, e i ganny dekouver pou annan en kondisyon ki neselit en tretman irzan, ki pa ti pou kapab ganny ofer isi.

Dan ka kot *Board* i refize pou aprouv en ka. Me apre en swa *appeal* kot *Board*, sa pasyan i al rod en lopinyon e i konfirman ki desizyon *Board* pa ti zistifye dan sa bann ka zot kapab ganny ranbourse.

La kantite letan ki i pran pou aprouv sa ranboursman, e kantite letan ki i pran pou fer sa ranboursman apre ki sa desizyon i ganny pran, aprouve, sa i varye lo diferan keksoz.

Mr Speaker, ler en demann i ganny fer pour - en laplikasyon i ganny fer, *Board* i fer sir ki i rod tou bann dokiman e fer sir ki tou bann dokiman i annord.

Savedir ki *form refund* in ganny ranpli konpletman. Ki tou bann resi orizinal i la. Bann diferan detay labank. Bann diferan detay kot lopital ki zot in

sonnyen. Bann diferan nimeron kontak. Bann diferan rapor medikal ki i neseler, in ganny soumet, la *Board* i komans en prosedir.

Zot plas - *allocate* sa ka avek enn sa manm *Board*, ki fer en travay lo sa *case* ki pran tou bann lenformasyon neseler dan *medical reports*. Swa bann ki nou annan isi, bann ki sa dimoun in anmennen. I fer en *complete profile* e li sa manm i vin prezante avek *Board*.

E sa i pran en pe dele letan akoz sa *Board member* i osi en travayer dan servis lasante e en spesyalis dan mazorite letan. E nou kapab dir sa i ava pran 1 a 2 *mois* pou li kapab fer sa. Si tou dokiman i annord.

Si i annan dokiman ki zot bezwen demande; swa aletranze, swa avek sa pasyan, swa rode isi. I kapab pran en pe plis. Apre ki *Board* in fini fer sa kalite deliberasyon, e zot in ariv lo en rezilta. Zot kominik sa avek sa dimoun - sa dimoun ki'n fer sa *request*. E sa zot ganny anvoye.

E sa let ki zot, zot ekrir sa dimoun ki normalman sa let i ganny sinyen par *Chairman* sa *Board*. I ganny osi anvoye kot Finans pou Finans komans prosedir pou ranbours sa dimoun.

E ankò nou konnen en dele letan i pran annandler ler sa let i arive kot Finans, avan ler finans i fer sa ranboursman. So, Mr Speaker, sa i mon larepons.

MR SPEAKER

Mersi. Wi, ou siplemanter Onorab Labonte?

HON ANDY LABONTE

Mersi Minis pou ou larepons. Bon Minis, sa i en kestyon ki vreman esansyel, ki enportan. Akòz mon konnen bokou pasyan la deor i en portan pou zot konnen. Ou en mannyer i en fason pou anpes labi osi.

Dan sa laliny ou'n nonm 3 kategori ki partikilyerman ki ganny asiste. Me dizon poudir en kondisyon ki *Board* li menm li in aprouve pou dir sa pasyan i merit al trete aletranze. Me selman i zis ki pou serten rezon i annan serten *delay*. Me li sa zabitan i santi i annan larzan, i kapab fer li pli vit. Ler i ariv laba i war poudir son kondisyon ti vreman grav. E i komans son tretman. I retournen i anbourse.

Ou'n dir pou dir i pran apepre en mwan. Me i annan serten ka par ler pou serten rezon petet en dimoun in fer sa laplikasyon, i pran plis ki 5 mwan pou li ganny en repons

oubyen en *acknowledgement*. I zis pe tournen. I pa pe ganny en larepons.

I annan serten ka parey ki ou menm ou, ou okouran. E ler dizon sa dimoun i refer *appeal*. Ki kantite letan osi i pran ki i ganny en repons pou *appeal* ki sa endividi in fer pou sa ranboursman?

Aprè anpasan Minis, dizon en pasyan i desede aletranze, eski i annan serten keksoz ki...? Sa, pou lenformasyon piblik la deor. Mersi.

MR SPEAKER

Mersi. Minis, si ou kapab adrese?

MINISTER PEGGY VIDOT

Mersi Onorab. Wi, Onorab. Wi mon konsyan ki annandler sa bann ka i pran bokou plis letan ki sa *2 mois* – en *mois* 2 mois ki nou'n dir. E pou sa, nou pe fer sir ki nou pous en pe pou fer sir ki nou diminyen sa letan *as much as possible*. Pou fer sir ki dimoun ler in fer en *request*, zot ganny zot repons ase vit.

Me i annan deka ki sa i prolonze, akòz i annan serten dokiman ki pa neseserman annord. E sa i pran plis letan pou dimoun al gete.

Lo ki kantite letan i pran pou en *appeals* ganny fer? I en pe menm prosedir. Akòz *appeal*

zot pou bezwen al ankor, regard tou lezot keksoz. Menm vwar pou ki rezon ki *Board* in refize. E sa osi i kapab pran en pe plis letan ki i pe pran normalman – ki i pe pran pou premye demann.

Me parey mon'n dir, nou pe revwar, nou pe fer sir ki sa i ganny, si oule, amelyore. Ki sa servis i ganny amelyore. E ki dimoun i a kapab ganny en repons pli vit posib.

Si konmela en dimoun, *Board* in aprouve. Me selman nou, nou pa ankor fini avek bann prosedir pou li ale, i deside ale, eski pou annan en *refund*? Ankor *Board* i ava konsidere. Si in fini aprouve. Me selman laprouvasyon i pou al dan serten sant.

Si konmela nou, nou pe servi en sant parey dizon; Lenn ou si non, *Sri Lanka*, e li sa dimoun i deside pe al *Allemagne* kot tretman i bokou pli ser. *Obviously Board* pou bezwen pe ranbours li zis sa ki nou, nou ti pou'n peye dan sant kot nou, nou pe – nou ale. So, i annan tousala osi ki nou bezwen balanse letan sa bann *request* i vini. Mersi.

MR SPEAKER

Mersi Minis. Kestyon Onorab Hoareau?

HON JOHN HOAREAU

Mersi Mr Speaker. Mr Speaker, mon ti le konnen par egzanp si en dimoun in al en konze deor, in tonm malad deor. E sa kalite maladi ki'n gannyen – ki'n arive gannyen, i enn ki kapab sonnyen isi Sesel. *Ok?* I pa enn ki pa kapab sonnyen isi Sesel. I enn ki kapab sonnyen Sesel.

Me selman lefe ki in tonm malad deor, e in fer serten tretman ki son konze in pli long, e eski i pou ganny ranbourse? Apre osi, eski i ann deka ki zot ranbours parsyelman, oubyen se tou ka ki zot ranbours *fully*? *Ok*, mersi.

MR SPEAKER

Mersi. Minis?

MINISTER PEGGY VIDOT

Mersi Onorab pou ou kestyon. Si konmela en dimoun in al deor en konze e i tonm malad. Dizon sa malad i en malad ki zis i bezwen ganny vwar par en dokter. *Let's say* i en *asthmatic*, son latak i vin pli for e i bezwen rod lasistans medikal.

Obviously sa i pa pou en keksoz ki *Board* pe regarde koman en keksoz ki pou pe ganny ranbourse. E pou sa rezon ki nou, nou konsey tou dimoun ki pe voyaze. Fer sir ki zot annan en *medical insurance*. Akoz tretman dan diferan

landrwa i kantmenm ase ser. E sa i ava kouver zot pou sa bann evantyalite.

Si i tonm malad. Par egzanp; i ganny en latak leker ki i bezwen fer dizon en *bypass*. E i *advise* nou poudir son fanmir ki ek li, entel in tonbe. Sa ki zot pe propoze. Eski i pou ganny en *refund*? Si i peye i vini. Wi *according* to sa, i pou ganny en *refund*.

E me selman si, parey in arive diferan ka; ki sa dimoun i napa sa larzan, ou si non son lasirans pa ase pou kouver sa fre. I pran kontak ek nou, e nou, nou ganny en rapor medikal ki prouve poudir i bezwen sa lentervansyon, tre vit. I irzan! Wi, *Board* toudswit i donn laprouvasyon pou – ganny kouver par *Overseas Treatment Board*.

Alor si ranboursman i toultan konplet pou antye ou si non parsyel, sa i en desizyon ki *Board* i pran baze lo sa ki zot in gannyen koman diferan *request*. Akoz i annan dimoun osi ki zot *request* i demann ou zis parsyel. Mersi.

MR SPEAKER

Mersi. Bon mon termin sesyon kestyon la. Mon remerisye Minis ek son delegasyon pou zot partisipasyon. E mersi bann Manm pou zot kestyon.

Lasanble a pran poz pou dezennen e nou a rebran travay 2er. Mersi.

(BREAK)

Mr Deputy Speaker in the Chair

MR DEPUTY SPEAKER

Bonn apre midi tou Manm Onorab e bann Manm *Secretariat*. Byenveni dan kontinyasyon nou travay pou ozordi apre midi. E nou travay i prensipalman en Mosyon ki lo nou *Order Paper*.

Avan mon donn laparol loter Mosyon, mon ti ava zis kontan zot zwenn mwan, pou nou fet bonn fet laniverser en Manm Onorab ki selebre son laz ozordi. Se Onorab Waven William. Alor mon ava dir li bonn fet laniverser e tou de bon.

(APPLAUSE)

MR SPEAKER

Donk. Aprezan mon ava envit Onorab Naddy Zialor pou prezant Mosyon avek Lasanble.

HON NADDY ZIALOR

Mersi Mr Speaker. Bonn apre midi tou dimoun. Mr Speaker, ann akordans avek *Standing Order* 42 (2).

Mosyon ki mon pe soumet devan Lasanble Nasyonal Sesel

i lir; Lasanble Nasyonal pe demann avek Leta pou konsider en kad legal pou dimoun ki pe viv avek en dezabilite e osi en nouvo Polisi nasyonal pou garanti en sosyete pli enkliziv. Mon soumet mon Mosyon Mr Speaker.

MR DEPUTY SPEAKER

Mersi Onorab. E lekel ki annan lentansyon segonn Mosyon? Onorab Doyace Porice?

HON DOYACE PORICE

Mersi Mr Speaker. Bonn apre midi *a tous*. Mon segonn sa Mosyon. Me mon rezerv mon drwa prezantasyon pou en pti pe pli tar. Mersi.

MR DEPUTY SPEAKER

Mersi Onorab. E alor mon ava envit loter Mosyon pou fer son lentervansyon. Lentrodiksyon silvouple?

HON NADDY ZIALOR

Mersi Mr Speaker. Manm Lasanble Nasyonal, ser, frer Seselwa. Mon bann zanmi ser frer ki pe viv avek en dezabilite, bonn apre midi.

Mon soumet en Mosyon devan Lasanble Nasyonal Sesel ozordi koman en Manm sa 7enm Lasanble ki pe demann avek Leta pou konsider en kad legal pou dimoun ki pe viv avek

en dezabilite. E osi en nouvo Polisi nasyonal pou garanti en sosyete pli enkliziv.

An premye lye; ki savedir en dimoun ki pe viv avek en dezabilite? Kwa ki defini en endividi letan i annan en dezabilite? Ki garanti e mekanizm ki annan an plas pou fer sir ki sa dimoun ki pe viv avek en dezabilite, i viv dan en fason ki ekitab e egal osi enkliziv?

Kote nou sorti? Kote nou ete? E ki direksyon nou anvi arive koman en Leta an sa ki konsern Polisi e kad legal pou ki sa dimoun ki pe viv avek en dezabilite i vwar li form parti antyerman nou sosyete?

Mr Speaker, Ser Onorab, Pep Seselwa, en dimoun ki pe viv avek en dezabilite, dan en term senp, i ganny defini koman en dimoun ki son kondisyon lespri ouswa lekor pa permet li fer serten aktivite, ouswa enterakte. Oubyen menm partisip o *maximum* otour sa lanvironnman ki i vwar li i trouve ladan.

Annefe, i annan plizyer kalite ouswa kategori dezabilite. I kapab en dezabilite vizyon, mouvman, panse, difikilte laprantisaz, komunikasyon, lekout, mantal, e parfwa menm, difikilte pou sosyalize.

Annefe, pou plizyer deseni, dezabilite in en *taboo* otour lemond kot sa group dimoun in ganny oprese. Wi, nou'n ganny oprese. Stigmatize, diskriminen e ganny regarde koman en fardo pou sosyete e lemond.

Souvandfwa nou'n ganny apele plizyer non. E ganny kasyet dan lakour san konnen ki savedir devlopman e lepanouisman. E menm form parti lemond, Mr Speaker.

E devlopman lemond, bann tel *taboo* e baryer ti komans ganny koz lo la. Kot pei e lemond in rekonnèt ki ti annan en nesosite pou nou sanz fason panse e fason azir, an sa ki konsern sa group dimoun.

Bann dimoun ki pe viv avek en dezabilite zot menm, ti vin devan e komans fer konpran lemond e bann dirizan, ki zot bezwen ganny rekonnèt e ganny aksepté. E la mouvman pou etabli Konvansyon Drwa bann Dimoun ki pe viv avek en Dezabilite ti komanse. Avek en slogan; *“Nothing about us without us”*.

Pep Seselwa. Ser frer ki pe viv avek en dezabilite. Sesel i garanti anba nou Konstitisyon ki i nou Lalwa siprenm. I garanti ou proteksyon. Ou ki pe viv avek en dezabilite, e osi ou

ki sa dimoun aze. E sa i ganny trouve anba Lartik 36.

Koman en pep, nou'n osi donn nou komitman atraver sinyatir e ratifikasyon Konvansyon bann Drwa pou bann Dimoun ki pe viv avek en Dezabilite, an 2009.

E la fodre mon rekonnèt ki depi adoptasyon sa konvansyon, in annan en transformasyon ase signifikan dan nou lavi, e dan lavi pou tou bann ki pe viv otour nou. La, Konsey Nasyonal pour bann Dimoun avek Dezabilite ti sa gardyen ki ti transform sa konvansyon kot nou'n vwar en versyon an Kreol. En versyon senplifye. Kot nou'n osi vwar plizyer lanfaz ganny mete pou nou annan en model pli sosyal dan plas medikal.

Kot Leta in vwar – in vwar li nesese pou enkli bann dimoun ki pe viv avek en dezabilite dan bann desizyon. Kot bann dimoun ki pe viv avek en dezabilite i rezouir menm drwa egal avek tou lezot dimoun. Ki swa; ledikasyon, lasante, lanplwa, sport. E menm pou viv en lavi enkliziv sosyalman.

Dapre statistik, i annan environ 1920 dimoun ki pe resevwar en benefis dezabilite. E ladan apepre 301 zanfan ki par anba 18an. Sak sif i en

imen. Sak limero i en endividi ki annan en rev, ki anvi vwar li annan menm loportinite. Sak zanfan i en endividi ki anvi rezouir dan en sosyete egal avek menm drwa.

Annefe, Sesel i fyer ler nou vwar en zenn zanfan endividi ki pe rezouir son ledikasyon dan *main streaming* avek menm si i pa vwar kler.

Letan pou premye fwa dan listwar Sesel, nou vwar en pei parey Sesel annan reprezantasyon en dimoun ki pe viv avek en dezabilite dan brans lezislatif. Sa i montre ki nou'n reisi sirmont baryer.

Wi Mr Speaker, ler nou vwar nou paviyon flote – flote byen o. E nou vwar nou bann dimoun ki pe viv avek en dezabilite anmenn meday lor dan *Special Olympic*.

E la, lo non Lepep Seselwa, mon ti a kontan felisit zot tou. Zot tou ki'n fer Sesel fyer. E wi, zot bezwen lezot merit laplodisman Sesel, Mr Speaker. Me nou pa ankor ariv ver sa krwaze semen.

Malgre tou sikse ki mwan avek ou, nou pe sirmont lavi. Me pou bokou, i ankor annan defi. I ankor annan baryer ki egziste malgre sansibilizasyon vizavi konvansyon, ki reste zis en komitman. Nou pa ankor arive fer sa krwaze semen Mr

Speaker. E la, la rezon mon Mosyon.

Dan sa nouvo souf ki lemonn in prouve ki atraver domestikasyon konvansyon, e annan en kad legal. In anmenn en vre aksyon e vre transformasyon dan lavi nou bann frer. Mon leksperyans in permet mon vwar ki en tel zouti kad legal in transform bann pei, parey; Zapon e Lanmerik.

Lanmerik i annan en *Disability Act* pou plis ki 25an. In transform sa pei. E Zapon i sa model ideal pou ou ki annan en dezabilite si ou anvi viv en lavi endepandan, Mr Speaker.

Bann Polisi nasyonal ki Sesel in annan, ki konsern enklisivite i date depi 2014. Ki swa; lanplwa. ledikasyon, ki pli spesifik, e sa Polisi nasyonal. Alors i nesese ki apre pres ki 10an, Sesel i met li azour vizavi bezwen e demann sa group dimoun. I nesese annan en nouvo Polisi tout an marsan etrwatman avek en kad legal.

Mr Speaker, dan sa Polisi e kad legal, nou pou bezwen kontinyelman asire ki Sesel i amelyor servis bann dimoun ki pe viv avek dezabilite. Nou bezwen fer sir ki nou toultan pe ganny enkli dan bann desizyon ki pe ganny pran vizavi nou size. Asire ki tou bann drwa i ganny entegre dan tou striktir;

sistem, program e Polisi devlopman nasyonal.

Dan formasyon en tel Lalwa e nouvo Polisi, i egalman enportan pou pei konsider bann rekomandasyon Nasyon-z-ini e rapor konvansyon. E osi, rekomandasyon rapor *Commonwealth*. Ki a vin sa konpa ki pou gid Sesel ver etabli domestikasyon drwa bann dimoun avek dezabilite.

Mr Speaker, sa ki pli enportan se ki moman in arive pou Sesel inisye Lezislasyon apropiye pou domestikasyon sa konvansyon. Ki sak sa lartik dan konvansyon i ganny transformen koman en Lalwa. Ki pou asire ki Leta e Lepep Seselwa i vremen met sak mo e sak let ann aplikasyon, Mr Speaker.

Mon rev - nou rev - se pou nou vwar en Sesel ki antyerman enkliziv dan bann Lalwa. Ganny loportinite egal pou sakenn nou ki pe viv avek en dezabilite. Ganny akse avek tou servis kot sa nouvo zenerasyon ki pe ne avek en dezabilite i a vwar li dan en Sesel pli transformen. E i a vwar son lavi enkliziv.

Kot sa enn ki ozordi i vwar baryer dan son lavi, ki swa; lozman, lanplwa e lavi sosyal, i vwar en kad legal ki pou

anmenn plis aksyon e transformasyon dan son lavi.

Resaman, nou Lasanble in adopte en Trete par *Plateau Mascarene*, ki'n fer li vin en Lalwa lokal. En Lalwa ouswa en kad legal pou fer sir ki pei i non selman koz lo drwa, me i a fer sir ki sa bann drwa i vin en lobligasyon.

E la, tou bann Lalwa dan pei i a ganny met azour. E pli spesifik lo sa size. Par egzanp; Lalwa Lanplwa, Lalwa Lozman, Drwa partisipasyon dan desizyon e tou lezot.

Wi, mon senserman krwar ki Sesel in ariv dan sa letap son devlopman, pou nou bouz ver sa direksyon, pou anmenn plis aksyon e pli lobligasyon legal lo size drwa lenplimantasyon Lalwa vizavi sa group dimoun.

Mon pe demann avek nou 7enm Lasanble, pou vin sa Lasanble ki pou fer sa vre tranzisyon. Vin sa Lasanble ki pou fer sa transformasyon dan lavi sa zanfan avek en abilite spesyal. Dan lavi sa fiy ki otistik. Dan lavi sa zenn ki pa vwar kler.

Annou vin sa Lasanble ki pou pe ede kas sa baryer e fer sa fondasyon legal pou Mary - Praslin, Walter - Anse Aux Pins e Andy - Mont Buxton.

Ser, frer, zwenn avek mwan pou nou fer en lot letap.

Dare to dream. There shall be nothing about us without us. Mr Speaker, pep Seselwa, frer koleg Manm Lasanble.

Mon soumet sa Mosyon devan nou Lasanble pou nou debat lo la. Fer rekomandasyon e fer sizesyon. Me pli enportan, inifye koman en Lasanble pou ede fer sa vre diferans. Avek sa mon ouver mon Mosyon pou debat, Mr Speaker. Mersi.

(APPLAUSE)

MR DEPUTY SPEAKER

Mersi Onorab. E Onorab Porice ki'n segonde in dir rezerv son drwa pou koz en pe pli tar. Eski Onorab Esparon i le koz la? *Proceed.*

HON REGINA ESPARON

Mersi Mr Speaker. Bonn apre midi tou dimoun a lekout. Mr Speaker, mersi pou donn mon loportinite pou mon kontribye 2 pti parol lo sa Mosyon, ki pe demande pou annan nouvo Polisi pou dimoun ki pe viv ek dezabilite. E mon konnen poudir sa Polisi ki la ki an viger i sa Polisi ki ti ganny formen depi 2014.

Mr Speaker, mon panse ki avek evolasyon ki pe arive dan lemond e en pe partou otour nou, i evidan ki sa size dezabilite oubyen otreman

kapab, i en size ki ozordi in vin enn ki tre enportan e ki i bezwen bokou latansyon pou nou fer lavi sa kategori dimoun en pe pli eze.

E manifesto LDS ki nou ti al dan eleksyon avek an 2020, i ilistre ki Gouvernman pa pou kit sa group dimoun deryer. Me ki nou pou etabli en sosyete ki zwenn bezwen bann dimoun avek *special needs*.

E ki Gouvernman pou fer li posib pou asire ki zot ganny akse ek ledikasyon. Fasilit zot ek *training* pou ki zot kapab ganny en travay. E osi, ankouraz landrwa travay pou donn zot sa loportinite ganny en louvraz. E fer ki bann dimoun ki pe viv avek en dezabilite ki otreman kapab, a viv en lavi normal e vin pli endepandan.

I kler ozordi Mr Speaker, ki sa nouvo ladministrasyon i reste angaze pou kontinyen ankadre bann dimoun ki pe viv avek dezabilite, e rod sa ki meyer pou zot. Me nou bezwen kontinyen edik nou sosyete e fer zot konpran ki sa group dimoun i osi annan zot drwa, ek zot bezwen malgre nenport ki sironstans ki zot war zot ladan.

E sa drwa Mr Speaker, i enn ki nou bezwen respe. E nou bezwen annan en pe plis konpasyon pou zot akoz zot

sitasyon pa parey pou nou. E ler nou pa kontan zot, nou pa dir; grenn zot ledan ek en bekir. Oubyen menas zot lavi, zis aköz nou pa kontan ler zot in koz laverite.

Mr Speaker, sosyete i devret a tou moman rod tou fason pou protez sa bann dimoun ki pli vilnerab kont okenn form *bullying* e labi, ou kalamite. I annan diferan sirkonstans dan lavi, kot en dimoun i kapab war li avek en dezabilite. Swa fizik ou mantal.

Swa en dimoun in ne avek en dezabilite; swa in soufer ek en maladi. E la i fer mwan mazin en dimoun ki'n ne byen e ki'n ganny *polio*. En maladi ki afekte ou nerf e kit ou andikap. E parfwa i menm diform ou bann misk e sa i fer ou ganny serten limitasyon. Oubyen bann dimoun ki'n ganny latak laservel ki apre ou war li pa kapab leve pou repran en lavi normal, parey i ti abitye e i bezwen en *walking aid*.

I osi annan dimoun ki'n viktim en aksidan ki afekte son kolonn vertebral ki kontrol son mouvman. E sa i kit zot avek mouvman limite dan zot bann *limbs*. E zot war zot bezwen servi *walking aid*. Swa en bekir oubyen en *zimmer frame*. Oubyen fini dan en *wheelchair*.

Mr Speaker, en sityasyon ki mon'n deza war mon ladan. Dan sa bann sirkonstans parey, swa sa dimoun dezabilite i kapab tanporer. Me i osi kapab enn ki permanent. Depandan lo gravite.

E mon'n toultan dir; mersi senyer e lezot dimoun ki ti dan mon kote ki'n donn mwan sa sipor pou mon releve, malgre ki pa ti fasil. 2 mwan dan Lopital dan Lenn, 4 mwan dan Lopital North East Point, me mon pa ti zanmen dezespere.

E dan ka kot en dimoun i annan sa dezabilite permanent, souvandfwa zot war zot bezwen readapte. E sa readaptasyon i sa bout ki pli difisil dan lavi sa dimoun. E i depan en kantite lo sipor moral, konpasyon e konprenezon lezot dan sa lanvironnman ki otour li.

Ki mon pa pou kapab sit kantite legzanp, Mr Speaker. Nou bezwen admet ki i ankor annan en kantite defayans dan nou sosyete, ki nou bezwen fer en zefor pou amelyore, pou ede fer ki en dimoun ki pe viv avek en dezabilite, kapab vin endepandan.

Premye pwen kardinal se akse. E ki mannyer nou kree sa lespas pou sa dimoun bouze. Pou deplas kot pwen A pou li ariv kot pwen B. E lo sa laspe i annan ankor en kantite pou fer,

pou permet en dimoun ki dan en *wheelchair*, bouz libreman partou.

E la Mr Speaker, mon ti kontan letan mon ti tann *meeting* piblik Anse Etoile, Kot mon ti tann Mr Roland Dupuis ki en dimoun ki ozordi pe servi *wheelchair*, met son pwen devan lo size mank fasilite pou ganny akse.

Letan ou dan bann sirkonstans parey, kot Prezidan ti dir ki; a lavenir, Gouvernman pe mazin annan en *Wheelchair Day*. Kot bann Lotorite konsernen a pas kantmenm en erdtan dan en *wheelchair* e solider ek bann dimoun ki servi sa fasilite. Pou zot osi pli byen konpran bann difikilte e defi ki sa bann dimoun i fer fas avek dan bann sitasyon. E rod meyer solisyon.

Mr Speaker, enn bann pwen ki Mr Dupuis ti fer resorti se akse ek bis piblik. E pou bann dimoun ki reste dan nor, zot pou war sa msye toultan la o bor semen kot Lakour Dimoun Aze, La Retraite.

E parfwa nou menm war li pe roul son *wheelchair* lo semen pou al North East Point, kot napa ni menm en tretwar. E kot i annan sa risk ganny balye par okenn transpor ki pase.

Mr Speaker, mon *welcome* sa linisyativ ki Prezidan in met

devan. E mon panse ki dan sa legzersis, 2 Lotorite kle ki nou pou bezwen enkli dan sa legzersis; enn se *Planning* e dezyenm se *Land Transport*.

E lot pwen ki ti ganny fer resorti se; akse ek transpor piblik ki i ankor en *challenge*. En pwen ki sa msye ti fer resorti ki'n tous mon bokou, Mr Speaker, se akse ek bann magazen. Kot i ti fer resorti ki li i servi en kart kredi ki i pa kapab antre dan en magazen pou pas son kart. E kot boutikye i profite pou vol li. Sa i mal e i dezonnnet!

Mr Speaker, anmezir ki nou pe evolye ek keksoz, en keksoz ki mon'n obzerve se ki bokou magazen dan distrik, napa akse pou dimoun ki servi *wheelchair*.

E la mon krwar ki *Planning* i annan en gro travay pou fer a lavenir letan bann plan i vin devan – devan pou konstriksiyon bann letablisman ki piblik i servi. Pou regard byen sa zafer akse pou bann dimoun otreman kapab.

Akoz ozordi i vre ki ou war bann boutikye i ouver dan nenport ki pti trou ki i gannyen ki vremen en *wheelchair* pa pou kapab pase. Parfwa ou demann ou lekor; ki kriter ki *Planning* in servi pou donn laprouvasyon?

En lot pwen Mr Speaker, se fasilite konstriksyon bann *ramp* pou dimoun ki servi *wheelchair* en pe partou dan lavil e dan bann distrik. Pou akse landrwa piblik.

La mon oule met en rekomandasyon devan pou demande ki Gouvernman i enkli fasilite akse pou *wheelchair* dan tou nouvo konstriksyon. E *advise* bann biznes osi ki pe vin ek en nouvo laplikasyon pou konstriksyon, pou enkli sa fasilite pou dimoun avek dezabilite dan zot konstriksyon.

E Mr Speaker, osi kot i posib pou Gouvernman anbark lo en program pou amelyor bann fasilite ki egziste kot i posib, pou kree akse pou *wheelchair*.

En lot keksoz ki ti ann kapab ganny fer. Se pou rezerv *parking* pou bann dimoun avek dezabilite, kot i posib. E sa en keksoz ki demann ledikasyon piblik. Parski i annan landrwa ki'n deza komanse, me – ki'n deza komans fer.

Me ki nou war? Se ki souvandfwa ou war dimoun ki kapab, pe *park* dan sa bann *parking* ki mark dezabilite pou *wheelchair*, menm si i annan lezot landrwa. E sa ki otreman kapab pa gannyen letan i vini.

E la i fer mwan mazine ki menm dan bis piblik, parfwa

kot in mark 2 *seat* devan par deryer drayver ki rezerve pou dimoun aze, oubyen pou dimoun ki annan dezabilite, dimoun i asiz la.

E menm si en dimoun ki aze ou avek dezabilite, i rantre, parfwa sa dimoun i refize deplase. Mon krwar i annan en gran louveraz pou nou fer pou edik nou bann dimoun.

Mr Speaker, mon krwar ki la, nou bezwen rod en fason pou nou edik nou popilasyon dan sa domenn. An di-z-an sa, en keksoz ki mon swete trouve ki nou osi koman en Lasanble, nou donn sa legzanp.

E nou amelyor nou bann fasilite pou permet ki nou Lasanble osi i vin en landrwa ki *disable friendly*. Kot akse ek sirkilasyon dan en *wheelchair* a fasil. A permet en enstalasyon en *lift* ki ava permet sa akse ek bann lofis e Galeri ki sitye dan letaz.

Nou osi konnen ki legzersis i bon. E marse i ganny rekomande. Me selman Mr Speaker, parfwa sa risk tonbe e ganny dimal i la. Malgre ki parfwa nou sey grenpe. E mon pran lapenn parfwa ler mon war Onorab Zialor pe seye ek son 2 bekir dan peron. Me i pa toultan fasil. Kantmenm i dir nou; *n'ayez pas peur* pou li.

E Mr Speaker, en lot konversasyon ki *Planning* i bezwen ek bann biznes, pou ki ler zot konstri bann batiman ki annan letaz, ki zot osi konsider met *lift* oubyen peron – met *lift* olye peron ki pa fasil.

Akse pou bann dimoun ki otreman kapab ek bann fasilite ki dan letaz. E kot zot met peron, met osi bann *railing* ki dimoun ki annan problem, ou serten limitasyon, kapab pli konfortab pou servi.

Mr Speaker, lo kote lanplwa pou dimoun dezabilite; la osi mon krwar ki Polisi i bezwen ranforsi sa demann e demars, pou ki nou sansibiliz bann landrwa travay pou donn sans dimoun avek dezabilite kapab ganny en lanplwa.

E mon pou avoue ki lo sa kote parfwa, bann dimoun dezabilite i rankontre bokou difikilte pou ganny en lanplwa. Mr Speaker, resaman in ganny met a mon latansyon, ki en zanfan avek dezabilite in fer *attachment* dan en landrwa travay. Me ler ti'n ariv ler pou anploy li, zot ti refize pou konfirm li dan sa *post* zis akoz i annan en kondisyon ki apel *cleft palate*.

Kot sa dimoun pa ti ni pe al fer en travay *receptionist* kot i koz bokou li. Me travay dan en *library* pou klas liv. Nou pa

devret pe diskriminen zis akoz sa dimoun i annan sa dezabilite.

Oparavan, Mr Speaker, nou ti annan *Vocational Training Centre* ki sitye dan mon distrik ki anba renovasyon, ki'n ede form zanfan dezabilite sorti kot Lekol Eksepsyonnel pou ganny abzorbe dan en landrwa travay.

Me malerezman nou'n war ki parfwa zot vyei laba. E landrwa travay pa ase *receptive* pou akey zot dan en lanplwa, pou diferan rezon ki zot donner. Mon krwar lo sa kote i annan en gran zefor ki bezwen ganny fer pou kree plis sa louvertir pou sa group dimoun.

E kekfwa atraver sa Mosyon, Mr Speaker, nou kapab osi rekomande ki VTC ki annan en *entry criteria*. Polisi i osi etabli en *exit criteria* pou anpese ki ler enn sa bann zanfan i antre laba, i osi garanti ki i pa pou vyei laba. Me a en serten laz i pou kapab annan sa loportinite aprann en metye, ek lespwar ganny plase dan en lanplwa pou son lavenir.

Parski Mr Speaker, nou konnen ki bann dimoun otreman kapab i osi annan abilite. E nou'n war kot bokou – nou war bokou mannyer zot demontre zot abilite dan bann diferan domenn sportif.

E la mon pou profit sa lokazyon pou mwan osi felisit tou nou bann atlet *Special Olympic* ki'n partisip dan zwe *Special Olympic Berlin* an *Allemagne*. E pli gran felisitasyon pou bann ki'n fer nou fyer pou dekros en meday e fer paviyon Sesel mont pli o. Nou donn zot en gro lanmen.

(APPLAUSE)

HON REGINA ESPARON

Mon konnen ki zot met bokou zefor dan domenn *sport*. E malgre zot pa'n ganny en meday, "Me omwen zot in seye" parey zot *motto* i dir.

Mr Speaker, mon kontan ki SCAA in amelyor bann fasilite pou ede deplas bann dimoun ki annan en dezabilite ler zot pe *travel* pou dan plis konfor, pou investi dan lekipman spesyal. Akoz mon dir sa?

Mon rapel ler mwan mon ti *travel* pou al tretman dan Lenn, kot mon ti bezwen ganny palanke par 2 zonn dan en *wheelchair* par ledò, pou mwan kapab anbank dan avyon. Me la avek sa nouvo fasilite avek sa *Air ambulance*, mon felisit zot pou bouz de lavan.

Mr Speaker, ozordi nou pe koz lo enklisivite dan ledikasyon. Nou osi bezwen zet

en koudey lo lafason ki bann konstriksyon bann lekol i ganny fer pou fasilite akse ek bann laklas ki dan letaz. Pou osi konstri bann *ramp* pou fasilite mouvman. E osi twalet spesyal pou akse *wheelchair*.

Mr Speaker, letan mon pe konklir, permet mwann koz en kou lo *Africa Disable Protocol*. En lenstriman ki Linyon Afriken in met an plas an konzwent avek *ADA Africa Disable Alliance*, ki son *Chairman* i Mr Dube. Pa Lucky Dube. Me se Mr Kudakwashe Dube ki baze *Pretoria*. Ki osi en dimoun ki pe viv avek en dezabilite.

E *ADA* Mr Speaker, i en *African based-organisation* ki travay an partenarya avek Linyon Afriken e Nasyon-z-Ini. E lezot *NGO* dan rezyon Lafrik pou promouvwar sa laspe enklisivite, devlopman Drwa Imen e Drwa bann Dimoun ki pe viv ek Dezabilite.

Mr Speaker sa *African Charter*, Sesel in sinyen. Selman i pa ankor ratifye. E anvi ki mwan avek Onorab Lemiel ti form par dan son mizazour atraver *Pan-African Parliament*.

Ler nou ti retournen nou ti *liaise* avek PS Bonne, sa lepok ek Minis Larue, pou met zot okouran ki i annan sa *protocol*.

E pou fer le neser pou ki Sesel osi i ratifye.

E lo en lot *note*. Dan enn bann *meeting* konsiltasyon avek Minis Lafanmir. Onorab Lemiel ti fer en prezantasyon lo non *Caucus* bann Madanm ek sa Minister. E nou pe espere, nou pa ankor war son ratifikasyon.

Mr Speaker, letan nou pe debat lo sa Mosyon, mon krwar i lokazyon ideal pou demande ki Sesel i ratifye sa *protocol*, pou benefis bann dimoun ki pe viv ek en dezabilite.

E petet fer sa avan ki nou revwar sa Polisi pou ki zot a met li anliny avek sa *protocol*. Avek sa 2 mo Mr Speaker, mon pou donn mon sipor sa Mosyon anmennen par Onorab Zialor. Mon remerci ou.

(APPLAUSE)

MR DEPUTY SPEAKER

Mersi Onorab Esparon. Dan benefis letan, i ti ava byen ki nou fini sa Mosyon ozordi. Nou pa bezwen *spill* li *over* pou semenn prosen, parski demen zot konnen ki mannyer Lasanble pe *meet*.

Lo lakantite dimoun ki'n endike la zot le koze, mon kapab donn 15minit sakenn. Nou pou fini 5er. Si prezan i annan dimoun ki endike la zot

le koze ki pa'n endike, mon pou bezwen redwi sa letan.

So mon war enn. *Anybody else? Ok, so mon krwar safely nou kapab – provided ki napa personn ki vini – anr. Ok, so mon pou donn 10minit. Koumsa pou nou kapab fini 5er. Mon ava pas laparol avek Onorab Porice.*

HON DOYACE PORICE

Mersi Mr Speaker. Bonn apre midi *a tous*. Mr Speaker, sa Mosyon anmennen par Onorab Naddy i en Mosyon ki mon vremen *happy* avek. I fer mwan mazin ler mon ti form par sa travay anver Program Dezabilite Sesel dan Minister Gouvernman Lokal dan lefase.

Mon ti santi ki petet sa letan mon pa'n anmenn ase kontribisyon pou sa tel program. Me mon'n ede anver formasyon en lasosyasyon pou zot an 1999. E elekte en komite solid kot enn mon koleg Mrs Alice Nourrice ki ti *program officer* sa program dan sa letan.

Nou'n etabli osi bann group sipor dan tou distrik ki zot osi ti form par sa lasosyasyon, ki ti ganny ankouraze par Minister Gouvernman Lokal, kot nou'n inisye plizyer program lo nivo

distrik, nasyonal e osi enternasyonal.

E Mr Speaker, ziska ozordi sa lasosyasyon i ankor egziste. Zot byen aktiv e ki pe ganny *chair* par Ms Jourdane Ernesta avek en komite byen serye. E pou sa mon pou dir zot en gro merci pour ede ankadre sa bann zanfan dezabilite ki kit zot zwaye. Sirtou ler zot organiz diferan aktivite pou zot; ki dan distrik e menm nivo nasyonal.

Me avek sanzman ozordi, sa program i pe form par dan en Seksyon Lafanmir dan Minister *Youth, Sports* e Lafanmir.

Mr Speaker, avek sa sanzman, in fer ki sa program in vin pli elarzi. E sa seksyon pou bezwen get pli a profon. Parey sa Mosyon pe demande, en kad legal e osi en nouvo Polisi nouvo nasyonal pou garanti en sosyete pli enklziv.

Sa pou ede, anmenn sa program dezabilite vin pli annord. E anmenn sa linite anver tou sa bann lorganizasyon ki konsern dezabilite. Mon pou osi fer sa bann dezabilite ek zot paran, vin pli aktiv dan nou sosyete.

Petet Mr Speaker, mon pou enplor avek Ladministrasyon Distrik e bann prezantan program. Pou zot osi vin pli aktiv anver tou

program ki egziste dan zot distrik. E siport sa bann group ki la pe debourye. Sirtou group dezabilite.

Ede pouse pou bann program vin pli mobilize. Ankouraz bann paran pou anmenn zot kontribisyon plis anver partisipasyon dan bann aktivite pou zot zanfan. Osi, donn zot sa kouraz pou partisipe dan serten aktivite parey dan travay, spor, kiltir ek ledikasyon.

Mon pou osi demann Minister konsernen pou osi siport bann lasosyasyon ki la. Ki zot kontinyen lo letablisman sa bann group sipor dan distrik. Pou ki zot a kapab anmenn plis sansibilizasyon dan distrik, e osi nivo nasyonal. E ankouraz zot pou partisipe.

Mr Speaker, mon santi ki sa i tous bokou kot mon leker. Kot mon'n toultan pare pou siport bann dezabilite lo nivo distrik. Sirtou ler mon mazin sa 34 dezabilite dan mon distrik Baie Ste Anne, Praslin.

Kot mon'n an kontak ek zot anver zot *Chairperson* Group Sipor – Mrs Passendji e osi son Sekreter Ms Shirley. Nou annan bon relasyon ansanm pou plezir sa tel program.

Avek sa Mosyon, i pou ed Gouvernman osi pou anmenn

plis sipor pou nenport ki langazman ki bann lorganizasyon dezabilite i anmennen dan nou pti pei Sesel. Sa linite, lafors, determinasyon anver nou bann dezabilite dan distrik ek nasyonal, pou garanti en sosyete pli enkliziv.

E la i fer mwan mazin sirtou, bann ki *bedridden* parey; Sedgwick Accouche, Alvis Lesperance, Marcus Rose, Odette Athanase. E lezot ankor, kot zot osi zot ava benefisyte avek demann dan sa Mosyon.

Mon'n vizit zot e anmenn mon soutyen. Sirtou atraver en dyalog. Koz lo plizyer keksoz. Anmenn en pti token pou zot e fer zot santi ki mon kontan zot e pare pou siport zot. Serten nou dezabilite in anmenn bokou pou nou pei anver serten travay spor, osi kiltir.

E la mon pou felisit sa group ki'n partisip dan *Special Olympic Game* tou resaman an *Berlin*. E zot in raport meday pour Sesel. Ankor enn fwa, felisitasyon.

Zot osi anmenn sa larises pou nou pei par lankourazman serten bann paran e lasosyete. Mon konnen ki sa Gouvernman aktyel pou ekoute e pou siport sa demann ki nou Lasanble pe demande anver sa bann dezabilite.

E Mr Speaker, mon ti a kontan ki ler Gouvernman i met an mars sa kad legal e nouvo Polisi, i ava aplik pou tou lorganizasyon ki konsern dezabilite. Kot Praslin e zil pros pa pou ganny eparnyen. Sirtou kot i konsern travay, ledikasyon, kiltir e osi spor. Avek sa 2 mo, mon dir avek Onorab Naddy; ki kont lo mwan pou siport son Mosyon. Mersi.

(APPLAUSE)

MR DEPUTY SPEAKER

Mersi Onorab pou kit ou prezantasyon par anba sa 10 minit ki nou pei donner. Nou ava aprezan kriy Onorab Rocky Uranie.

HON ROCKY URANIE

Mersi Mr Speaker. Mon annan 2 pti mo pou mwan osi dir konsernan sa Mosyon ki Onorab Naddy in anmennen.

Mr Speaker, nou'n vreman fer bokou pou ki pran nepli bezwen kasyet zot zanfan ki annan dezabilite. Nou'n fer sitan mobilizasyon, sansibilizasyon.

Ki fer ki bann dimoun ki annan dezabilite zot fyer pou zot marse. Pou zot travay. Pou zot partisip dan bann aktivite kominoter lo nivo sosyal. Edikasyonnel, kiltirel, sportif,

relizyon. Eksetera. Nou'n fer vremen bokou.

Ler ou gete, nou'n donn paran, lasosyete an zeneral. Nou'n fer - nou'n donn zot serten lafyerte pou ki tou dimoun i kapab viv dan dinyite. Menm si ou annan en dezabilite oubyen en abilite spesyal parey nou dir.

Si ozordi Sesel nou pou get bann diferan Minister. Zot annan bann diferan Polisi. Ou pou vwar parey *Employment* par egzantp, i deza annan bann Polisi ki ankadre bann dimoun avek dezabilite.

Minister Ledikasyon parey. *Sport*. Eksetera. Nou vwar poudir zot annan bann keksoz – bann kad deza an mars ki'n deza ganny etabli zisteman pou siport bann dimoun avek dezabilite.

Nou'n vin avek plizyer Polisi ki fer par egzantp; dan *Employment* ki nou ti ofer bann *subsidised training e re training* pou bann dimoun ki annan dezabilite. Nou'n sey tap tou pou fer sir ki napa diskriminasyon dan saler, anver ban dimoun ki annan dezabilite. I vre i annan ankou bokou pou fer.

Nou'n fer sir ki nou'n *promote gender equality*. Fanm zonn, nenport. Ou kapab annan dezabilite *or not*. E nou'n

ofer *paternity leave*. Byensir pour fanm ek zonn. Dezabilite *or not*. I osi aplik pou zot. So, nou war nou fer bokou.

Nou'n osi *raise awareness* dan bann landrwa travay pou sansibiliz bann lezot dimoun ki napa dezabilite, pou aksepté bann ki annan dezabilite, travay akote zot.

Nou'n organiz plizyer bann sesyon. E osi donn bann dimoun ki annan dezabilite bann leksperyans travay. Oubyen ed zot ganny plasman dan bann landrwa travay. Me *still*, parey nou dir; i ankou annan lespas pou amelyore.

E byensir Mr Speaker, nou'n fer sir ki nou bann sistenm parey lasante, zot fer lenspeksyon dan bann landrwa travay, pou fer sir ki sa bann landrwa travay parey nou dir; i *safe*, i *secure*. Parey nou bann *safety measures* i ganny mete an plas.

Byensir i pa zis pou bann dimoun ki normal. E i pou osi bann ki annan dezabilite. Malgre i ankou annan ankou pou fer.

Mr Speaker, nou'n osi ofer bann lasistans pou bann ki pa kapab travay ditou. Bann lasistans medikal. Lasistans benefis sosyal, finansyel. Pou ed bann zannan – bann paran ki pa kapab al travay ditou. Zot,

zot la kot lakour avek serten dezabilite.

E ler mon dir sa Mr Speaker - e la i *remind* mon en pti keksoz en pe *sad*. Kot en paran ki annan 2 zanfan dezabilite. I osi i annan son problemn. I lo en benefis sosyal li osi sa paran. I ti pe sey *care* pou enn son zanfan. I annan 2. I ti pe rod en *carer* pou sa lot.

Zot in dir li fodre i pran sa larzan ki enn son zanfan pe gannyen pou pey *carer* avek. E pou mwan sa, mon krwar i en keksoz ki devret – pa ganny – i devret aret ganny pratike. E sa i en keksoz ki devret ganny get ladan pou rezourd, pou sa bann problemn pa ariv ankor.

Mr Speaker, si ou vwar dan ledikasyon, pou plizyer lannen mon'n ansennyen, nou'n vwar kot ledikasyon in vin pli enklizif. Kot bann zanfan ki annan dezabilite fizik. Me mantalman zot ankor for. Zot kapab swiv laklas ansanm. *Curriculum* normal ansanm avek bann zanfan zot laz. So, nou'n vwar sa ganny entrodwi.

E nou'n vwar osi bann lekol kot bann zanfan ki pa kapab swiv kour normal. Parey zot ganny mete ansanm pou zot swiv zot *curriculum* pou zot ki pli spesifik. Sa osi nou'n fer. I vre i annan landrwa pou amelyore e mon krwar sa

Mosyon pe demann zisteman pou sa bann keksoz ganny arive.

Lo kote *sport*, nou'n fer bokou. Bokou, bokou menm ki bann dezabilite i kapab partisip dan bann aktivite sportif. E nou'n fer bokou leksplwa dan *sport* kot nou'n vwar - e bann koleg avan mon in dir; nou'n anmenn bann meday lo nivo nasyonal e lo nivo enternasyonal. E sa in fer nou tou fyer.

E ler mon pe dir sa, nou'n vwar rezilta ki'n vini *Zwe Berlin*. I annan en garson sorti dan mon distrik – Graham Jacques. E i osi in anmenn 2 meday bronz ankor. So, ki sa in vremen fer nou tre fyer. E nou dir Graham felisitasyon pou sa. I fer nou zil La Digue tre fyer. E nou swete ki i kontinyen partisipe.

E sa bann keksoz koumsa Mr Speaker, i pa'n vin zis ozordi sa. I en travay – i pa'n vin par laverti parey nou dir. I en travay ki'n ganny fer depi lontan; ki'n ganny etabli dan nou pei.

Kot bann dimoun in met lespri ansanm pou rode ki mannyer pou ankadre, zisteman bann zanfan, bann dimoun ki annan serten dezabilite. Oubyen abilite spesyal. Pou zot ganny enkli dan nou sosyete pou zot montre

zot talan. So, nou'n fer bokou lo sa laspe. Malgre mon dir; *there is always room for improvement.*

So, Mr Speaker. I vre parey mon dir ki i ann landrwa pou amelyore. E zisteman sa Mosyon li i pe demande ki en kad legal i ganny met an plas zisteman pou fer sir ki bann zanfan ki annan dezabilite – bann dimoun ki annan dezabilite. Legalman zot ganny pli byen ankadre.

Alors pou mwan, dan lepase nou'n fer gran kantite. La dan sa semen, dan sa kontour kot nou'n arive. Gouvernman in sanze. En lot Gouvernman ki la.

So, alor i toutafe normal ki Gouvernman dizour ki la i kontinyen sa travay. I vin avek bann nouvo keksoz pou zisteman kontinyen anbelir, rod fason pou fer sir ki bann dimoun ki annan dezabilite, i viv en lavi normal parey nou, nou pe viv. Alors avek sa 2 pti mo Mr Speaker, mon apresye ki Onorab in anmenn sa Mosyon, zisteman.

So, mon swete ki tou deba ki vini i a fer zistis son Mosyon. E alors ek sa 2 pti mo, Mr Speaker, mon a ekout larepons Onorab apre, pou mon desid ki mannyer mon pou *vote* lo la. Mersi Mr Speaker.

(APPLAUSE)

MR DEPUTY SPEAKER

Mersi Onorab pou ou osi gard sa 10 minit ki nou'n demande. E mon war tou lede kote pe bat lanmen. So, mon war pe al dan bon direksyon. Onorab Philip Arissol?

HON PHILIP ARISSOL

Mersi Mr Speaker. Bonn apre midi tou dimoun. Mr Speaker, Mosyon ki devan nou – ki devan nou Lasanble anmennen par Onorab Zialor, pou konsiderasyon par Leta i lir koumsa;

Lasanble pe demann avek Leta pour konsider en kad legal pour dimoun ki pe viv avek en dezabilite, e osi en nouvo Polisi nasyonal pour garanti en sosyete pli enkliziv?

Mr Speaker, i bon note ki si Lasanble i aport sipor pou konsider en kad legal pou dimoun ki pe viv avek dezabilite, e osi en nouvo Polisi nasyonal pou garanti en sosyete pli enkliziv, sa i a ede kapab asire ki sa bann tel dimoun i annan pouvwar pou partisip totalman dan tou laspe dan sosyete. Tel ki; dan ledikasyon, travay e dan lavi an zeneral.

En kad legal pou dimoun ki pe viv avek dezabilite, i kapab

ganny vwar koman en lenstriman ki anmenn proteksyon kont diskriminasyon e asire ki zot drwa i ganny respekta.

Sa i kapab enkli mezir, tel ki; akse avek lespas piblik e transpor - akomodasyon pou dimoun ki viv avek dezabilite dan landrwa travay e akse egal. E ledikasyon. E osi a swen lasante.

En Polisi nasyonal pou en sosyete enkliziv, i kapab promot konsyantizasyon, ankouraz konprenezon e bezwen dimoun ki pe viv avek dezabilite.

En tel Polisi i kapab aport gidans pou bann Lazans Gouvernman e lorganizasyon prive, pou asire ki zot bann Polisi e pratik i enkliziv e aksesib. Sa i kapab ede pou ankouraz enklizyon sosyal. Epi redwi stigmatizasyon, diskriminasyon kont dimoun ki pe viv avek dezabilite.

Mr Speaker, an zeneral en kad legal e Polisi nasyonal pou dimoun ki pe viv avek dezabilite, i en letap enportan dan direksyon pou kree en sosyete ki pli enkliziv e ekitab. I enportan ki bann mezir i ganny enplimante efektivman. E avek kontribisyon, e partisipasyon sa bann tel dimoun, e lorganizasyon ki reprezant zot.

Dimoun ki pe viv avek dezabilite i fer fas avek en seri difikilte dan lavi sak zour, depandan lo natir e severite zot dezabilite. Serten defi i enkli baryer fizik.

Dimoun ki annan dezabilite fizik i fer fas avek difikilte pou ganny akse dan bann batiman, transpor; lezot lespas piblik, ki pa'n ganny *designed* avek bann bezwen antet. Sa i kapab *limit* kapasite pou partisipasyon dan aktivite e levennman. Ouswa menm akse avek debaz tel ki; swen lasante e ledikasyon.

Izolasyon sosyal;

Dimoun ki pe viv avek dezabilite i kapab fer fas avek baryer ki fer li pli difisil pou form relasyon e partisipasyon dan zot kominote. Sa i kapab anmenn bann santiman solitud e izolasyon ki kapab enpakte negativman lo zot lasante mantal e zot byennet.

Diskriminasyon dan landrwa travay;

Dimoun ki pe viv avek dezabilite i fer fas avek diskriminasyon dan marse lanplwa. Swa aköz zot kondisyon fizik ou mantal. Ouswa aköz zot pou bezwen laranzman sa landrwa ki travay ki anplwayer pa oule rektifye. Sa i kapab *limit* loportinite ekonomik e kontribye dan lapovrete e finansyel.

Akse avek swen lasante; Dimoun ki pe viv avek dezabilite i parfwa war li dan difikilte pou akse servis swen lasante, ki apropriye pou son bezwen partikilye. Parfwa akoz baryer fizik ouswa formasyon ensifizan parmi founniser swen lasante.

En Polisi nasyonal ki garanti en sosyete enkliziv a vize pou adres mazorite defi ki dimoun ki pe viv avek dezabilite i fer fas avek. En tel Polisi i kapab enkli bann mezir tel ki; amelyor aksesibilite fizik.

Setadir sistenm transpor, pou asire ki zot aksesib pou dimoun ki pe viv avek dezabilite. Osi fer fas - fer akse avek finansman pou moderniz bann batiman e lenfrastruktir ki egziste deza.

Ankouraz enklizyon sosyal; Sa i enplik kree e inisyen program ki ankouraz dimoun ki pe viv avek dezabilite, pou ki zot kapab partisip dan aktivite e levennman kominoter. An menm tan kree en fon pou finans Group Siport Defans Dimoun ki pe viv avek Dezabilite.

Amelyor akse avek swen lasante;

Sa i enplik logmantasyon finansman pou resers lo probleman swen lasante, ki dimoun ki pe viv avek dezabilite

i fer fas avek. Ouswa byen ki formasyon pou bann dimoun ki founni swen lasante. E pou pli byen konpran bezwen dimoun ki pe viv dan sa sityasyon.

An zeneral, en Polisi nasyonal ki garanti en sosyete enkliziv i vize retir baryer e kree loportinite pou dimoun ki pe viv avek dezabilite. Pou partisip totalman dan lakominote e realiz tou zot bann lobzektif. Sa nouvo Polisi i osi kapab konpri serten rekomandasyon.

Lasistans anver akomodasyon: Tou dimoun ki pe viv avek – tou depan lo dezabilite sa dimoun, akomodasyon avek lasistans teknolozi. Ede pour mobiliz ouswa modifye dan lanvironnman ki nesese pou ede ganny akse e partisip dan zot kominote.

Ofer sipor; sa i kapab enkli lasistans swen personel. Lasistans transpor konsey. Ouswa lot servis ki ed dimoun dan zot bezwen sak zour.

Ankouraz en enklisivite;

Kree en lanvironnman enkliziv kot dimoun ki pe viv avek dezabilite i ganny byen akeyir, e ganny donnen tou zot valer. Sa i kapab ede pou diminyen izolasyon sosyal e ankouraz en sans apartenans.

Defann zot drwa;

Sa i kapab enkli travay pou sanz Lalwa e Polisi ki fer diskriminasyon kont dimoun ki annan kek dezabilite. E osi defann zot pou ki zot ganny akse a meyer swen lasante, ledikasyon e osi loportinite lanplwa.

En Polisi nasyonal ki garanti en sosyete enkliziv, i merit vize pou adres problem lo en pli o lesel. Serten laspe spesifik i kapab enkli adopte Lalwa kont diskriminasyon. Sa i a ede asire ki dimoun ki pe viv avek dezabilite pa pou ganny diskriminen kont lanplwa, lozman, ledikasyon. Ouswa bann lezot domenn.

Finansman pou programm servis spesifik pour dezabilite. Sa i a ede ki dimoun ki pe viv avek dezabilite pou ganny akse – resours ki bezwen pou viv endepandan. E partisip plenman dan zot kominote.

Ankouraz akse;

Sa i enplik kree standar e gid pou konsepsyon bann batiman ki aksesib. Sistennm transpor. E bann lot lespas piblik. E finansman pou moderniz enfrastruktir ki'n deza egziste.

Promosyon diversite e enklizyon. Sa i enplik kree e inisye programm ki ankouraz e promot diversite, e enklizyon. E travay pou ogmant konsyantizasyon lo valer

enklizyon pou dimoun ki pe viv avek dezabilite dan sosyete.

Mr Speaker, mon pou definitivman aport mon sipor pou Mosyon Onorab Zialor, pour en Polisi nasyonal ki garanti en sosyete enkliziv ki vize ver kree en sosyete ki pli ekitab e aksesib pou tou dimoun ki pe viv avek dezabilite. Ki swa zot abilite e zot kapasite. Mersi Mr Speaker.

(APPLAUSE)

MR DEPUTY SPEAKER

Mersi onorab pou ou osi gard sa letan 10 minit ki nou'n demande. Mon pou pas laparol aprezan avek Onorab Romain.

HON GEORGES ROMAIN

Mersi Mr Speaker. Bonn apre midi Mr Speaker. Bonn apre midi tou koleg Onorab e tou dimoun a lekout.

Mr Speaker, mon pou donn mon sipor pou sa Mosyon anmennen par Onorab Zialor. Akoz sa Mosyon pe tous en kous nou popilasyon ki vilnerab e ki bezwen nou sipor pou zot kapab viv en lavi kot zot pa ganny diskriminen. Oubyen kot zot vwar zot ganny met akote. Oubyen ganny negligez dan lasosyete.

Dan nenport ki sosyete, i enportan ki tou dimoun i ganny

trete e respe ek dinyite. E ki tou dimoun i ganny akse avek menm loportinite. En dimoun ki pe viv avek en dezabilite i merit ganny trete dan en fason ki pou ed li e lev son nivo konfor.

I enportan ki en pei i tret zot byen e osi kree bann fasilite, pou ed sa bann dimoun pou viv byen dan lasosyete.

Ozordi Mr Speaker, nou vwar bokou fason kot dimoun ki viv avek dezabilite i ganny dezavantaze. E sa i pa zis Sesel. Me dan lemonn antye kot gradyelman nou pe vwar bokou dimoun ki pe ganny sansibilize pou ed sa bann ki pli dezavantaze.

Ozordi, menm si nou annan en Lekol Eksepsyonnèl ki ankadre ledikasyon pou bann zanfan ki pe viv avek en dezabilite, nou bezwen rekonnet ki i annan plizyer kalite dezabilite.

I annan zanfan ki pa tandè, ouswa ki pa koze. I annan ki annan problem fizik, ki pa kapab marse. E menm i annan ki annan problem mantal ki afekte lafason ki zot enterakte avek lezot.

Mr Speaker, me eski nou pe pran tou sa bann zanfan e met zot dan en sel group? Oubyen, eski nou tret sak zanfan lo en nivo endividi kot i kapab vwar li annan sans pou

ganny entegre dan en lekòl normal, me avek en pe plis sipor.

I annan zanfan ki petet ti kapab vwar zot pe lekòl dan en lekòl ordiner. Me akòz son dezabilite, i vwar li ganny restrikte pou al Lekòl Eksepsyonnèl, zis akòz nou bann lekòl ordiner napa sa bann fasilite pou *accommodate* sa bann zanfan.

Mr Speaker, pou bann adilt dan lasosyete ozordi, nou bann lenfrastriktir ki'n ganny fer dan lepase, i pa'n byen ganny planifye pou fasilite zot mouvman.

Par egzanzp; dimoun ki servi *wheelchair* ki pa kapab ganny akse avek landrwa ki annan peron - ki annan *pavement* san en *slip*. Kot sa ti a ed sa *wheelchair* pou li kapab mont anler lo sa *pavement* pou sa dimoun kapab kontinyen son larout.

Fasilite *parking* ki manke pou dimoun ek dezabilite. Mon konnen kot *Eden* dan *parking* i annan 2 *slot* pou dimoun ki pe viv ek dezabilite. Me parkont, par ler nou vwar dimoun ki napa dezabilite e zot pe abiz sa fasilite. E sa Mr Speaker, i pa normal. E sa bann tel aksyon i merit ganny dekouraze.

Nou bann transpor piblik, Mr Speaker, i osi pa'n toutan

fer provizyon pou siport dimoun ek dezabilite. E sa i en lot fason ki kapab restrikte zot mouvman e sosyalize.

En lot defi, Mr Speaker, se lafason ki medya an zeneral pa toultan pran konsiderasyon bann dimoun ki annan serten dezabilite. Par egzanp; si zot pa tande, sa bann dimoun i ganny difikilte akoz zot pa tann sa son e pou vwar li difisil pou konpran e en nouvel.

En lot defi ankor Mr Speaker, se lafason ki nou ed dimoun ek dezabilite pou rod lanplwa. Ozordi nou napa en servis spesyal pou zot.

Mr Speaker, koman en sosyete ki donn valer tou dimoun e rekonnèt tou son dimoun, i enportan ki nou vwar fason pou nou pli byen siport dimoun ki pe viv ek dezabilite.

E la mon annan enn de propozisyon; nou merit investir dan plis bann ansenyan *special needs* ki pou kapab donn sipor bann zanfan ek dezabilite, ki kapab vwar li pe al dan en lekòl normal.

En ansenyan ki ganny sa bann formasyon spesyal i kapab vwar li pe asiste sa zanfan pou pli byen konpran leson ki ansenyan in donner dan laklas. I pou kapab servi bann lekipman spesyal ki pou ed sa zanfan ek sa laprantisaz.

E an zeneral siport sa zanfan dan laklas, e fer li santi parey lezot.

Nou pa merit zis ed sa zanfan ek son leson. Me kree lanvironnman lekòl kot i a kapab ed son mouvman dan lakour lekòl. Plis fasilite pou *wheelchair* pase. Fasilite *toilet* pou sa bann zanfan e sipervizyon dan lakour lekòl.

Mr Speaker, dan meeting piblik, Anse Etoile, nou ti annan enn nou zabitan ki dan *wheelchair* ki ti lev en pwen avek nou Prezidan.

I ti konsernen akoz ti napa ase fasilite pou li kapab servi son *wheelchair* dan lavil. Pou al kot magazen. E kot i ti pi sizer bann sanzman senp ki ti pou ed mobilite sa bann dimoun ki servi en *wheelchair*.

Annou regard transpor piblik ki kapab fer provizyon pou dimoun ek dezabilite. E osi met plis *parking* pou dimoun ki servi transpor, me ki rezerv pou dezabilite.

Mr Speaker, ler mon regard medya, par egzanp, mon vwar serten keksoz ki zot kapab fer pou amelyor konprenezon bann dimoun ki pa tande par egzanp. Wi, nou kapab servi *sign language*. Me i annan lezot fason ki petet kapab konsidere.

Par egzanp; annan plis portre, osi lekritir. Zot osi

kapab konsider met zot bann program kle *online*. E kot bann dimoun ki pa tande a kapab lir bann *captions*. E ou lir sa nouvel pou zot konpran zot osi.

E konmela, Mr Speaker, i annan bokou nouvo teknolozi ki kapab ede pou fer sa fasil pou bann *media house*.

Mr Speaker, en lot propozisyon, se pou ed nou bann dimoun ki pe viv ek dezabilite, e ki kapab travay pou rod en lanplwa. E la nou ti kapab annan en zofisyè ki dedye spesyalman pou ed zot konekte ek landrwa travay.

Sa zofisyè ti a kapab osi sansibiliz popilasyon ek bann landrwa travay pou esey rod fason pou anploy sa bann dimoun. E menm atir latansyon lo bann bon pratik kot i a kapab ganny servi koman en legzanp pou lezot landrwa travay.

Vwar ki mannyer zot kapab enkli bann endividi ki pe viv avek dezabilite. A kapab azout valer dan zot lorganizasyon.

Mr Speaker, pou konklir; mon krwar dimoun ki viv ek en dezabilite i merit annan menm loportinite pou zwir zot lavi, e pou ed zot devlopman. E alor nou merit met plis zefor pou ed zot kontribye pou zot fanmir, e osi devlopman nou pei – dan devlopman nou pei.

Mr Speaker, nou vwar plizyer nou bann dimoun ki pe viv ek en dezabilite ki'n fer sikse dan nou pei. Legzanp Mr Speaker; nou ti annan en *band* lanmizik ki ti apel '*Blind Date*', ki'n fer bokou dan lanmizik pou nou pei.

Parey i annan 2 mon zabitan ki viv Anse Etoile. Sa i Ms Brigitte Lablache ki'n osi sant bann tre zoli sanson. E osi ki nou konnen i zwe gitar. E osi in ed bokou bann dimoun ki pe viv ek dezabilite pou zot kapab adapte zot lavi.

Nou osi annan en lot msye ki apel Hans Lablache, ki'n travay koman en *operator* kot *Port Authority*. Ki mon konnen bokou Seselwa in konn li atraver son bon travay.

Mr Speaker, permet mwan pou felisit loter Mosyon, Onorab Zialor, ki pe viv ek en dezabilite, me i pa'n les sa anpes li bouz devan kot i pe fer en louvraz vremen alaoter koman en Manm Parlman. Mon anvi dir avek Onorab Zialor kontinyen ek sa bon travay Onorab.

Mr Speaker, zis avan mon terminen. Mon oule profite pou felisit tou bann atlet ki'n pran par dan *Paralympic*. E la mon konnen bann ki'n ganny meday a kapab ganny zot rekonpans. Parey Minis Sport ti fer resorti dan nou Lasanble.

Mr Speaker, mon pou donn tou mon sipor pou sa Mosyon. Mersi Mr Speaker.

(APPLAUSE)

MR DEPUTY SPEAKER

Mersi Onorab ou osi pou ou *clock* 10 minit. Prosen entervenans, Onorab Aglae.

HON EGBERT AGLAE

Mersi Mr Speaker. Bonn apre midi tou dimoun ki a lekout. E osi si nou annan nou bann dimoun otreman kapab ki pe swiv sa deba ozordi. Mosyon i lo zot.

Mr Speaker, ozordi mon krwar pou en pei Sesel, nou merit fyer lafason ki nou'n arive tret nou bann dimoun ki pe viv ek en dezabilite. Ki swa en dezabilite fizik, ouswa mantal. Nou annan ozordi bann lenstitisyon ki'n ganny ankadre, ki'n ganny mete pou kapab siport zot lepanouisman lavi li menm.

Me avan mon bouz pli devan lo konteks Sesel, Mr Speaker. Parfwa i bon nou al en pti pe an aryer. Regard en pti gin sirtou dan bann *early* 1900 mon kapab dir.

Kot bann letan ki bann dimoun ki ti annan dezabilite, ti bann dimoun ki ti ganny kasyet, dan en sans. Ouswa

parey plizyer pei, zot ti ganny trete avek - dan en fason pov, mon kapab dir.

E bokou bann ti ganny mete dan bann landrwa, sirtou ler pe koz *housing estate*. Zot ti menm ganny plase avek bann dimoun tel ki parey bann kriminel. Bann dimoun ki dan lasosyete zot ti get zot dan en fason en pti pe pli enferyer.

E avek levolisyon. Levolisyon sanzman dan *mindset*, avek bann ki ti pe lager pou bann drwa avek bann dimoun ki annan dezabilite, in annan bann nouvo devlopman kot firanmezir, ptipti serten sa bann *mindset*; serten sa bann *taboo*; serten sa bann stigmatizasyon; serten sa bann diskriminasyon ki ti pe arive anver en dimoun ki ti annan dezabilite, ti ganny sanze o firamezir. E vwala apre ki nou'n war bann lorganizasyon in devlop bann groupman, bann NGOs. E in menm ariv lo bann nivo enternasyonal, ziska nivo Nasyon-z-Ini ozordi ki ganny rekonnet *any person living with a disability*.

E nou dan konteks Sesel, Mr Speaker. Nou osi nou'n form parti sa levolisyon. *Ok*. E nou osi dan nou letan, mon kapab dir, lontan letan ou ti annan en fanmir ki ganny *disable*.

Akoz mwan mon rapel byen dan enn mon bann manm fanmir i annan dimoun ki ti annan en dezabilite. E i ti reste anndan. *Ok?* Byen rar ou pou war li pe fer letour deor. Ouswa pou ganny pran pou met deor.

Sa bann letan *wheelchair* – ti difisil pou ganny en *wheelchair*. Ti servi sa ki nou apel brankar pou ou met en dimoun lo la.

E, se sa ki mon pe dir pou dir, tou keksoz ki'n arive ozordi avek levolisyon dezabilite, i ti annan son letan li menm. Si ozordi nou pe war poudir serten *building* ki'n ganny konstrir plis ki 25an, 30an pase, napa fasilite *disable*.

Se aköz sa letan sityasyon, *mindset*, devlopman kot anver bann dezabilite. I pa ti pe ganny gete lo sa nivo parey nou anvi get li ozordi. Be nou'n sirmonte tousala, e nou pe sirmonte.

E mon konsyan poudir nou annan bann Lalwa Regilasyon an plas ozordi. Sirtou nou fek fer pase sa *Physical Planning Bill*. Ki dan Lartik 34 li menm i koz lo *physical accessibility* pou nou bann dimoun dezabilite.

E mon'n tann bann Onorab, atraver ou Mr Speaker - bann ki'n koz avan mwan lo bann legzizans *Planning Authority*. E dan sa *Bill* Lartik

34 i fer referans avek tousala. Ki bann devloper i bezwen konpran e konsyan pou zot entrodwi bann fasilite pou bann dimoun otreman kapab, kapab ganny akse avek servis ki dan sa landrwa. Sa i enn.

Dezyenmman zot al osi en pti pe pli profon. Pli profon ki zot mansyonnen – zot mansyonnen ki, kot i annan nesesite bann ki donn servis osi. Me selman sa i ava vin avek bann levolisyon ki i ava annan bann fasilite *braille*.

Ki en dimoun i kapab osi servi ler i pe vin akse servis. I ava annan en *counter* ki ava resevwar sa dimoun ek *disable*. E la, i ava kapab akse pou li kapab – sa dimoun li menm eksprim son konsern.

So, teknolozi in evolye. Ozordi ou kapab asize avek enn sa bann *braille* ki'n modernize. E sa *disable* li i kapab pran son aksyon, pas son lanmen parey i pe dir. Son kominikasyon ki i fer. I a ganny tradwi lo en *speaker*. Si sa, parey en dimoun pa tande, ouswa i pa kapab koze. Tousala.

So i annan bann levolisyon. E dan Lalwa. Modernizasyon ozordi ki nou'n fer? Nou ti pase nou menm nou. I pran kont sa bann nesesite. Me selman, kwa ki nou, nou ti a kontan vwar an plis? E mon

santi ki petet loter Mosyon i bezwen pran kont osi. Petet i a met sa bann sizesyon devan letan i *reply*. Se kot i konsern ozordi.

Lo kote ledikasyon. E bokou lanfaz in ganny mete ki; nou bann dimoun otreman kapab, *disabled*, i kapab ganny akse avek en sistenm ledikasyon.

Menm si i pa pou a la menm oter parey en dimoun ki normal. Me selman i pa kapab ganny kit deryer. E sa nou'n war. Nou annan bann lenstitisyon ki pran kont sa bann dimoun avek dezabilite.

E osi, lanfaz osi in ganny mete lo *equal opportunity*. E se sa ki letan nou dir nou pa anvi kit personn deryer. Nou ti a kontan tou dimoun i ganny son fason loportinite dan son fason. Dan en fason egal.

E sa i ede Mr Speaker, pou retir sa lapartenans enferyer kot ti egziste lontan. E ozordi nou war poudir nou pa per. Akoz mon krwar bokou nou dan nou distrik.

Mon kot mon Port Glaud i annan apepre 35 dimoun ki pe viv ek dezabilite. E nou'n fer diferan aktivite dan lepase pou kapab fer sa bann dimoun konpran poudir; *you are not alone*. Nou pa pe kit ou deryer.

Me selman ozordi, en pti pe regre ki mon annan se; letan nou'n *repeal The National Disabled Council*. Pou mwan sa, i ti en pti pe par annavan mon pou dir. Menm si zot pe dir nou pe plase dan en Minister, sa *Act* letan nou'n *repeal*. Pou mwan i pa pe fer zistis ozordi akoz sa kordinasyon ki ti egziste, mon pa pe war li pe marse parey i ti marse.

E se la ki mon krwar nou bezwen osi reflexir akoz; annou rod en *body*, en lorganizasyon ki pou vin sa lavwa pou bann dimoun dezabilite. Zot pe demann nouvo Polisi. E sa *body* li menm li i ava enn ki ti ava asize, vwar. Dan plas...

Mon konnen ou kapab vini dir mwan ou ti - nou kapab fer en komite pou revwar sa. *But the committee have en lifespan* li.

En *body*, ou kapab donn li son stati legal, i pou ale pran plizyer lannen. E sa i ava vi en sofgard sa bann Lalwa ki nou pe demande, ki nou pe pase pou soulaz nou bann dezabilite. I ava vin sa gardyen. So, mwan mon krwar nou devret al dan sa bann direksyon.

En lot pwen, Mr Speaker. I byen ki dezabilite i partisip dan *sport*. I fer byen. Zot anmenn meday. Mon felisit zot. Me

selman nou bezwen osi kapab kontinyen motive. *Ok.*

Wi bann dezabilite zot ganny en benefis pou zot kapab sirviv. Me selman i pa ase pou zot, dan en fason, sirtou bann ki fer *sport*. Zot bezwen bann lekipman. Parfwa zot tap laport, zot ganny ede.

Me mon ti a swete ki; par egzant bann lasosyasyon ki asosye ek *disable*. Zot – anmenn en pti pe plis sipor pou sa bann ki pe pratik bann diferan *sport*.

Lot eleman se, kot i konsern bann dezabilite ki anvi bouz devan. I annan ki parey zot in nonmen, Mr Speaker, bann ki'n al dan en landrwa travay, me selman apre i pa'n ganny garde.

Me selman i annan osi ki annan bann pti lanbisyon pou fer zot biznes. Ozordi teknolozi pa neserman ki ou bezwen bouze. Ou kapab fer en biznes se ou. Me, pou zot ganny akse ek kredi, pou ganny en *loan*. I en pe difisil pou zot.

Petet nou bezwen vwar ki kalite *scheme* nou kapab met an plas, pou ed sa bann dimoun otremman kapab. Si i annan bann ki nou war zot doue dan en pti *skill*. I kapab dan teknolozi, e menm akoz...

Ler nou koz dezabilite, i pa zis ou'n ne avek. Dan ou letan

grandisman, adilt i kapab ariv ou serten aksidan, ki ou war ou vin en *disable*. Akoz i egziste sa. *Ok.* Parey bann solda ki al dan lager. Ou menm ou fer en aksidan lo semen. *You can be disabled*. Me sa pa anpes ou kontinyen viv ou lavi.

So, sa bann keksoz ki nou bezwen regard li dan sa *thinking* ki nou anvi anmenn devan dan sa modernizasyon. Wi, bann lenfrastruktir i bezwen modernize pou fer akse. Me selman nou bezwen bouz ankor pli lwen ki sa.

Get lavi sa *cycle life* ki sa dimoun ki annan en *disable*. Ouswa ki dan son lavi i rankontre *disable*, i pe viv pou li kapab viv dan en fason pli normal ki en dimoun osi ki normal pe viv.

So, avek sa Mr Speaker, mon konnen en kantite Gouvernman lepase in fer pou bann *disable*. E nou'n rekonnèt zot. E i pa dir, fini lanmenm. Nou bezwen kontinyen vwar ki mannyer nou kapab anmenn zot, sa bann dimoun avek dezabilite pli devan. So, avek sa Mr Speaker, mon pou termin lanmenm an sipor sa Mosyon. Mersi.

(APPLAUSE)

MR DEPUTY SPEAKER

Mersi Onorab. E aprezan mon ava donn laparol Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou Onorab. E bonn apre midi tou dimoun a lekout.

Mr Speaker, Mosyon anmennen par Onorab Naddy Zialor i en Mosyon byen kalkile, avek bokou senserite anver nou bann frer ek ser ki pe viv avek en dezabilite.

Onorab Naddy Zialor pe konsider sa Mosyon avek bokou valer e bokou respe son bann frer ek ser, ki ozordi nou pe apel zot bann dimoun ki pe viv avek en dezabilite. Ouswa otreman kapab. Ouswa eksepsyonnelman kapab.

Mr Speaker, sa Mosyon pe demann avek Leta pou konsider en kad legal pou dimoun ki pe viv avek en dezabilite e osi en Polisi nasyonal pou garanti en sosyete pli enkliziv.

Mr Speaker, ler nou pran premye demann sa Mosyon, ki pe demann Gouvernman pou konsider en kad legal pou dimoun ki pe viv avek en dezabilite, i vreman enportan ki en tel demann i ganny konsidere.

Sirtou letan nou tann – nou tande, ouswa nou aprann

ki i annan serten bann dimoun ki pe viv avek en dezabilite, pe ganny bokou abize. E kot naryen pa pe ganny fer pou protez zot.

Mr Speaker, sa topik abize fodre pa ki nou kasyet. I enportan ki nou koz lo la pou nou arive liber sa bann ki pe pas atraver bann tel soufrans dan diferan fason.

Mr Speaker i annan dimoun ki pe viv avek en dezabilite ki'n perdi tou son drwa. Sa i dominant plis lo kote dimoun ki pa kapab marse ozordi. E osi sa ki pa vwar kler. Ler nou koz lo abize e perdi zot drwa, sa i vin dan diferan fason;

Zot ganny arase zot drwa a ledikasyon. Zot drwa pou travay. Napa drwa fer okenn zanmi. Ganny kite fermen dan en lasanm. Pa konnen ki savedir pran en pti ler soley. Ni rezouir en pti ler fre lo bor lanmer, pas zot lanmen dan disab ouswa asiz dan batan laroul.

Mr Speaker, sa ki ganny mal nouru pa pe konnen ki savedir pran en bon *breakfast*, ouswa en bon dezennen ou dinen. E menm ganny en bon ben.

Mr Speaker, par sans yer swar dan lakour, radyo *AM* ti on. E mon ti sanse pou swiv en program lo dimoun ki pe viv

avek en dezabilite. E sa – e sa non “eksepsyonnelman kapab” ti ganny servi tou dilon dan sa program.

Lafason ki sa program ti pe ganny deroule, konmsi zot ti pe anvoy nou sa mesaz pou reget o pli profon dan sa Konvansyon ki Sesel ti vin en manm an 2009.

Mr Speaker, dan sa program ti osi fer sorti ki *UN* i rekomande ki Sesel i vin azour anver sa Konvansyon. E met mezir neserer an plas pou ki drwa tou dimoun avek en dezabilite i ganny respekte.

E i tre enportan ki tou Seselwa. Sirtou bann fanmir ki annan manm avek en dezabilite, ki zot konnen ki i annan sa Konvansyon ki protez drwa okenn dimoun ki pe viv avek en dezabilite.

I osi enportan ki nou pran kont ki en dimoun ki'n ne avek en dezabilite i pa ti demande pou li ne koumsa. Alor, dan sa bann tel ka parey, nou oblize proteze, respekte e tret sa dimoun avek lanmour. E donn li son drwa posib ki i merite.

Dan Lartik 8 sa Konvansyon i promouvwar respe total pou tou dimoun avek en dezabilite.

Mr Speaker, dezyenm demann sa Mosyon, i pe demann en Polisi nasyonal pou

re garanti en sosyete pli enkliziv. Ankor, mon pou dir ki i enportan ki nou konsider sa demann, ki pou permet bann dimoun avek en dezabilite, ouswa eksepsyonnelman kapab arive bouz pli fasilman. Avans devan, e aport zot devlopman lo tou nivo.

Mr Speaker, sa i osi fer mwan refer lo parol Premyer Dam, Madanm Linda Ramkalawan ki ti dir dan en aktivite pou bann dimoun avek en dezabilite; “pa get zot dezabilite, me regard zot abilite”.

Mr Speaker, si nou tou nou devlop en latitud parey, nou pou anmenn en gran sanzman, lazwa de viv e bokou plis talan dan lavi an zeneral. Akoz tou dimoun neamwen ki son abilite. Sa pou permet nou ansanm akote sa bann dimoun, zwe nou rol e osi kit nou mark dan nou sosyete.

Mr Speaker, pou mwan ler mon pe koz lo enklisivite, mon senserman krwar ki tou i devret komans depi kot lakour, depi ki sa zanf ankor pti.

I devret pe grandi avek lanmour - paran ek bann ser ek frer dan son zalantour, pe donn li sa valer e konfyans ki sorti kot ou ki pou fer li devlop sa menm konfyans ek konfidans. E osi lakseptans dan son prop lekor.

Montre li ekrir, lir, bouze. E annan sa konfidans ki i pou kapab vin endepandan. Donn li sa konfyans ki kot lekol i pou ganny trete parey nenport zanfan. E selon son abilite, i pou kapab vin en atlet. En danser. En koudriyez. En fotografer. Fer lapentir e bokou lezot ansanm ankor.

Ki kot tou lekol, *ramp* ek bann *bar* pou sa bann endividi kapab servi pou zot kapab bouze. *Lift* e ankor *ramp* ek bann *bar* dan bann *building* i ganny mete pou deservi bann tel dimoun ki bezwen akse dan nenport *building* ou ki bezwen al dan en nenport Minister.

Pavement i devret annan fasilite pou deservi sa bann dimoun. Dan larantre bazar pou fasilite bann endividi ki *enjoy* al fer zot prop pti *shopping*. Dan larantre bann Legliz. E konmela deza, bokou Legliz in fini pran sa linisyativ. Me pa zis pou bann lanterman, me osi pou deservi nou bann dimoun aze ek frer ek ser avek en dezabilite.

Mr Speaker, apard bann fasilite fas a mouvman, nou osi devret pe met lanfaz lo lanplwa. Fodre pa ki nou ferm lizye lo drwa travay en dimoun ki pe viv avek en dezabilite. I son drwa aport son kontribisyon ki i anvi fer dan en sosyete.

Mr Speaker, i annan landrwa kot en dimoun i al fer en *interview* pou en travay, zis koman i rantre, desizyon i ganny pran lo son kondisyon fizik. En dimoun i kapab pa marse, me i entelizan. I kapab ekrir. I kapab reponn telefonn. I kapab travay lo *computer*. En dimoun i kapab pa vwar kler, me i kapab servi *braille*. I kapab sante. Lir en *poem* san ki i met lo en papye.

Mr Speaker, nou bann endividi ki pe viv avek en dezabilite i annan talan ekstraordiner. Permet mwan koz lo trwa zabitan dan Perseverance ki annan rikord remarkab, e ki zot in fer listwar.

Ms Dinara Bonne, 14an. In anmenn 2 meday lor Sesel pou tay 100 met e osi sot an longer dan *Zwe CJSOI*. Dinara in *travel* san son paran, akoz son paran ti met sa konfidans dan son lekor depi byen boner, ki i pou kapab fer li.

Dinara i osi bon dan *computing*. Mannye son telefonn. I vremen azour avek teknoloji. I kontan aprann lakwizin avek son manmi. E move bon dan bann danse modern konmela.

Samuel Morel ki in anmenn meday lor pou sot an longer e meday larzan pou tay 200 met ankor dan *CJSOI*.

Samuel in menm al partisip dan lekspozisyon lar dan Lenn, kot i ti al ekspoz son bann lapentir zis apre ki i ti retournen sorti partisip dan *CJSOI*.

Mr Speaker, Samuel i annan zis en problem pa tande. Me son talan i vreman vas. I en garson debourye. Apart lapentir i osi fer *carving* e montre gran pasyon dan *landscaping*. Sa i montre nou ki dimoun avek dezabilite, zot annan zot talan.

Mr Speaker, i avek bokou lazwa ki mon pou anonse ozordi, ki Samuel ankor in ganny selekte pou al partisip dan Zwe Losean Endyen tre byento.

Trwazyenmman Mr Speaker. Nou osi annan Mr Jean-Marc de Silva ki sorti dan Perseverance menm, premye atlet pou pran en meday lor pou Sesel dan Zwe Mondyal Olenpik Spesyal ki pe deroule an *Berlin*.

Ankor, nou bann dimoun eksepsyonnelman kapab pe kontinyen fer paviyon Sesel monte, e nou lim nasyonal rezonnen aletranze. Lo non zabitan Perseverance, mon pou pas mon felisasyon senser, pou nou bann atlet ki pe met zot non dan liv listwar. E ki pe kit zot mark koman dimoun eksepsyonnelman kapab.

Mr Speaker, apard sa trwa atlet ki mon'n koz en pe lo zot, e osi rekonnet zot performans alaoter. Mon le osi fer resorti ki nou annan ankor lezot ka dan nou distrik tel ki; Mrs Maggie Estico ki i en lot legzanp ki debourye e ki pa fasil pou reste dan lakaz. Mon krwar tou dimoun i konn li. Sa madanm ki toultan zot vwar li lo *wheelchair* pe ale vini.

Atraver sa Mosyon, i pou en bon lokazyon pou nou al dekouver zot talan. Rode ki mannyer nou pou kapab anmenn soulazman e siport, e rann zot lavi en pe pli ere.

Mr Speaker, la ankor mon mansyonn – letan mon mansyonn rann zot lavi ere, mon pou sipliy avek zabitan ki pe fer lavi serten dimoun avek en dezabilite, malere. Ki pe fer zot viv dan kosmar. Ki fodre zot arete.

Mon oule osi anvoy sa mesaz ki i annan Lalwa ki tou dimoun i annan son drwa. E ki zot merit zot trankilite, zot drwa a lavi, e zot drwa pou *enjoy* zot lakour parey nenport ki.

Mr Speaker, vi ki nou pe koz lo kad legal e osi en Polisi nasyonal pou garanti en sosyete pli enkliziv, mon mesaz pou bann fanmir ki pe ganny torture e abize par zot vwazen ki annan Lalwa. E fodre ou leve e

al rod ou drwa pou ki ou zanfan – ou menm ou sa adilt ki pe viv avek en dezabilite, ou a ganny ou trankilite.

Avan mon termin mon deliberasyon, mon pou profite pou dir en gro mersi Mrs Jourdane Ernesta ek son tim, pou tou zot sipor ki zot anmennen pou bann dimoun avek en dezabilite. Kontinyen sa bon travay e rann lavi sa group dimoun pli ere.

Mr Speaker, sa Mosyon pou anmenn bokou sanzman dan lavi bann dimoun ki pe viv avek en dezabilite. E osi bokou soulazman pou bann fanmir ki pe siport zot bann zanfan.

Mon pou donn mon sipor total sa Mosyon, akoz a nenport ki fason ki nou ne, nou annan nou drwa. Mersi Mr Speaker.

(APPLAUSE)

MR DEPUTY SPEAKER

Mersi Onorab. Donk, in ariv ler aprezan pou nou pran en *break*. Nou pou retournen 4er. Ler nou retournen 4er, i reste 6 Manm lo lalis ki'n endike pou koze. Zot tou zot pou ganny 10 minit.

Sa i ava vin Onorab Samynadin. Onorab Lemiel. Onorab Larue. Onorab Woodcock. Onorab Vidot. Onorab Bistoquet. Apre

summing-up nou ava fini a ler. Donk nou ava zwenn 4er.

(BREAK)

MR DEPUTY SPEAKER

Welcome back tou dimoun. E pou kontinyasyon nou travay pou sa apre midi nou pe konsider en Mosyon. E pou bann ki fek zwenn mon ava zis repas lo Mosyon ki table par Onorab Naddy Zialor. I pe demande ki;

Lasanble Nasyonal pe demann avek Leta pou konsider en kad legal pou dimoun ki pe viv avek en dezabilite e osi en nouvo Polisi nasyonal pour garanti en sosyete pli enkliziv.

Prosenman lo nou lalis sete Onorab Kelly Samynadin.

HON KELLY SAMYNADIN

Mersi Mr Speaker. Bonn apre midi tou dimoun a lekout. Mr Speaker, mon oule komans mon lentervansyon par felisit e remerci Onorab Zialor pou sa Mosyon. Ki mon konsider koman tre enportan e apropiye pou letan ki nou pe viv ladan.

Mon osi lev mon sapo anver li pou sa lalit ki'n komanse dan demars pou nou akeyir en sosyete pli enkliziv. Mon rekonnèt ki i annan en kantite travay ki'n komanse dan bann diferan lenstitisyon,

ki swa Gouvernman ou prive. Pou garanti ki nou bann dimoun avek bann diferan abilite spesyal i ganny pli byen ankadre dapre servis ki zot bezwen.

Letan ki nou pe konsider dinyite, sekirite ek loportinite bann endividi pou zot kapab viv en meyer lavi, I enportan ki koman en pei nou pran sa konsep enklizyon sosyal tre o serye.

I osi enportan ki nou siport tou endividi pou ki zot kapab santi zot konekte e valorize dan sa sosyete ki zot pe viv. E pou nou adres bann diferan form eksklizyon sosyal, ki zot kapab pe eksperyans lo en baz kotidyen; ki kapab baze lo laz, sex, dezabilite, ras, etnisite e Larelizyon. Stati Imigrasyon. Stati sosyoekonomik. Loryantasyon seksyel e lidantite bann zanr.

Mon osi mon pe demande ki Gouvernman i konsider en kad legal pou dimoun ki pe viv avek en dezabilite, e osi en nouvo Polisi nasyonal pou garanti en sosyete pli enkliziv.

Mon pou siport sa Mosyon aköz mon santi ki sak sitwayen, pe enport zot abilite, ki swa i dan son *full* kapasite, oubyen ki swa i annan en serten ou plizyer limitasyon, i devret annan Lalwa ek fasilite ki'n ganny kree

a son dispozisyon, pou li kapab devlope e eksplwat son bann akizisyon entelektyel. Oubyen vokasyonnel dan son totalite.

Sak sitwayen i bezwen kapab partisip dan devlopman ekonomik son pei. San loportinite pou travay, etidye oubyen ganny akse ek lankadremen neserer, i anmenn en pep ver lapovrete.

Mon rekonnèt ki i annan serten benefis ki Gouvernman i donnen, anver bann dimoun ki annan en serten dezabilite. Me pou bann ki kapab travay, i osi annan bann louvertir pou ki zot osi zot kapab partisip dan devlopman ekonomik pei.

Mr Speaker, Lartik 25 nou Konstitisyon, i dir ki sak sitwayen ki prezan legalman dan Sesel, i annan drwa pou laliberte mouvman. E an se moman letan ki nou pe konsider bann dimoun avek dezabilite, i annan serten modifikasyon ki merit ganny fer avek bi pou fasilite zot mouvman pou zot mobilite.

Par egzanz; akse dan bis i touzour en konsern. E i osi annan serten landrwa ki donn akse avek bann diferan servis ki merit ganny revwar, pou ki nou bann dimoun avek dezabilite i kapab pli byen ganny resevwar e ankadre.

Mr Speaker, Lartik 33 nou Konstitisyon i dir ki Leta i rekonnet drwa sak sitwayen a ledikasyon. E pli lwen, 33(b), pou asire ki bann program edikasyonnel dan tou lekol i ganny vize ver devlopman konplet sa dimoun.

E anba 33(c), pou permet lo baz kapasite entelektyel sak sitwayen, i ganny akse legal pou loportinite ledikasyon e fasilite odela peryod ledikasyon obligatwar.

Mon konnen ki i annan Lekol Eksepsyonnel ki li in ganny mandate pou ankadre tou zanfan avek en serten dezabilite, ki swa dan konteks fizik ou konitif. Me dan demars pou ki nou bann lekol Leta i vin pli enkliziv, i annan bokou ki merit ganny fer an term *curriculum* osi byen an term lenfrastruktir.

Mon rekonnet ki Minister Ledikasyon in entrodwi *Diploma* dan *special educational needs*. Pou ki bann ansennyan i kapab vi pli abil an term kapasite e akizisyon. Avek bi pou pli byen kapab zer bann zanfan ki annan serten dezabilite ki vin swiv ledikasyon formel dan bann Lekol Leta.

Me parkont, bokou zot, zot ganny serten limitasyon an term mobilite. Akoz lenfrastruktir ki annan an plas

pa zwenn zot bann bezwen fizik. Par egzanp; napa *ramps* pou akse *wheelchair* pou sorti dan en laklas dan letaz, oubyen sorti dan en blok pou al dan en lot.

Ki montre ki malgre ki i annan travay ki pe ganny fer an term kapasite pedagogik pou zwenn bann bezwen konitif sa bann zanfan, laspe lenfrastruktir i touzour reste an kestasyon.

Lekol Au Cap i enn parmi sa 2 lekol ki pe ganny konsidere dan sa Proze Lekol Enkliziv. E ziska prezan sa laspe lenfrastruktir i reste en konsern ase sibstansyel. Mon konnen ki sa in ganny adrese dan nouvo Polisi enklisivite sa Minister. Me i reste pou ki aksyon nesaser i ganny fer.

E mon pe demande ki dan nouvo Polisi pou dezabilite ki pou ganny travay lo la, byensir par Minister pou Lafanmir, Lazenek ek *Sport*. Sa osi i ganny pran kont. E ki en travay konzwent i ganny fer ant sa 2 Minister pou ki nou war en sanzman remarkab dan sa direksyon.

Mr Speaker, mon pe rekomande ki tou bann dimoun ki travay etrwatman ek bann dimoun dezabilite, i re evalye rol ki zot zwe anver sa bann dimoun, avek bi pou garanti ki

zot viv dan plis konfor ek stabilite.

Dan distrik Au Cap tou resaman nou ti organiz en *charity event* pou nou kapab ranmas fon pou ed serten dimoun ki annan en dezabilite dan nou distrik menm. Avek larzan ki nou'n anmase, nou'n kapab aste *wheelchairs*. Asiste dimoun ki ti pe al lo *overseas treatment*, eksetera.

Mon osi, mon oule sezi sa lokazyon pou remersye tou dimoun. Espesyalman zabitan Au Cap ki ti desann an *grand nombre* sa zour pou partisip avek nou. E ede fer nou levennman en sikse. E pou nou kapab arive ganny finans neserer, pou nou ed nou bann dimoun ki dan bezwen dan distrik.

Mon osi rekonnèt prezans Onorab Zialor dan nou Seremoni Donasyon kot i ti enn nou envite doner. E kot i ti osi ganny loportinite pou prezant en zabitan ki pe viv avek en dezabilite. E sa se Mr Dereck Marie, avek en donasyon. Mersi Onorab Zialor pou reponn grasyezman a nou lenvitasyon.

Mr Speaker, en sosyete i zis letan i zwenn bezwen tou son bann Manm. Espesyalman bann ki dan minorite. Nou Gouvernman pou aspire pou akonplir son bann lobligasyon

avek latansyon spesyal ek lasistans, pou bann ki annan bezwen spesyal.

Sa i sitasyon *manifesto* nou Gouvernman an sa ki konsern travay ki merit ganny fer anver bann dimoun ek bezwen spesyal, ki konpri sirtou bann ki pe viv avek en dezabilite.

Trwa pwen for in ganny met devan anba ki laksan pou ganny mete, pou permet lobzervasyon sanzman dan sa direksyon. E sa i enkli premyerman; provizyon akse konplet ledikasyon pou bann zanfan avek bann difikilte laprantisaz. E sa byensir i tonm anba Polisi Ledikasyon Enkliziv ki'n fini ganny revwar, e dan faz enplimantasyon.

Dezyennman; fasilitasyon akse pou lankadremman ek lanplwa pou bann dimoun avek dezabilite. E la mon rekonnèt ki travay in demare lo renovasyon *Vocational Training Centre*. E ki i ekspekte konplete tre byento, pou ki bann etidyan sa sant ava kapab swiv bann kour ek program dan en lanvironnman pli favorab e enkliziv.

Epi enportan, pou premye fwa dan listwar nou lezislasyon. Nou annan nou premye Manm Lasanble avek en abilite spesyal. E sa se Onorab Zialor li menm. Malgre sa, i touzour

annan bann limitasyon ki bezwen ganny adrese dan sa direksyon.

E finalman, provizyon bann fasilite piblik, ensi ki dan bann landrwa travay. Pou permet plis lendepondans pou nou bann dimoun avek dezabilite. Mon konnen ki sa i en *work in progress* lo lapar Gouvernman. Me mon pe osi demann avek Sekter Prive pou zot osi vin devan e inifye. Pou asire ki dan servis ki zot ofer, enklisivite i enn zot *motto*.

Pou konklir Mr Speaker, mon pou dir ki bezwen pou annan en kad legal pou bann dimoun avek dezabilite, ensi ki en Polisi nasyonal pour en sosyete enkliziv, i vreman esansye, an vi ki parmi enn bann lobzektif Gouvernman. E sa i ava en pa pli devan anver realizasyon sa bann tel lobzektif.

En sosyete enkliziv se en sosyete pou tou. Akoz i pou enn kot respe pou tou drwa imen, ensi ki bann laliberte fondamantal, diversite kiltirel e relizyez, lazistis sosyal ek bann bezwen spesyal pou bann ki vilnerab ek bann group dezavantaze. Partisipasyon demokratik e prensip *rule of law*, i ganny egzerse san okenn krentif ou baryer. E i responsabilite sak parti prenan

pou partisip aktivman dan sa demars. Avek sa Mr Speaker, mon oule afirm mon sipor anver Mosyon anmennen par Onorab Naddy Zialor. Mersi.

(APPLAUSE)

MR DEPUTY SPEAKER

Mersi. Mersi Onorab e mersi pou *timekeeping*. Prosen entervenans, Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun a lekout. Mr Speaker, ozordi nou annan en Mosyon devan nou, ki pe demann Leta pou konsider en kad legal pou bann dimoun ki pe viv avek en dezabilite.

E osi pe demann Leta e Gouvernman pou annan bann Polisi. En Polisi nasyonal li menm ki pou garanti en sosyete pli enkliziv.

Demann li menm i fer bokou sans. E ler nou regarde, Mr Speaker. Ozordi mwan mon en Manm lo Parlman Pan-Afriken, en? Ozordi letan ou pe regard lo Kontinan Lafrik, bann Manm ki lo sa parlman pe lager en kantite pou drwa bann dimoun ki pe viv avek en dezabilite.

E mon pou dir lo Kontinan Lafrik li menm. Sa bann

dimoun ki pe viv avek en dezabilite li menm. Mon pou dir - mon pou term li dan en fason ki, ou a krwar zot ganny gete koman dernyen. *Or* zot napa drwa preski ditou.

Bon. Isi Sesel bokou in ganny dir ki, bokou in ganny fer. Me mon santi Mr Speaker, ki i reste ankor bokou pou fer. Mon ti sanse pou mwan voyaz avek Onorab Zialor. Si mon ganny li byen, mon krwar ti an 2014, Onorab Zialor. Si mon ganny li byen.

Nou ti al en kour 7 semenn - *JICA*, Zapon. E laba nou ti fer 4 semenn an Zapon, e 3 semenn nou ti fer li *Thailand*. Kot nou ti al en *training* dan *mainstreaming* pou bann dimoun ki pe viv avek e dezabilite. E mon pou dir ti vreman en plezir pou vwar ki mannyer Zapon zot in vreman, vreman avanse.

Ler nou ti konpar Zapon ek *Thailand*, ou ti war sa gran diferans ki i annan ant sa 2 pei an sa ki konsern bann kad legal ki annan an plas pou bann dimoun ki pe viv avek en dezabilite. Zot bann Polisi ki zot annan. Ou ti vwar sa diferans ant Zapon avek *Thailand*.

E mwan mon ti a kontan ki nou isi Sesel – menm si nou'n fer bokou, Mr Speaker. Mon ti a kontan ki nou revwar – parey la,

nou konnen ki i annan Polisi lanplwa. Apre ti annan Polisi enkliziv an sa ki konsern ledikasyon. Petet annou *go through* sa 2 Polisi. E menm petet lezot Minister.

Akoz, Mr Speaker, mon rapel lannen pase *or* pe al ganny 2an si mon pa tronpe, kot Onorab Regina Esparon in dir - kot mon ti ganny sans pou mwan prezant sa protokol lo sa *Charte* Afriken pou bann dimoun avek dezabilite. Sa i sa *charte* ki nou'n travay lo la, letan nou ti dan Parlman Pan-Afriken.

E sa *charte* li menm Parlman Pan-Afriken, pe demann tou sa 55 pei Lafrik pou nou sinyen e ratifye sa *charte* li menm ki ti ganny adopte an Addis Ababa an Letyopi le 29 Zanvyè, 2018.

E ler nou gete ziska ozordi dernyen sinyatir lo sa *charte* ti le 17 Zen 2020. E sa se *Angola* ki ti dernyen pou sinyen. E an tou ziska la in annan zis 9 pei ki'n sinyen. E i bezwen 15 pei pou sinyen pou sa vin anfers.

E ladan letan nou pe regard sa *charte* li menm, i – sa protokol nou kapab dir, in ganny *designed* e in ganny met an plas pou li promot, protez e asir lepanouisman tou dimoun ki pe viv avek en dezabilite. E osi drwa – pou protez drwa sa

bann dimoun ki pe viv avek en dezabilite. E pou zot asire ki zot ganny sa respe e dinyite ki zot bezwen.

E sa protokol osi i donn zot bann proteksyon legal, ekonomik, sosyal, kiltirel, sivil, drwa dan politik. E lezot keksoz ankor. Sa protokol li menm i annan li 44 Lartik e ki mon'n antann loter Mosyon in nonm sa kad legal ki petet ler i ganny drafte, ki nou konsider...

Gouvernman i konsider met bann lartik ki dan sa *UN Convention Protocol* ki annan pou bann dimoun ki pe viv avek en dezabilite. E an menm tan i enportan – la i la sa pti liv ki mon ti pe rode Mr Speaker, pou mon montre zot. E zot kapab vwar li *online* osi.

I mete '*Protocol to the African Charter on Human and Peoples' Rights on the Rights of Persons with Disabilities in Africa*. So, sa ki pe demann nou pou nou kapab ratifye. E ki i vin koman en keksoz legal pou tou sa 55 pei lo Kontinan Lafrik.

E an menm tan letan loter Mosyon pe demann Gouvernman - ler nou fer sa kad legal pou isi Sesel. Ki mon krwar i bezwen. Akoz ki mon pou dir i bezwen Mr Speaker? Zour nou ti pe fer sa prezantasyon konsernan sa pti liv ki la avek Minis Lafanmir –

Minister Zialor - ler Komite Madanm ti pe prezant sa avek li, Minister Zialor ti fer mon konpran ki i pa okouran ti annan sa.

E an menm tan letan nou ti dan diskisyon, i ti pe fer resorti ki *disability* i en *cross-cutting issue*. E li i ti pe fer nou konpran ki, drwa bann dezabilite i dan nou Konstitisyon. Petet i pe mazine akoz en Lalwa ankor?

Me selman mwan mon santi ki en Lalwa ankor i pou pli – i pou pli asir bann dimoun ki pe viv avek en dezabilite, zot drwa. E ki menm si anba Konstitisyon i annan, avek en lot Lalwa ki nou pou pe met an plas, i pou pli morde. I pou fer sir ki si okenn dimoun i kas sa Lalwa, an sa ki konsern drwa pou nou bann dimoun ki pe viv avek en dezabilite, aksyon i kapab ganny pran avek zot, menm si anba Konstitisyon osi aksyon i ganny pran. Me nou krwar ki en Lalwa li menm i pou protez plis nou bann dimoun ki pe viv avek en dezabilite.

An sa ki konsern – mon pou pran legzanp, Mr Speaker - letan nou pe regard Polisi. Mwan, mon krwar bann Polisi, parey mon pe dir, vre i annan sans ki bann ki annan la;

Polisi lanplwa. Polisi enkliziv ledikasyon, i merite

ganny revwar. I merit ganny *assessed* pou regarde en pti pe - sirtou sa polis ledikasyon. Pou nou vwar kwa ki nou kapab azoute pou nou fer li vin pli meyer.

Akoz bokou fwa, keksoz i *black and white* lo papye, Mr Speaker. Me selman ann aksyon li menm letan pe fer, ou pa vwar aksyon. I an blan e nwar lo papye.

Mon bann koleg in koz en kantite lo kote *access* dan lekol. Nou pe koz enklisivite pou bann zanfan ki pe lekol. Akse. Eski sa bann zanfan ki annan serten abilite spesyal, zot annan sa bon akse?

La mon pou get depi dan mon distrik an term sa ki konsern semen. An term sa ki konsern kalite *wheelchair* pou zot kapab ariv kot petet zot ava anvil arive. *Free movement* kot zot kapab ale zot menm. Pri serten bann keksoz osi ki nou vwar.

Par egzanp ou pou koz en *wheelchair* elektrik. Eski ozordi – bokou dimoun i kapab annan mwayen pou li ganny enn? Nou tou nou ti a kontan vwar nou bann dimoun ki ti a kontan mobil. *Free movement*. Bouz mannyer zot ava anvil. Eski zot kapab *afford*?

Petet dan tou sa bann laliny letan nou pe koz lo la, la.

Ti a bon nou regard ankor en pti pe. Mon konnen *tax* in desann lo sa bann keksoz. Be selman ti a bon nou revwar ankor en pti pe, si nou pe koz amelyorasyon.

Depi an term son kad legal. Depi an term son Polisi. Annou vwar osi en pti pe bann diferan keksoz osi ki vin pou nou bann dimoun dezabilite, ki a kapab amelyor en pti pe zot kondisyon lavi.

Mr Speaker, *once* ou ne avek en dezabilite, ou viv avek sa dezabilite. Mon pe koz la ler, si ou'n ne avek. Mon'n ne, mon lipye i vire, i tord. Mon'n ne *Down syndrome*. Eski – sa pa sanze apre en serten letan. Akoz ozordi i fer ki – e sa ki mon ti a kontan dan bann revil, dan bann revwar ki pe ganny revwar.

I bann sitasyon aktyel petet ki nou bezwen rekonsidere. E bann rekomandasyon ki petet mon ti a kontan loter Mosyon osi i regarde, ki mannyer i kapab fer sa antre dan son bann rekomandasyon.

Letan ou pe regard en zenn in ariv 18an. E ozordi i ganny koupe son lasistans envalidite, akoz i dir in ariv 18an. Me sa dezabilite i ankor la. I pe viv avek. Petet sa osi ti a bon nou revwar. Nou regarde.

Or, i annan ki ti pe ganny sa lasistans depi zanfan ziska 18an. Ler i ariv 18an i koupe. E i dir – ou al kot Dokter e Dokter i dir donn 4 mwan. Apre trounen nou a regarde. Sa osi mon krwar dan nou bann revwar pou nou fasilite en pti pe lavi nou bann dimoun ki pe viv avek en dezabilite, petet i merit ganny rekonsidere. I merit ganny revwar.

Nou bann dimoun ki pe viv avek en dezabilite osi i konplent lo kote lasistans. I annan petet sa *allowance* or sa lasistans ki zot gannyen - wi nou konnen, ti komans vreman ba. In monte, monte ziska la ozordi.

Me *still*, avek pri lavi ki'n monte ozordi, Mr Speaker, vre petet i annan serten sa larzan i pa ase pou sa bann dimoun ki pe viv avek en dezabilite. Mon konnen ki Gouvernman in dir zot pe revwar en pti pe bann diferan lasistans. Kontinyen revwar. Annou kontinyen regarde ki mannyer nou kapab kontinyen anbelir lavi nou bann dimoun ki pe viv avek en dezabilite. I annan ki bezwen reste dan *pampers*. I annan ki bezwen manz diferan kalite manze ki vreman balanse e ki koute.

So, dan sa laliny, nou pou bezwen kontinyen pe regarde,

pou nou fer sir ki nou bann dimoun avek dezabilite i viv dan konfor. E zot viv en pe pli byen ki zot pe viv ozordi.

Parey mon'n dir, in annan bokou amelyorasyon. Bokou keksoz ki'n ganny fer. Me nou bezwen toultan pe kontinyen amelyor lo la.

Mr Speaker, letan mon pou regard konvansyon lo sa Protokol Afriken ki'n ganny fer ki nou, nou tonm ladan. I pou vreman, vreman enportan ki nou osi, nou re al ladan byen pou nou regarde.

Mazorite keksoz ki ladan Mr Speaker, nou pe fer nou. Drwa travay. Drwa reabilitasyon. Drwa pou bann dimoun annan en lozman. Drwa pou zot viv dan laliberte, an sekirite. Drwa a lavi.

Akoz ozordi nou annan - nou annan plen koup. Nou annan koup dezabilite ki pe viv byen. Zot in ganny lakaz. In marye, Mr Speaker. Zot pe viv byen. Zot annan zanfan. Zot pe *brought up* byen zot zanfan, e pou sa mon dir felisitasyon.

E parkont petet, i kapab annan serten zot ki pe rankontre serten pti difikilte lavi. E ki petet nou bezwen kontinyen pou travay avek zot. Vwar zot. Regarde ki mannyer nou kapab amelyor zot

sityasyon. E ki zot viv pli ere. Zot viv pli byen.

Mon koleg taler in koz en pti pe osi lo kote sa ki konsern - i annan ki petet i *involve* dan bann pti biznes. E petet sa akse a kredi, a *loan*. Sa osi petet nou bezwen vwar ladan, regard ladan. Ki mannyer nou kapab fasilite serten keksoz pou nou bann dimoun ki pe viv avek en dezabilite. E ki mannyer keksoz i kapab amelyor en pti pe pli byen pou zot.

So, an zeneral Mr Speaker – akoz bokou in ganny dir lo sa Mosyon. Mon pou dir ki Mosyon li menm i annan merit. E lo nou kote nou pa vwar letan i annan en Mosyon ki vini ki pe anmenn en benefis. Oubyen ki i pe aport dibyen pou nou bann dimoun ki dan nou kominote; ki en pe pli vilnerab. Oubyen bann dimoun ki otremen kapab, nou bann vye dimoun osi.

Nou lo nou kote, nou pou toultan donn sa sipor pou nou rod fason. Pou nou donn lanmen ansanm. Pou nou rod fason ki mannyer nou pou *better the lives of* sa bann dimoun.

So, avek sa de mo Mr Speaker, mon pou dir ou mersi.

(APPLAUSE)

MR DEPUTY SPEAKER

Mersi Onorab. Nou prosen entervenans lo lalis Onorab Larue.

HON FLORY LARUE

Bonn apre midi Mr Speaker. Bonn apre midi tou Manm. Bonn apre midi tou dimoun dan lakour.

Mr Speaker, an zeneral koman en sitwayen, nou vwar ki nou ganny nou bann drwa ki dekoul dan – sorti dan Konstitisyon. Nou pran li kekfwa *for granted* ki nou annan sa bann drwa. E ki nou lib pou nou kapab egzers tou nou drwa dan tou fason. Fizik, mantal. Avek en laliberte pou fer li.

Letan nou koz lo en dimoun ki pe viv avek en dezabilite, ouswa sa kominote, nou vwar ki en dimoun i kapab; swa in ne avek en dezabilite. Swa i ganny sa dezabilite dan son lanfans, ouswa an grandisan. Ouswa dan son lavi adilt.

Ouswa nou vwar nou avek en dezabilite letan nou ariv en serten laz. Lavyeyes. Swa zenou i ganny afekte. Swa zepol. Swa lebra. Alor nou kapab vwar ki an zeneral dezabilite i kapab tous tou porsyon popilasyon.

Nou vwar ki en dezabilite i kapab fizik. I kapab mantal. I kapab osi en *hidden disability*.

En dezabilite ki ou pa vwar letan ou regard en lot imen. Sa i kapab atraver tel ki legzanp parey; otizm. *Autism* letan ou pou get en dimoun, ou pa pou war si i annan sa maladi. Ouswa en dimoun ki en *slow learner*. Sa i en dezabilite pou li, me ou pa pou vwar li letan ou regard li.

Letan nou ekout bann lezot koleg ki'n koze, zot in eksplor sa topik dan son diferan lanpler. Isi Sesel Mr Speaker, pei in siny en konvansyon. E sa se sa Konvansyon ki apel *The UN Convention on the Rights of Persons with Disabilities*. E sa Konvansyon ti ganny sinyen an Mars 2007. E i ti ganny ratifye le 2 Oktob, 2009 par Sesel.

Mr Speaker, nou vwar parkont ki Sesel koman en pei, depi 1994, ti etabli; *The National Council for the Disabled Persons Act*. E sa i montre ki ti annan en lentere ouswa en konesans lo sa size parmi bann *decision-makers*.

E letan nou'n adopte sa konvansyon, e nou'n ratifye li, nou'n siny li. Nou'n osi montre ki nou annan en lanvi pou ankadre bann dimoun ki pe viv avek en dezabilite.

Me parkont Mr Speaker, en keksoz ki nou vwar Mosyon pe demande, se ki nou regard Polisi ki deza an plas. Alor pou

nou re moderniz li. Me sirtou, i pe demande ki nou anmenn en Lalwa. Nou anmenn en Lalwa an plas pou sa group – pou sa group dimoun. E sa Mr Speaker, i ava en fason pou nou ankadre bann drwa ki dimoun ki viv avek en dezabilite pou annan.

I fer ki letan en dimoun son drwa pou ganny pran avek li, i kapab annan akse avek en rekour ki vin Lakour pou li kapab re ganny son bann drwa.

Alor letan Mosyon pe demann sa; Eski pei i kapab regarde ki nou servi sa Konvansyon koman en gidans? Nou'n vwar zis detrwa semenn pase. Kot nou ti ann sa Trete avek Moris pour *Plateau Mascarene*. Kot nou'n adopte li koman en Lalwa. Eski sa i pa en legzanp pou kapab annan en komansman pou pei, pou nou kapab adopte sa Konvansyon, pou permet ki nou annan en kad en pe pli striktire e bokou pli for? Sa i a fer ki bann sekter - diferan sekter – akoz sa size i *cross-cutting*.

En dimoun ki annan en dezabilite. Ki pe viv avek en dezabilite. I vwar li bezwen annan akse avek *housing*. Avek lasante. Avek ledikasyon. E tou lezot servis.

E en Lalwa i a fer ki tou sa bann diferan Minister, menm ki

sa departman pa tonm anba zot, zot pou bezwen konsider dimoun ki viv avek en dezabilite, dan tou zot prosesis.

Sa i ava ranforsi nou pei anver sa group dimoun. Akoz an zeneral, en dimoun ki trouv li pe viv avek en dezabilite, i souvan en dimoun ki istorikman i ganny *marginalised*. I ganny mete akote.

E souvan son bann *basic human rights* - son bann drwa debaz, i ganny pran avek li akoz i vwar li souvan pe bezwen depann lo en dimoun. Ouswa depann lo bann servis, pou li kapab anmenn en lavi ase konfortab.

Alor, letan nou met sa Lalwa an plas, nou a kapab kekfwa elimin sa diskriminasyon ki vin anver bann dimoun ki viv avek sa dezabilite.

Parkont, Mr Speaker, nou bezwen osi koman en pei regard otour nou, pou vwar lekel bann pei ki kapab vin en legzanp. E dan sa ka, nou'n – mon kapab vwar ki i annan bann pei ki ganny vwar koman bann pei ki annan pli bon servis pou dimoun ki viv avek dezabilite.

E lo en sit *web* i montre ou ki *L'Espagne*, i enn bann pei ki pli byen ganny rekonnet. Akoz bokou dimoun ki servi

wheelchair i annan bokou akse avek bann landrwa touristik e istorik.

E zot in menm fer sa zefor pou transform zot bann *cobble stones roads* - bann semen ki annan bann ros. Pou fer bann *area* kot i fasil pou kapab ganny akse avek *wheelchair*.

Sa i montre ou en pei ki'n al pli lwen pou li sanz son lenfrastruktir ki istorik, e bann lavil ki vreman vye. Me selman ki'n kapab regard sa priyorite, e kapab enkilp li. Met li dan zot devlopman pou kapab enkli bann dimoun ki pe viv avek dezabilite dan zot fason viv.

Nou vwar dan – an *Espagne* osi ki ti dimoun i fer ki zot annan bon akse avek transpor piblik. I annan bokou lotel ki'n osi pran sa legzanp. E in fer ki bokou bann akomodasyon i *disabled friendly*.

E menm parey mon'n dir. Bann latraksyon istorik, ouswa bann latraksyon sosyal i bann landrwa ki kapab akeyir dimoun ki pe viv avek dezabilite. E sa i enn bann legzanp ki nou kapab enspire koman en pei pou nou montre ki nou osi nou kapab fer sa zefor.

Nou vwar ki Lalwa pou - en Lalwa spesifik pou dimoun ki pe viv avek dezabilite, i pa

Lalwa ki *foreign*. I annan bokou pei ki'n fer bann Lalwa spesifik pou protez dimoun avek en dezabilite. E sa in fer ki ankor, plis devlopman in kapab fer dan sa sekter.

Mr Speaker, nou vwar ki nou annan nou en dokiman osi, sorti kot *UN*. Ki apel – ki en dokiman ki donn en konklizyon lo lobzervasyon an relasyon avek en rapor lo Sesel ki'n ganny ekrir par *Committee on the Rights of Persons with Disabilities*.

Sa rapor ki ti ganny fer an Mars 2018, i donn nou en pe bann laspe pozitiv ki nou pe fer dan pei. E nou ganny felisite pou sa. E bokou Manm in anmenn sa dan nou latansyon.

Me parkont, Mr Speaker, i annan osi bann landrwa konsern e bann rekomandasyon ki sa rapor i met devan nou. E tipikman i dir nou ki i annan retar pou nou regard bann Lezislasyon domestik ki nou annan. Ki pa anliny avek sa Konvansyon ki nou'n sinyen. E sa i enkli Konstitisyon. E i dir nou dan ki morso Konstitisyon. E i osi fer referans avek Kod Sivil.

Mr Speaker, i dir nou ki - spesifikman i dir nou ki; “*the lack of a specific act or resolution for domestication of the Convention*”. Savedir menm

dan sa rapor i dir nou ki nou bezwen fer en zefor pou travay anver en Lalwa pou aplik sa Konvansyon, pou nou *domesticate* li e aplik li dan nou Lalwa.

I dir nou ki dan serten nou Lalwa nou ankor pe servi bann term derogatrwar pou bann dimoun ki pe viv ek en dezabilite. E in dir nou ki nou bezwen met en zefor spesyal pou fer bouze sa bann travay.

Mr Speaker, in dir nou sirtou ki, sa bann keksoz ki annan pou fer avek dezabilite, i bezwen ganny sipor bann dimoun ki pe viv avek en dezabilite. Nou bezwen annan plis dimoun ki annan en abilite pou fer desizyon.

E la mon bezwen pran sa loportinite pou mwan felisit Onorab Zialor. Menm si i annan en dezabilite, nou tou nou bezwen aksepte ki Onorab Zialor i en dimoun avek lopinyon vreman for. Letan nou fer bann deliberasyon ouswa bann deba, i en dimoun ki anmenn bokou pou sa deba.

E mon felisit li ki in kapab arive ozordi vin en *MNA*. Li i en dimoun ki ti ne avek en dezabilite. E ozordi nou vwar li koman en Manm Parlman e mon vreman fyer pou ganny li koman mon koleg. E osi ki mon

asiz o bor li dan Lasanble Nasyonal.

Mr Speaker, i montre nou ki en dimoun avek en dezabilite i annan en abilite *to think*. Pou servi son lespri e sirtou pou anmenn son lavwa. E la dan sa ka, i pe servi li en Mosyon ki afekte li spesifikman. E en kominote ki kekfwa in ganny *overlooked*. Alors sa rekomandasyon dan sa rapor sorti kot *UN* i dir nou ki nou bezwen *involve* dimoun avek dezabilite. E bann desizyon i bezwen ganny pran par zot. Pa zis bann *abled person*. Me bann *disabled person living with disability* ki bezwen fer bann desizyon dan sa rapor.

Mr Speaker, an konklizyon, nou bezwen rekonnet ki sa group dimoun i anmenn en kontribisyon ki sirtou souvan nou pa kapab apresye. Akoz zot fason viv. Zot annan en abilite pou idantifye serten *skill* ouswa zot annan en abilite pou zot anmenn serten mesaz. E nou bezwen met valer lo sa bann kalite kontribisyon, ki kekfwa nou ki napa okenn dezabilite pa met latansyon lo la.

Dan sa ka Mr Speaker, mon ti a kontan demann tou Manm lo tou lede kote latab pou anmenn zot sipor pou Mosyon Onorab Zialor ozordi. Mersi.

(APPLAUSE)

MR DEPUTY SPEAKER

Mersi Onorab Larue. Prosenman lo lalis i vin Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi tou Onorab. Mr Speaker mon krwar mon pa pou tro long.

Sesel ti siny sa Konvansyon Drwa Imen pour Dezabilite, prodwir par Nasyon-z-ini, le 30 Mars 2007. E i ti ratifye li le 2 Oktob 2009. Bi sa Konvansyon i pou promot, protez e asir pli o nivo, ouswa plezir egal bann drwa imen fondamantal avek liberte total. Avek bi pou promot e respekte dinyite tou bann dimoun ki annan dezabilite.

Dapre sa Konvansyon, tou dimoun - dan kourt term, dan tou dimoun. Sirtou dan letan kourt term e lonterm. E tou dimoun ki annan dezabilite mantal, fizik, entelektyel, ou sensoryal. Savedir bann dimoun ki sourd, bann dimoun ki pa tande. Ki zot bann sistenm – swa kalite sistenm in ganny afekte. E osi bann ki pa war kler. Laplipar sa bann dimoun zot santi zot annan

serten baryer ki anpes zot pou fonksyonn totalman. E sa i anpes zot partisip plenman dan nenport ki sosyete.

Promot enklizyon avek – ou enklisivite avek dimoun ki annan dezabilite, i vedir Mr Speaker. Premyerman; rekonnet e partaz zot drwa. Sirtou sa bann drwa ki bann laspe ki kapab donn zot en meyer lavi.

Drwa pou al lekòl. Drwa pou zot annan en landrwa travay. Drwa pou zot kapab viv dan kominote. Nenport ki drwa pou zot kapab ganny akse avek sistenm lasante. Drwa pou fer en fanmir, parey lezot mon koleg in dir. Drwa pou angaz e partisip dan lavi politik.

Drwa osi pou kapab zwe, partisip dan *sports*. Drwa pou travay e osi menm drwa pou annan en travay parey nenport ki dimoun ki parey mwan avek ou.

Mr Speaker, wi isi Sesel, en kantite nou dimoun i ankor dan sa sitasyon *denial*. Ouswa zot ankor pa le krwar ki diskriminasyon i ankor egziste. Ki pe detri lavi nou bann zanmi avek dezabilite.

Sa *denial* i ankor egziste, aköz i annan serten *mindset*. I annan bann *stereotype*. E fason ki serten dimoun i war en dimoun avek dezabilite, kot zot

ganny - par egzanp, zot ganny *bully*. Zot ganny dir zot pa normal. E sa kalite mantalite i afekte nou frer ek ser avek dezabilite.

Mr Speaker, mon pou lans en lapel avek tou dimoun isi Sesel, pou ki nou bezwen konpran e aksepte tou dimoun avek dezabilite dan tou laspe. Swa dan laspe sivil. Swa dan laspe kiltirel. Swa dan laspe ekonomik. Swa dan laspe politik. E sirtou aköz zot drwa in ganny stipile dan tou lenstriman ki'n ganny prodwir par ou drwa imen.

Sesel i bezwen enplimant bann stratezi tre entegral dan tou laspe avek en vizyon kolektiv, kolaborativ, pou donn meyer akse avek servis pou dimoun avek dezabilite.

Wi, Mr Speaker. Mon dir sa aköz malgre Sesel in fer serten progre vizavi sipor bann dimoun avek dezabilite, Sesel i ankor kapab fer pli byen ankor. Aköz viktimizasyon i ankor en move limaz.

Labi. Sirtou labi seksyel. Labi psikolojik. Labi fizik. E sa – osi nou annan labi emosyonnel. E sirtou dan sirkonstans kot i annan neglizans. E nou trouv osi i annan marzinalizasyon. E i ankor bann defi ki nou ankor pe trouve isi Sesel.

Ler nou dir en kad legal e en Polisi i ganny met an plas, parey loter Mosyon in dir, nou pe demande – e mon pou asire ki zot pou lager kont – nou fer sir ki nou bezwen fer en bon lager kont tou sa bann *anomaly*, pou asir bon swen, proteksyon e sipor pou tou nou bann dimoun avek dezabilite.

Mr Speaker, mon kontan pou war osi ki sa nouvo Gouvernman, e sirtou Minister Lafanmir, in komans sa premye pa. An Avril 2023, in komans sa premye pa par anrezistre pou *fast track* bann dimoun ki annan dezabilite. Sa nou'n trouve i o nivo servis ki pou permet tou dimoun ki pe viv avek en serten dezabilite, pou akse plizyer servis piblik. E menm bann servis prive osi. Mon pou felisit sa Minister parey mon dir - Minister Lafanmir, pou sa nouvo linisyativ. Me an tou ka, nou bezwen met li anba en kad legal.

Mr Speaker, tou Seselwa i bezwen fer pli gro zefor pou asire ki en pli meyer fitir pou tou dimoun avek dezabilite, an partenarya avek tou Lazans - pa zis Gouvernman – e osi kominote. E osi sosyete sivil.

Mon mesaz – mon pa pou long Mr Speaker - mon mesaz

pou tou dimoun ki pe viv avek en serten dezabilite;

Fer sir – e nou konnen poudir zot bezwen met sa an konsiderasyon. Personn pa pou fer zot per. Nenport kwa ki arive. Reste determinen ki pou fer sir pou reisir, personn pa pou zanmen anpes ou realiz ou lobzektif. Personn pa pou anpes ou realiz ou rev.

Avek sa de pti mo Mr Speaker, sa pti dezir rezimen, mon pou siport sa Mosyon akoz sa Mosyon i sorti dan fon leker mon frer loter Mosyon, ki'n ne e viv avek en dezabilite fizik pandan 34an. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans lo mon lalis i Onorab Vidot.

HON AUDREY VIDOT

Mersi Mr Speaker. Mon le zis met lo rikord, mon konnen petet la apre midi pa pe swiv lord. Me mersi pou donn mwan laparol.

Mr Speaker, Sapit 3 Parti 1 Konstitisyon Larepublik Sesel i sit 25 Drwa Imen e Laliberte Fondamantal pep Seselwa. Sapit 3 Parti 2 i site ki;

“i devwar tou sitwayen Sesel pou soutenir e defann nou Konstitisyon ek Lalwa. Fer avanse lentere nasyonal e kiltiv linite nasyonal.”

Konstitisyon i osi site ki i devwar tou sitwayen Sesel, travay konsyansyezman dan profesyon, lokipasyon, ouswa metye zot swa. Tout an respekte abilite sa Seselwa pou li fer li. E i responsabilite e devwar tou sitwayen Sesel pou kontribye anver byennet son kominote. Pou protez, rezerv e amelyor nou lanvironnman.”

I regretab ki menm si sa bann drwa i la dan nou Konstitisyon, me i pa neserman pe ganny byen aplike an totalite ozordi. Tel parey; nou koz lo drwa lavi kot nou vwar poudir labi pe kontinyelman arive. E i annan nou bann pti inosan ki pe perdi zot lavi swivan sa bann labi.

Drwa pou ganny en prose zis devan lazistis. Arestasyon ki ganny fer, me napa sarz. Laliberte lekspresyon ki aplik zis pou serten. Laliberte mouvman, kot parey mon koleg Onorab Lemiel in fer resorti, mankman ankore serten fasilite kot i annan devlopman avanse.

Drwa swen medikal; Zis pou partaz avek Lasanble, manm piblik ki pe ekoute, zis la Sanmdi pase, mon'n aprann

avek en sitwayen, ki li pou 40an servis ki in donnen dan Sekter Piblik, in kontribye pou son pei e son kominote.

I pas li en sitasyon lavi kot in bezwen swen medikal. E in ganny dir kot i annan lasistans serten medikal, i bezwen ganny met lo en lalis aköz latizann i ser. Menm si sa dimoun i montre lentere, fanmir zot dir zot pare pou kontribye an serten.

Ankor petet la, nou vwar poudir napa lazistis pou serten i aplike - pou fasil pou gannyen.

Drwa travay; Viktimizasyon ek labi dan travay dan diferan form, i kontinyelman arive. Drwa ledikasyon. Mankman. Ki bezwen ganny konsidere. Pa ankore kapab fini materyalize. Drwa sekirite sosyal zis pou sit serten lo bann drwa ki'n ganny mansyonnen.

Ankor 2 mon bann koleg. Onorab Lemiel ek Onorab Uranie, in fer resorti kot ankore atraver bann serten bann benefis ki serten nou bann dimoun ki pe viv avek serten dezabilite, i pa pe resevwar. Ou zot in ganny koupe zot bann serten benefis.

Mr Speaker, zeneralman Parti 2 Sapit 3, pe fer resorti ki sitwayen Sesel, i bezwen fer tou posibil pou travay ver

lakonplisman bann laspirasyon ki annan dan preanbil sa Konstitisyon ki apel pou nou Sesel.

E a okenn moman, pa dir ki sa bann drwa e devwar pa aplikab pou nou bann Seselwa ki pe viv avek en dezabilite. Gouvernman presedan in fer bokou progre remarkab dan kreasyon ek ranforsisman nou bann lenstitisyon, laplikasyon Lalwa Demokrasi, Drwa Imen e striktir pou egzers drwa ek laliberte nou bann sitwayen Sesel.

Kot ankor, nou bann sitwayen ki pe viv avek en dezabilite, pa ganny eparnye. Zis pou sit detrwa legzanp; Sistenm lasante, swen lasante, ledikasyon, lozman, lanplwa, loportinite kree bann lorganizasyon pou siport zot bann drwa sosyal e lezot ankor.

Me i osi enportan note, ki i ankor annan plis pou amelyore dan bann servis e lenfrastriktir, pou soulaz nou bann sitwayen, ki byensir espesyalman bann ki pe viv avek en dezabilite.

Mr Speaker, mon'n konsantre fortman lo drwa e devwar nou sitwayen Sesel. Akoz i enportan ki nou, piblik ki pe ekoute, ki pe swiv nou deba ozordi, i konpran ki kot ou drwa

i fini, sa lot sitwayen pou li i konmanse.

Alors, ki swa ou pe viv avek en dezabilite, ouswa non, anba Konstitisyon Larepublik Sesel nou egal. Napa leskiz pou zistifye ou aksyon par kasyet deryer ou abilite, ou laparans. Se la kot nou komans kree divizyon e laenn parmi nou sitwayen.

Zis parey nou vwar en zanfan, en dimoun aze, oubyen en dimoun ki pe viv avek en dezabilite, i fer en keksoz ki mal kont son prosen. Oubyen provok son prosen.

E serten nou ki tris ozordi dan nou sosyete, nou soutir bann tel pratik. E rod leskiz pou defann; ki swa sa zanfan. Ki swa sa dimoun aze oubyen sa dimoun ki pe viv avek en dezabilite. Alors, i pa merit ganny kategorize tout an respektan son lezot drwa anba Lalwa.

Mr Speaker, ler Mosyon pe demann avek Leta pou konsider en kad legal pou dimoun ki pe viv avek en dezabilite, mon bezwen demann avek Gouvernman pou komans par regard dan sa Lalwa. Kot ti kouver pou konsey ki tous bann dimoun avek – ki'n viv avek serten dezabilite.

Petet atraver sa Lalwa ki'n ganny retire. E osi annan plis

konsiltasyon avek bann endividi ki travay avek bann volonter, oubyen bann paran zanfan ki pe viv avek en dezabilite. Pou fer resorti bann pwèn ki fer referans for avek sa Lalwa ki ti egziste avan.

Bann ansennyan ki'n travay pou plizyer lannen avek bann zanfan ou adilt ki viv avek serten dezabilite. Pou osi kapab anmenn zot kontribisyon adisyonnèl pou vin avek sa ki loter Mosyon pe demande atraver sa Mosyon. Pou ki i annan en konsiltasyon e bann pwennvi ki konplimant bann pwèn pozitiv ki lezot Manm in fer resorti. Pou ki i anmenn tel zistis anver Mosyon ki devan nou Lasanble ozordi.

Mr Speaker, mon bezwen montre gratitud anver Gouvernman presedan avek tou lezot lorganizasyon. Ki swa prive ou bann lenstitisyon Gouvernman oubyen bann endividi, pou tou sa ki'n ganny fer, pou ki ladministrasyon ozordi ki'n ganny en manda pou fer pli byen.

E kontinyen batir lo sa ki i annan, e vin avek nouvo fason fer - nouvo Polisi nasyonan ki pou anmenn plis loportinite. Plis bon lenfrastruktir dan en lanvironnman ki pli zis, ki garanti en pli meyer sosyete enkliziv ki Mosyon pe demande.

Kot tou sitwayen Sesel, pe en pe port; ki ou oryantasyon seksyel, krwayans spirityel, partenans politik. Ki swa ou viv avek en dezabilite ou non. Me kot tou i ganny trete egal.

Ler Gouvernman a komans prose ki Mosyon pe demande, i pou en loportinite pou tou paran zanfan...

Mon kapab kontinyen Mr Speaker?

MR DEPUTY SPEAKER

Sertenman. Kontinyen Onorab.

HON AUDREY VIDOT

Mersi. Ler Gouvernman a komans prose ki Mosyon pe demande. I donn loportinite tou paran, zanfan endividi, e lorganizasyon ki annan nou, sitwayen Seselwa – ki pe viv avek en dezabilite. Kapab fer resorti bann defi nou bann sitwayen ki pe viv avek zot dezabilite.

Anmenn bann rekomandasyon ki pou ranforsi sa kad legal ki pe ganny demande. Ki sa group sitwayen Sesel i osi benefisye dan okenn lezot loportinite devlopman imen ouswa fizik, ki ganny fer ou deroule dan pei.

Mr Speaker, pou konklir, bokou keksoz in ganny dir depi ler loter Mosyon in prezant

Mosyon ki devan nou Lasanble. I annan bokou pwen for ki anmenn pou siport lenportans sa Mosyon. Me osi nou bezwen rekonnèt poudir; wi, i annan keksoz ki annan lespas pou fer pli byen. I annan lespas pou kontinyen.

E parey mon'n dir, Gouvernman ozordi i annan sa Lotorite, sa pouwar pou li fer li. E bann lorganizasyon ki pe travay ansanm avek - ki swa Gouvernman. Zot bezwen otan posib ganny sipor pou zot kapab kontiny zot travay ki latas ki devan zot.

Mon felisit tou sitwayen ki pe viv avek en dezabilite, ki'n sezi loportinite ki swa lepase e ozordi. Pou zot kapab kontinyen akonplir zot bann lentere, zot bann aspirasyon.

Mon ankouraz zot pou zot kontinyen reste pozitiv. Enspir lezot ki ankor petet pe viv dan serten lafreyer oubyen ezitasyon, pou teste zot abilite spesyal. Pa zis konsantre lo negativite petet an term zot dezabilite aktyel fizik.

La ki Mosyon pe demann Gouvernman pou kree nouvo Polisi nasyonal, pou garanti en sosyete pli enkliziv. I zot sans pou zot koz lo bann difikilte ki zot pe fer fas avek ozordi. E kwa ki manke pou soulaz e amelyor zot sityasyon lavi.

Mon zis swete, ki Gouvernman, atraver demann ki pe vini atraver sa Mosyon. Ki zot a fer zistis avek piblik, pou annan sa konsiltasyon. Akoz bokou fwa, letan bann Lalwa i vin devan Lasanble, i annan piblik ki kritike ki dir i annan mankman konsiltasyon.

Pou ki tou i pa vin zis atraver bann *manifesto* politik. Me vre rekomandasyon e lopinyon piblik ki ganny valorize, pou zot montre zot kontribisyon anver en progre ki pou aplikab, e ki pou benefis son frer ek ser sitwayen Sesel.

E ki sa prose i garanti en sosyete pli enkliziv e i ganny valer parey Mosyon pe demande. Mersi Mr Speaker pou donn mwan laparol.

(APPLAUSE)

MR DEPUTY SPEAKER

Mersi Onorab. Dernyen entervenans avan *Right of Reply*. Onorab Woodcock?

HON WAVEL WOODCOCK

Mersi Mr Speaker. Mr Speaker, mon pou retourn lo Mosyon anmennen par Onorab Zialor. Annefe ozordi i en moman istorik dan listwar nou Lasanble Nasyonal kot en dimoun spesyal ki'n ne otreman kapab, in anmenn ozordi en

Mosyon spesyal devan nou Lasanble Nasyonal.

(APPLAUSE)

HON WAVEL WOODCOCK

Mon pou felisit tou bann Manm lo tou lede kote latab. A leksepsyon dernyen entervenans ki'n sey anmenn en pe politik dan sa Mosyon. Pour lafason ki zot in siport sa Mosyon ki'n ganny anmennen par nou frer, Onorab Zialor.

Ou konnen Mr Speaker, i pa fasil pou en dimoun viv avek en dezabilite. I annan bokou defi ki zot pe fer fas avek. E mon frer Onorab Zialor i en dimoun ki konpran sa tre byen. Annefe i pa zis li. I annan son ser osi ki otreman kapab parey li menm.

E i en dimoun ki'n pas dan bokou, Mr Speaker. Petet en zour si ou – bann dimoun ki la deor, zot ganny loportinite ennler asiz avek li, koz avek li, zot ava konpran en pti pe bann defi ki en dimoun ki otreman kapab i fer fas avek.

E akoz sa bann defi ki'n fer fas avek. E i en dimoun ki'n pas en pe partou. Lo Mahe, Praslin, La Digue. Annefe in pran li koman son koz pou sanpyonn koz bann dimoun ki otreman kapab.

Se pou sa rezon ki ozordi in anmenn sa Mosyon, kot i pe

demann avek Leta pou konsider en kad legal pou dimoun ki pe viv avek en dezabilite. E osi, pou vin avek en nouvo Polisi nasyonal pou garanti en Sesel pli enkliziv.

Wi, en kantite keksoz in ganny fer dan lepase. Pa diferan groupman Gouvernman. Me i malere ki i *still* annan sa *stigma* ki atase avek nou bann frer ek ser ki annan serten dezabilite.

E bokou lanfaz pe ganny mete ozordi pou nou donn respe nou bann frer ek ser Mr Speaker, ki annan serten dezabilite.

E Onorab Zialor i en dimoun ki mon konn li tre byen. E i en zanmi osi. E in fer bokou pou sanpyonn sa koz, parey mon'n dir. Me i malere ki i enn bann dimoun ki'n fer fas avek bokou. Ki son talan ek son abilite pa'n ganny rekonnet dan lepase.

(APPLAUSE)

HON WAVEL WOODCOCK

Kot i pa'n ganny sa loportinite pou li montre son abilite parey ki, erezman ozordi nou parti pe donn en zenn ki'n ne avek en dezabilite, pou li prouv son lekor e montre ki i kapab fer.

E ozordi Mr Speaker, nou war in ariv dan Lasanble kan malerezman i pa'n ganny bann

loportinite dan le pase pou li *shine*. Pou li montre vreman ki i annan.

E menm par lefe ki'n fer fas avek bokou diskriminasyon – *I mean* - Pa bokou letan pase ti annan en *threat* lo son lavi. Apre mon krwar son repons Leta Lanasyon. Zot ti *threaten* pou pran son bekir, pou tap li avek. Pou fer li ditor. I ti kree en lafreyer dan li ek son fanmir kot i ti bezwen kit son lakour aköz sa krentif.

E ler nou pe get Polisi. Polisi Mr Speaker, ki nou pe diskite. I enportan ki nou annan en Polisi, ouswa en Lalwa pou protez bann dimoun avek dezabilite kont okenn form diskriminasyon. Lo rezyon sosyal, verbal ouswa fizik.

Nou bezwen protez zot Mr Speaker. E nou bezwen apresye zot. Zot abilite ki zot – aköz zot annan en keksoz pou zot ofer dan sosyete. Parey Onorab Zialor pe prouve ozordi.

Ou konnen Mr Speaker, Onorab Zialor depi ler in vin dan Lasanble, i annan en keksoz enportan ki bokou dimoun in bliye ki i ti fer. Ler nou ti pe debat lo *Physical Planning Bill*, i ti propoz en lamannman dan *Physical Planning Bill*, pou ankadre bann dimoun ki otreman kapab. Pou fer sir ki i annan - dan bann

fasilite – dan bann *building* i annan bann fasilite nesese pou kapab permet bann dimoun avek dezabilite pou zot *access* parey.

Bann diferan *floors* pou zot kapab mouvman. Bann dimoun petet ki annan bann dezabilite fizik. E in fer sa bann propozisyon dan sa bann lenfrastruktir ki ganny fer dan le fitir.

E mon apresye ki ozordi, Onorab Aglae in rekonnet ki Onorab Zialor ti anmenn sa lamannman. Menm si zot pa ti siport sa lamannman. Me ozordi i rekonnet poudir sa ki Onorab Zialor ti anmenn ti en keksoz ki bon, e i bon pou tou nou bann zenn avek dezabilite.

De pwen enportan ki'n ganny refer sorti dan Mosyon Onorab Zialor ki mon pou koz en pe lo la, se ki Polisi fodre fer sir ki servis pou bann dimoun ki an dezabilite i ganny amelyore.

E dezyenman, in koz lo lenportans pou ankadre *build capacity*. *Build* kapasite bann dimoun avek dezabilite.

Mr Speaker, parey mon'n dir mon pou met lanfaz lo sa de pwen. Amelyor servis ki dimoun avek dezabilite i gannyen. Mon 100poursan dakor avek sa. Me i enportan note ki pou amelyor

servis, nou bezwen met an plas bann fasilite nesese.

Ki fer mwan retourn lo mon zil lo Praslin, ki pou plizyer lannen, Mr Speaker, nou pe demande, nou bann dimoun avek dezabilite pe demande - mon krwar i pe al lo 12an, 15an - ki en teren ti'n ganny idantifye lo Praslin pou fer en sant pou bann dimoun avek dezabilite.

Pou bann aktivite rekreasyonnel. Aktivite biznes. Kot zot kapab aprann bann nouvo *skill*. Lakwizin. Lar. *Craft*. Koud. Lezot *skill* Mr Speaker, pou *build* zot kapasite Mr Speaker. Me i malere, Mr Speaker, ki sa pa'n materyalize avek menm bokou promes ki'n ganny fer dan lefase.

At one point ti pou ganny *funded* anba *India Grant*. Mon konnen ti'n arete en pe letan. Me selman en keksoz ki nou Gouvernman i kapab konsidere *going forward*. Akoz nou bezwen en fasilite pou nou ankadre nou bann zabitan.

Ler mon pe koz Praslin, mon osi pran kont poudir La Digue osi i bezwen sa kalite ankadreman. En landrwa pou nou devlop nou bann dimoun ki otreman kapab lo Zil Pros.

Mr Speaker, bokou Manm in koz lo bann fasilite ki nou bezwen. Sirtou dan bann *building*. Sirtou dan nou distrik.

Dan nou kominote. Parey *pavement* pou bann ki annan bann dezabilite fizik zot kapab servi zot bekir, ouswa zot kapab servi *wheelchair* kot i annan bann *ramp*. Onorab Regina in koz lo la.

E menm dan bann *building*. Parey propozisyon ki Onorab Zialor ti fer dan - ler i ti anmenn lamannman dan *Physical Planning Bill* pou annan bann fasilite parey *elevators*. E la en konsern ki, Mr Speaker, ki plizyer zabitan in met devan mwan. Annefe i en *challenge* pou mon frer Onorab Zialor.

Sak fwa nou Komite i al fer vizit lo Praslin, li i bezwen al en zour davans. Akoz i en problem pou li mont lo avyon. So, alor i en pti pe pli fasil pou li al lo bato. Alor li i al en zour davans. Akoz i annan en *challenge* pou li *board* avyon.

E pa zis li. Annefe, mon annan enn mon fanmir osi ki ozordi i annan serten dezabilite fizik. Li osi i dir mwan son difikilte ler i lo *airport* Mahe pou li mont lo avyon. Kot zot bezwen pran li, lev li, pou met li dan avyon. Akoz nou napa en fasilite en *lift*, en keksoz. Mon pa konnen.

Petet en teknolozi modern ki nou kapab servi, pou nou ed sa bann dimoun ganny akse

pou antre dan avyon. E i en *challenge* pou zot. Kekfwa nou pe pran sa – nou pe *take sa for granted*. Me selman i annan sitan bokou. I annan sitan bokou nou bann zabitan lo zil.

E petet demen en dimoun avek dezabilite pe al Praslin, ouswa bann ki sorti Praslin pe vin Mahe, zot fer fas avek sa difikilte Mr Speaker. E nou bezwen rod en fason ki mannyer nou pou ankadre e ed zot.

E dan bann batiman, parey plizyer Manm in koze. Ozordi i annan plizyer bann *building* ki'n ganny *built* dan lepase ki mank fasilite ladan. Parey – sirtou parey *elevators*. *Independence House* par egzanz; i annan Biro Later, Biro Lanrezistremman Biznes. E lezot lofis dan Gouvernman, napa *elevators*.

E menm nou Lasanble, nou pe diskite. Nou Lasanble osi nou napa *elevators*. Ennler parey Onorab Alcindor in dir, nou pe get nou frer Onorab Zialor pe sey mont sa bann peron. I *tough* pou li. E i annan bann lezot dimoun avek dezabilite ki nou pa pou kapab resevwar dan nou Galeri aköz zot pa pou kapab monte.

E sa i bann keksoz ki mon konnen nou Lasanble pe diskite. E mon konnen ki

Gouvernman pe diskite, ki pa'n ganny met an plas anba Gouvernman avan. Wi, i annan keksoz ki zot in fer.

Wi, Onorab Vidot i kontan dir sa, pou dir; nou, nou nouvo Gouvernman nou bezwen amelyor lo bann keksoz ki zot in fer, keksoz lepase. Mon dakor avek li. Nou bezwen amelyore. E alor mon pe demann zot pou donn nou en koudmen pou nou amelyor dan bann keksoz lepase.

Akoz nou kapab fer li ansanm. Si nou vin ansanm. Parey nou siport sa Mosyon. Nou vin avek bann propozisyon, bann sizesyon ki bon pou nou ed nou bann frer ki la deor.

Enn bann pli gro *challenge* osi Mr Speaker, an konklizyon, pou bann dimoun avek dezabilite, se pou ganny travay, e plasman landrwa travay. Menm si form parti nou Polisi lepase, me selman i pa neserman – mon pe koz ou dan Sekter Piblik.

Still i pa ase enkliziv pou nou bann dimoun avek dezabilite. Petet parey mon'n dir, Gouvernman i merit reget zot Polisi pou fer sir – *I don't know* – petet en nide - Gouvernman annan en Polisi pou ki sak biro Gouvernman i merit pran enn ou de dimoun avek dezabilite.

Sirtou bann ki annan; parey bann abilite pou travay, ... en louvraz depandan parey mon'n dir lo zot *skill* ki zot annan. Akoz Praslin mon ganny en kantite zenn ki vin kot mwan i koz avek mwan. Zialor in zwenn avek enn de zot lo Praslin.

La mon pe mazin Mary. Mon pe mazin Jacquelin. Enn de zot ki zot anvi travay. Zot annan serten difikilte. I kapab fizik. I kapab mantal. Me selman *still*, zot anvi travay.

E nou bezwen rod en fason annan en Polisi kler lo ki fason nou pou ouver laport pou zot, pou zot kapab antre, entegre avek nou. Vin pli enkliziv pou ed zot ganny en louvraz pou zot kapab osi ganny en dipen.

Akoz zot pa anvi asiz se zot. Zot pa anvi toulezour pe asiz se zot. Swa zot paran ganny peye pou *care* pou zot. Zot paran osi i anvi en lot louvraz kot i kapab pe ganny petet en pli meyer *income*. E zot osi zot anvi pe travay pou zot ganny en pti *income* pou zot menm, pou zot pe depan lo zot lekor.

Alor Mr Speaker, sa Mosyon ki Onorab Zialor in anmennen la i en Mosyon ki vreman, vreman enportan. Nou merit definitivman revwar bann Polisi e vin avek en kad legal Mr Speaker, pou nou ankadre nou

bann frer ek ser la deor avek en dezabilite ouswa ki otreman kapab.

Avek sa de mo Mr Speaker, mon pou siport sa Mosyon anmennen par mon frer Onorab Naddy Zialor. Mersi bokou Mr Speaker.

(APPLAUSE)

MR DEPUTY SPEAKER

Mersi Onorab Woodcock. Anfet sa Mosyon i en Mosyon ki mon ti anvi entervenir lo la. E mon a zis fer en komanter avek Lasanble. Parski, nou pas sa Mosyon la. Ki pou arive apre?

Mosyon i demande ki Lasanble nasyonal pe demann avek Leta? Nou osi nou form parti Leta. Akoz Leta, *it's the whole of Seychelles*. Nou osi nou form parti. Mon, mon ti a kontan met en defi avek Lasanble, *championed by the mover of the Motion*.

Nou fer en *working group* dan Lasanble. I pa bezwen en Komite li. I en *working group* bann dimoun ki annan lentere dan sa size. I vin ansanm. Nou komans en konversasyon pou get sa bann *policy*. Pou get Konvansyon ki Sesel in sinyen. Pou get Konvansyon ki Onorab Lemiel in koz lo la.

E nou sorti dan bann distrik koman bann Manm

Elekte, pou nou apros nou bann dimoun dan distrik. Mon, mon ale dan Mont Buxton mon fer en konversasyon avek Mrs Jourdane Ernesta avek son group. Pou nou kapab anmenn konsern bann dimoun.

E nou drafte en rapor pour Lasanble. Pour bann *stakeholders* dan sa size la. Parski ou'n dir, fer Lasanble vin sa ki pou fer sa tranzisyon, transformasyon kas baryer. En lot letap ou'n koz lo la.

And si nou osi anbisye. Mon ti ava mete defi devan ou. Pou kwa pa en *Private Members Bill? Do not wait* pou bann lezot dimoun laba deor fer. Isi ou annan tou ou bann koleg ki kapab fer bann resers.

Ed ou - nonm Zapon. Mon fek pe get *American Living With Disabilities Act. We bring all these good elements from all over the world.* Nou kapab fer sa si nou anbisye, avan Desanm 2024.

Sa ki mwan senserman mon ti a kontan dir ou lo la. E mon donn ou mon parol ki mon pou donn ou tou sipor dan nenport fason ki ou bezwen lo sa size. Parski mon annan zanmi e fanmir ki osi dan sa sityasyon. Mersi. E mon ava envit ou alor pou *Right of Reply.*

(APPLAUSE)

HON NADDY ZIALOR

Mersi Mr Speaker. Ler i an se moman 5er10. Alors mon a dir bonswar Lepep Seselwa.

Mr Speaker, depi apre midi mon mazine nou Lasanble in annan enn bann deba lo en Mosyon. Enn bann deba pli onnet e pli senser ki nou'n deza annan an sa ki konsern sa size ki devan nou Lasanble.

Me sa ki enportan se ki mon ti a kontan remersi tou Manm – tou Manm pou zot devosyon. Pou zot kontribisyon pozitiv. Pou zot rekomandasyon. E osi egalman pou sipor. Pou sipor ki zot donn tou dimoun ki pe viv avek en dezabilite dan zot distrik ki zot pe reprezante. E menm lo nivo nasyonal.

Par lefe ki'n annan bokou rekomandasyon, mon ava osi fer propozisyon avek - atraver lofis Madanm Clerk. Atraver ou lofis Mr Speaker, pou ki, sa Mosyon ki'n ganny debat ozordi. Tou bann rekomandasyon ki pou ganny tire dan *verbatim* i ganny *compiled.*

E si posibil, pou fer li vin nou premye rapor an sa ki konsern sa Mosyon. E ki sa rapor i ava premye letap pou nou soumet avek departman e

Minister ki responsab pou pran ka avek bann dimoun ki pe viv avek en dezabilite.

Mr Speaker, mon krwar sa ki enportan dan tou sa ki'n ganny koze, se ki; i annan en nesesite parey in ganny dir. I annan en merit. E pou mon pas briyevman, i annan sa Protokol Afriken ki nou pe egziz Sesel pou sinyen e ratifye.

I annan osi Protokol Opsyonnel Konvansyon Dezabilite ki nou pe egziz Sesel pou ratifye. Me osi sa ki enportan, letan mon'n asize mon'n ekout tou bann Manm lo tou lede kote latab, dan sa transformasyon ki nou anvi anmennen, ledikasyon i lakle. Ledikasyon i lakle.

Savedir i annan en travay ase entans pou nou fer koman en nasyon, pou nou kontinyelman edik – non selman bann dimoun ki pe viv avek en dezabilite. Me bann dimoun ki nou konsider koman “normal” an *inverted commas*, ki zot lavi i annan en lenpak direk lo sa group dimoun, Mr Speaker.

Ou drwa i mon drwa. Mon drwa i ou drwa. Napa naryen ki pou kapab ganny fer “pou nou, san nou.” Mr Speaker.

Mon pe profit sa lokazyon la ki mon pe *summarise* sa Mosyon, pou mon lans en lapel

avek mon bann frer, ek mon ser ki pe viv avek en dezabilite. Annou non selman vin devan letan nou annan problem. Me annou osi vin devan pou form parti sa transformasyon. Pou form parti sa ledikasyon. Pou form parti sa *empowerment*, Mr Speaker.

E mon swete, parey ou'n dir – mon pran tou rekomandasyon senser e serye. Mwan si ti nou kapab komans taler, mon ti pou'n komanse. Me mon krwar i enportan ki nou osi koman bann Manm, nou osi rod en moman koman Lasanble.

Parske mwan mon ti a kontan 7enm Lasanble ler i sorti dan sa laport a lafen nou manda, nou'n non selman koz lo bann dimoun vilnerab, oubyen lo bann dimoun dezabilite. Me nou'n fer bann aksyon konkret pou vreman kit nou mark e anmenn sa transformasyon, Mr Speaker.

Pou terminen, mon fer mon lapel ki mon ti fer depi komansman mon Mosyon. 7enm Lasanble Nasyonal. Annou form parti sa transformasyon. Annou koman en Lasanble, kit nou mark koman en Lasanble ki'n vreman, vreman fer sa tranzisyon ki Sesel i bezwen.

E avan ki mon soumet mikro, mon pou lans en lapel avek tou Manm, lo tou lede kote latab pou vreman zwenn ansanm. E annou anmenn Sesel ver sa demokrasi ki modern. Mon kont lo zot sipor nou tou isi prezan. Mersi.

(Standing Ovation)

MR DEPUTY SPEAKER

Bon. Mersi. Mersi bann Manm. Onorab Woodcock taler fek pe dir; en moman istorik. Mon krwar i premye fwa mwan depi ler mon dan Lasanble ki mon war en Manm in ganny en *standing ovation* pou son Mosyon. *So, it's a historical moment.*

Alor in ler aprezan pou nou pran en *vote* lo mosyon. E mon a zis soumet sa Mosyon avek Lasanble;

Lasanble Nasyonal pe demann avek Leta pour konsider en kad legal pour dimoun ki pe viv avek en dezabilite e osi en Polisi nasyonal pour garanti en sosyete pli enkliziv.

Mon ti ava demann tou bann Manm ki an faver pou endike silvouple? Mersi. Okenn Manm ki kont? Mersi.

Donk Mosyon ki mon fek lir in ganny 28 *vote* an faver.

Okenn Manm pa'n vot kont. Okenn Manm pa'n abstenir. Donk sa Mosyon in ganny aprouve par Lasanble Nasyonal par linanimite.

(APPLAUSE)

MR DEPUTY SPEAKER

Nou pe ariv a lafen nou sesyon travay pou ozordi. Zis pou rapel bann Manm ki demen, Merkrede, i annan en *Special Sitting of The National Assembly*.

Bann lezot *item* ki annan lo program; *ABC* pe zwenn 1er apre midi. Mon'n aprann ki *meeting IAC* ki ti pou fer demen, sa in *postponed*. In anvoye pou le 5 *Juillet*.

Alor, akoz *Special Sitting*, nou pe demann tou Manm pou ariv kot Lasanble Nasyonal pa pli tar ki 2er edmi apre midi; fodre zot in arive.

E *Special Sitting* ki pou konpri Ladres Prezidan *Rwanda*, Paul Kagame. Sa i pou komans 3er apre midi. E akoz i en *Special Sitting* ki pou annan en *foreign Head of State*. Nou konnen, lo lenvitasyon zot pou war i annan *dress code* ki Lasanble Nasyonal pe presize ki bann Manm i mete; msye e madanm.

Donk mon ava dir zot mersi pou zot partisipasyon

ozordi. E nou ava rezwenn
demen bomaten – demen apre
midi plito 3er apre midi. Mersi.

(ADJOURNMENT)